

Ulrich Middeldorf







PRÆFATIO AD PIVM CATHOLICVM.

*Varias annotationes in Rosarium Beatissimæ Vir-
ginis MARIE & alia sequentia Exercitia:
Itemque causas illa hoc modo componendi & im-
primendi, & utilitates aliquas hinc emergen-
tes complectens.*



VONIAM vnaquæque
res ex proprijs seu vsita-
ti sui nominis explica-
tione clariùs innotescit, in primis aduer-
tendum hîc est, Rosarium (quod pro-
priè locum, quo rosæ vel nascuntur vel
seruantur, significat) in hoc nostro
instituto accipi pro peculiari orandi
formula, quam religiosus Pater S. Do-
minicus circa annum humanæ salutis
millesimũ ducentesium, vel (vt ali-
i putant) sacerdos quidam nomine

Petrus Ambrianus (qui supra centum annos alterum præcessit) ex quibusdam Orationis Dominicæ , Salutationis Angelicæ, & Symboli Apostolici recitationibus sæpius repetitis instituit : vnâ cum præcipuis quibusdâ fidei Mysteriis interea meditandis , in Dei & Beatissimæ Virginis Dei genitricis honorem, ex quinario numero instar rosæ (quæ quinque habet folia) compositam : quæ propter a vsitatissimam apud omnes Christianos appellationem **ROSARIUM B. VIRGINIS MARIE** nuncupatur. Quod quidē nomē nunc latius nunc strictius accipitur. Latè sumptū continet quindecim Decades; hoc est, quindecies Orationem Dominicā, & quindecies decies Angelicam Salutationem, (in quavis nimirum Decade decem) & ter Symbolum Apostolorum : habetque quindecim Mysteria, inter earundem orationum recitationem meditanda. Hoc idem aliàs vocatur **P S A L T E R I U M B. VIR-**

B. VIRGINIS, quia tot habet eiusdem virginis salutationes, quot sunt Psalmi in Psalterio Dauidico. Strictè verò acceptum (*vti ordinariè intelligitur, cum alicui pro Penitentia, Indulgentia, aliàve simili de causa recitandum prescribitur*) quinque tantùm complectitur Decades, nimirum quinquies Orationem Dominicani, & quinquagies Angelicam Salutationē cum vno Symbolo: Adeoque in magno Rosario (siue Psalterio) B. Virginis tria continentur parua Rosaria. Hæc autem tribus rosarum generibus, Albis, Rubris, & Damascenis assimilantur. Nam sicut tres isti colores, tres animorum affectiones, gaudium, dolorem, & gloriam representare solent: ita hæc tria Rosaria, tria Mysteriorum genera, gaudiosa, dolorosa, & gloriosa continent, & deuotis mentibus meditanda proponunt. Hanc ergo Deum ac B. Virginem inuocandi formam ita omnium Christi fidelium vsui accommodauit

primus Rosarij Institutor, vt & indo-
ctæ plebi necessarium auxilium, &
doctissimis quibusque vtilissimū ex-
ercitium existeret, tam ad otiosas ac no-
xias mentis distractiones in earundem
orationum frequenti repetitione me-
lius euitandas, quàm ad fructuosam
mentis eleuationē siue meditationem
faciendā de præcipuis Christianæ fidei
Mysterijs; quæ videlicet & lætissimum
Christi Domini in hūc mundū ingres-
sum, & tristē eiusdem hinc egressum,
& gloriosos vtriusque effectus denotāt.

In primo enim Rosario hæc quin-
que diligenti meditatione ruminan-
da proponuntur Mysteria Gaudiosa.
1. Quomodo Archāgelus Gabriël an-
nunciauit Beatissimæ Virgini, quòd
ipsa Filium Dei in vtero suo concipe-
ret. 2. Quomodo eadem sacra Virgo
visitauit cognatā suam Elizabetham
prægnantem. 3. Natiuitas Christi Do-
mini Nostri, cum eiusdē Circuncisio-
ne, & quomodo Magi eum adoraue-
runt.

runt. 4. Purificatio purissimæ Virginis, cum Præsentatione Domini in Templo. 5. Inuentio eiusdē Domini nostri in eodem Templo, cū iam duodecim annos natus, triduo fuisset amissus.

In secundo item Rosario ad similē meditationē accōmodantur hæc quinque Mysteria Dolorosa. 1. Agonia Domini nostri orātis in horto Gethsemani. 2. Eiusdē Domini nostri immanissima flagellatio, cū aliis plurimis & cōtumeliosis iniurijs. 3. Coronatio ipsius cū spinis, & condemnatio ad mor-

tem. 4. Quomodo idem Dominus noster suam portauerit Crucem. 5. Eiusdem pijsissimi Redemptoris nostri Crucifixio, & in Cruce expiratio.

In tertio denique Rosario alia quinque sequūtur meditādo Gloriosa Mysteria. 1. Resurrectio Domini nostri. 2. Ascensio eius in cælos. 3. Auentus Spiritus Sancti in signis visibilibus. 4. Dormitio sacræ Virginis, & tam animæ quàm corporis eius in

cælos Assumptio . 5 . Gloriosissima
eiusdem Virginis in cælis Coronatio .

Hæc olim in genere ita ordinata
esse, notissima testatur traditio, & con-
tinua Christiani populi praxis , per
quadringentos ad minùs vel quingen-
tos annos, hoc est, à tempore S. Domi-
nici, vel antea. Eiusdem quoque anti-
quitatis & authoritatis esse videtur
precariorum globulorum vsus, ad præ-
scriptum orationum numerum obser-
uandum introductus, uti ex eadem pra-
xi clarè constat. Neque sanè dubitare

quis potest , datas simul fuisse aliquas
instructiones , tum ad altissima hæc
Mysteria magis in particulari cogno-
scenda, tum ad eadem sic cognita me-
moriter retinenda . Quomodo enim
meditabitur quis de re aliqua, nisi &
eius particularem notitiam & exa-
ctam memoriam teneat? Verùm cum
istæ particulares instructiones nullibi
(ut videtur) iam extent, & precario-
rum item globulorum copia Catho-
licis

licis inter Hæreticos degentibus defit; vt vtrique defectui remedium adhiberet quidam sacerdos (in Turre Londinensi pro fide vinctus, An. 1584. & tam libris quàm precarij globulis destitutus) in quindecim præfatis Myfteriis tot annotauit particularia puncta, quot videret sufficere, vt & vnicuique Decadi (iuxta ordinariam & vſitatiffimam praxim) ſuum reſpondeat Myſterium, & ſingulis Orationibus Dominicis, Angelicis ſalutationibus, & Symbolis, ſingulæ partes applicentur: vnde & numerus orationum in integro Roſario ſine globulis exactè obſeruetur; & meditando materia copioſior, & expeditior ſuppeditetur, ac demùm mentis interea euagationes meliùs inter orandum vitentur. Iſtud autem priuatum exercitium licet valde impolitum, (non enim ad prælum ab Authore deſtinatum fuit, ſed raptim tranſcriptum, & familiaria amico donatum) ita tamen

quibusdam gratum fuit, & non inutile iudicatū, vt statim in scio authore imprimi, & plurimis cōmunicari curarēt. Adeoq; cū in manus meas (qui mentem authoris paulo meliūs cognoui) tandem peruenisset, illud in multis locis corrigendum duxi, & in eam quam voluit author formam redactum, ac Imaginibus ornatum, denūo in lucem edendū. Eritq; alijs non dubito meliora cogitantibus, hoc ipsum recudendi locus relictus, quod equidem vt fiat, exopto. Scio enim quā adhuc sit informe, & quasi abortiuum opusculū, de excellentissimo subiecto tenuissimè tractans. Nec mirum, cū nihil ferè sit simul inuentum, & perfectū. Quare si hoc ipsum luculentiūs ab alio pertractum deinceps videro, illi sanè non inuidebo, sed magnas potiūs gratias de me & omnibus promerebitur.

Hac spe fretus (propter argumenti similitudinē seu potiūs vicinitatem) addidi etiam **CORONAM** eiusdem

B. V I R -

B. VIRGINIS ab eodem S. Domini-
co (vel illius aliquo discipulo) primi-
tus institutam, ac à præfato Sacerdo-
te , consimili recitandi formula com-
positam , nunc primùm impressam, &
similibus picturis decoratam. Cuius &
nominis rationem , vsum, fructumque
si quæras , sic paucis accipe.

CORONA B. VIRGINIS dicitur,
quia totidem cōtinet salutationes An-
gelicas, quot annos ipsa **B. VIRGO** vi-
xisse putatur in hoc mundo, antequam
in cælis coronaretur , nimirum sexa-
ginta tres. Diuiditur verò in septem
partes, quarum sex sunt Decades, (sin-
gulæ enim vnā Orationem Domini-
cam & decem salutationes Angelicas
complectuntur) septima tantum ter-
nario completur numero salutationū
Angelicarum, cum Oratione Domini-
ca præmissa, & Symbolo in fine adiun-
cto. Pro istarum autem precationum
utiliori recitatione , mentisq; inter
recitandum eleuatione , tota summa-

tim B. Virginis vita, ex sacrarum Scripturarum & antiquorum Patrū testimonijs collecta, ordine historico ab iis quæ salutariē illius Conceptionē præcesserunt, vsque ad gloriosam eiusdem Coronationem, pro meditationis materia ita proponitur, vt in quantū fieri potuerit, & singulis partibus huius Coronæ, certa capita sanctissimæ Virginis vitæ; & singulis Orationibus Dominicis, Angelicis salutationibus, & Symbolo particularia puncta aptè respondeant. Itaque in prima parte proponuntur ea meditanda, quæ ad præparandū sacratissimæ Virginis aduentū, priusquā nasceretur, spectāt. In secunda, quæ pertinet ad eius Natiuitatē, & puellarē educationē. In tertia, qualiter sanctissimæ Trinitati in Filij Dei Incarnatione & Natiuitate, ipsa cooperata est. In quarta, quomodo gaudiorū & dolorum Filij sui per maiorem vitæ suæ partem particeps facta est. In quinta, quàm singulariter in Filij, sui

lij sui Passione & morte illi est cōpassa. In sexta, reliqua vitæ eius pars, mors, & in cælos Assumptio. In septima demum parte, eiusdē gloriosissimæ Virginis, supra Sanctorum omnium Angelorum choros, Exaltatio & Coronatio consideranda, & per sedulam meditationem expendenda venit.

Cū autem Christi Domini Corona seu Gloria longissimè omnium Sanctorum, etiam Matris suæ, gloriam infinitis gradibus superet, aliud quoddam Exercitium seu modus orandi & meditandi, qui C O R O N A D O M I N I noncupatur, prætermitti non debuit. Ideoque illa etiam hîc additur, non tamen dignitatis suæ, sed temporis ordine posita. Est enim instituta à sancto quodam Eremita Camaldulensi, & à Leone decimo alijsque Pontificibus approbata, & Indulgentijs varijsque priuilegijs stabilita, circa annum Domini millesimum

quingentesimum , decimum - quintum . Consistit hæc CORONA ex triginta tribus Orationibus Dominicis, (iuxta annorum numerum , quibus Dominus noster in carne mortali versatus , sibi nobisque immortalem in cælis meruit coronam) & quatuor salutationibus Angelicis, ac vno Symbolo'. Et ista in quatuor partes diuiditur , quarum tres priores Decades sunt , quia in vnaquaque decies recitatur Oratio Dominica , & semel Angelica salutatio . In quarta verò tantum repetitur Oratio Dominica, & semel Angelica salutatio , cum Symbolo semel in fine . His quoque singulis recitandis , singuli meditationis artuli, sicut in supradictis, accommodantur . In prima utique parte recollitur Aduentus DOMINI nostri in hunc mundum . In secunda, Conuersatio eius inter homines , pro nostra omnium salutari instructione. In tertia , Exitus eius de hoc mundo per
acer-

acerbissimam Mortem , pro redemptione nostra toleratam . Et in quarta , Gloriosissimus ipsius post mortem triumphus.

Accessit demum & aliud breue Rosarium quindecim Orationum Dominicarum, totidemque salutationum Angelicarum, cum vno Symbolo, in memoriam septem dolorum & octo gaudiorum præcipuorum eiusdem B. Virginis. Quod Rosarium quicumque per anni spatium quotidie recitauerit, tot in integro anno complebit Orationes Dominicas, & Angelicas salutationes, quot plagas DOMINVM nostrum pro nobis vna die sustinuisse, reuelatum esse fertur sanctæ Brigittæ.

Et hæc de ijs, quæ in hoc opusculo continentur, me satis præfatum esse arbitrarer, nisi scirem vnum vel alterum dubium moueri posse contra huiusmodi orandi modum, quæ sub huius præfatiunculæ finem soluenda perquam necessarium putavi.

Primum

Primum dubium est: Qua authoritate, quóve pio exemplo, ista orationum numeratio nitatur? Respondeo eam niti non solùm authoritate & generali obseruatione totius Ecclesiæ, à quadringentis vel quingentis annis, (quæ Catholicis omnibus abundè sufficere debet, quoniam tam vniversalis totius Ecclesiæ praxis non potest esse erronea. *1. Cor. 11. 1. Tim. 3. D. August. in Psal. 118. vers. 43. & Lactan. lib. 4. cap. 28. de diu. Insti.*) sed etiam sacrarum litterarum testimonijs, & ipsius Christi Domini, & plurimorum veterum Sanctorum exemplis frequens earundem precationum, ac sanctarum laudum, ad certum numerum repetitio commendatur & roboratur. Verbi gratia: Isaias in Prophetia sua, *Cap. 6.* & S. Ioannis in Apocalypsi. *Cap. 4.* testantur, quòd Sancta Seraphim, & quatuor animalia (seu quatuor Euangelistæ) non cessant die ac nocte, dicentia: SAN CT V S, SAN CT V S SAN CT V S, Dominus Deus omni-

omnipotens, qui erat, & qui est, & qui venturus est. Quam eandem formam Deum laudandi & confitendi in personis trinum, & in essentia vnum, obseruat continuò Ecclesia, tam in Cantico **T E D E V M**, quàm in sacrosanctæ Missæ præfatione. Item Regius Propheta (*Psal. 118.*) preces laudesque sacras septies in die Deo obtulit. Quam normam Ecclesia quoque tenet in septem Horis Canonicis. Saluator etiam in horto Gethsemani pridie Passionis suæ ter eandem

repetiit orationem, vti exactè notant Euangelistæ. (*Mat. 26. Mar. 14. Luc. 22.*) Iubet quoque idem Saluator noster *Luc 18* orationem continuare, & in illa perseuerare. Quod sanè fieri non potest, præsertim ab indoctis, nisi eadem sæpius repetatur oratio. S. quoque Bartholomæus Apostolus (*i. stante Abdia*) eenties quauis die Deum orauit. Idem S. Macharius Aegyptiacus multis annis præstitit.

Simi-

Similiter & S. Paulus Eremita, *vt refert*
Zozom. lib. 6. cap. 29. Hist. Eccl. trecen-
 ties fingulis diebus Dominum orauit.
 Ad quem numerum iustè seruandum,
 totidem lapillos in sinu suo reposuit,
 & inde post quamlibet orationem
 vnum reiecit, vt sic omnibus eiectis,
 numerum illum consuetarum precum
 completum esse cognosceret. Eodem
 planè modo, quo iam populus Chri-
 stianus certum orationum numerum
 sibi proponit, & vsu precariorum glo-
 bulorum obseruet: sicut etiam vel in
 obseruandis particularibus Mysterio-
 rum punctis in hoc libro dispositis, vel
 alijs multis modis præstari possit.

Aliud dubium est; Quo pacto hic
 modus orandi, simulque de prædictis
 fidei Mysterijs meditandi, attentio-
 nem adiuuet, vel ad orationis fru-
 ctum conducat, cùm potius vtrumque
 impedire videatur, mentem orantis
 trahendo in alias cogitationes, longè
 ab orationum recitandarum sensu, &
 verbo-

verborum genuina significatione, differentes & alienas. Ad huius dubij solutionem aduertendum est: *Secundùm D. Thomam 2. 2. q. 83. art. 13.* triplicem esse in oratione vocali attentionem, & triplicem etiam orationis fructum. Vna attentio est ad verba, ne quis in eis erret, sed vt integre ea proferat. Altera, ad sensum verborum literalem vel spiritualem. Tertia, ad finem propter quem oramus, qui debet esse gloria Dei, nostra vel aliorum salus, vel quid aliud, ad gloriam Dei spectans. Primus autem fructus orationis est mereri, secundus impetrare, tertius mentem spiritualiter & præsentialiter reficere. Respondeo igitur, ad omnes tres effectus necessariam esse primam attentionem, eatenus vt accedens ad orandum, saltem intendat eam habere. Si verò postea ex fragilitate fiat mentis euagatio, non propterea tollitur orationis fructus, sed ex virtute prioris intentionis potest oratio

oratio habere effectū suum. Idem etiā dicendum est de secunda attentione, si semel (ab iis qui lingua sibi cognita orant) adhibita deficiat. Sed inter hanc & priorem attentionem hoc est discrimen, quòd hæc, licet utilis sit, si ab intelligentibus adhibeatur, tamen simpliciter necessaria non est ad orationis fructum, neque in initio orationis, neque in progressu. Lingua enim ignota orantes eam habere non possunt, & tamen utiliter orant secundum omnes Doctores. Tertia denique attentio, qua mens in Deum & alia bona spiritualia fertur, est maximè necessaria. Hanc autem omnes (etiam in ignota lingua preecantes) habere possunt: & quandoque in tanta abundantia, ut aliarum rerum omnium obliuiscantur. Et hæc defectum, in alijs duabus attentionibus contingentem, abundè compensat: & quantum in hac vita fieri potest, spirituales mentis refectionem perficit.

Et

Et quamuis hac attentione cessante, cessat simul mentis resectio, tamen non propterea cessant alij duo effectus. Cùm enim citra voluntarium orantis consensum, pondere infirmitatis humanæ, mens ad inferiora deprimitur, non statim desinit oratio esse meritoria, vel impetratiua: multoque minùs pro peccato reputanda est quælibet inter orandum mentis euagatio, sed illa sola, quam de re vana, aut noxia, vel voluntariè quis ingruentem admiserit, vel ex proposito acciuerit, *ut docent Sanctus Thomas & Caietanus (loco citato) & ante eos S. Hugo Victorinus lib. de modo orandi. 2.* Non ergo mentem à debita attentione distrahit modus orandi in hoc opusculo propositus, neque fructus orationis impedit, sicut obiectio supponit: sed è contrà ad malas euagationes vitandas plurimùm valet. Quinimo alias multas adducit utilitates, quarum aliquæ hîc recenseri possunt.

In primis enim mens orantis hoc modo in optimam attentionem maximeque necessariam dirigitur , vt de Deo eiusque immensis beneficijs melius cogitet , si modò illa cognoscat. Qui verò minùs in Christiana doctrina instituti sunt , multa hîc particularia , eademque valde necessaria , addiscant : quæ semel cognoscentes , non possumus ea non admirari. Admiratio autem faciet attentius per meditationem inquirere . Meditatio demum maiorem pariet notitiam. Ita inuicem cognitio & meditatio se iuant & excitant . Nam sicut meditatio sine cognitione est erronea , ita cognitio sine meditatione est arida & infructuosa , sed vtræque simul mentem diuino amore accendunt , spirituali refectione pascunt , in gratiarum actionem erumpere cogunt , & desiderium excitant ad Dei gloriam promouendam , & suam aliorumque salutem procurandam.

Ex

Ex hac etiam varietate & copia Myfteriorum facilè erit deuotis mentibus, ſibi pro quacunque occasione oblata, puncta aliqua eligere, de quibus in orationibus fructuoſè meditentur. Demum, per diligentem Imaginum hîc ſculptarum inſpectionem & ponderationem, quilibet altius conſideret, & mente ruminet diuina opera & beneficia in illis repræſentata; & fortiùs fortasſe ex viſu moueri & commoueri queat, quàm ex ſola lectione moueretur.

Hac igitur deuotionis exercitatione ſi qui vti voluerint, dubitandum non eſt, quin pro laboris mercede maximum virtutis & pietatis fructum ſint percepturi. Vos ſaltem humaniſſimi in Chriſto I E S V tyrones, commilitones mei, quibus meliora adiumenta præſtò non ſunt, hoc vtimini. Et dignamini eos, qui, vt vobis ſeruirent, hoc opusculum

P R A E F A T I O .

lum ediderunt , Domino nostro Iesu
Christo , eiusdemque sacratissimæ
matri Mariæ Virgini , ac omnibus
Sanctis inter alios amicos vestros com-
mendare. A M E N .

8. Kalend. Iulij, 1599.

Vester in Christo totus,

T. VV. B.



I
Primum Rosarium B. Virginis

MARIÆ : albæ rosæ assimilatum, quin-
que continens Mysteria gaudiosa.

*In nomine Patris & Filij ✕ &
Spiritus Sancti, Amen.*



MNE quodcunq; facis (anima
mea) in verbo aut in opere, In
nomine Domini nostri I E S V
Christi, in gloriam Dei facito.

Mihi autem absit gloriari, nisi in Cruce
Domini nostri I E S V Christi.

1. *Mysterium gaudiosum.*

1. PATER NOSTER.

*Annunciat Archangelus Gabriël**B. Virgini MARIE Incarnationem Christi.*

Sanctissima Trinitas vnus Deus omnipotens, iustus, & misericors, præuidens totum genus humanum, ex altissimo dignitatis gradu, in summam calamitatem ac infinitam miseriam collapsurum, iustitiam nimirum originalem, gratiam, virtutes, dona, dotesque præclarissimas, per diuini præcepti præuaricationem perditurum; econtra verò peccatum, mortem, Dæmonis tyrannidem & damnationem æternam incursum: nec inde subleuari, aut in pristinum statum vlla hominis vel Angeli, alteriusue puræ creaturæ virtute, seu viribus, restitui posse; ex summo (qui diuinæ bonitati maximè conuenit) amore decernit, vt Filius Dei (secunda eiusdem benedictæ Trinitatis persona) humanam naturam assumat, mortem subeat, peccata mundi tollat, & humanum genus sanguini suo redimat: eosque omnes, quibus hoc sublimissimum pretium ritè applicatum fuerit, abluat, iustificet, sanctificet, & ad æternam (ad quam primùm creati fuimus) vitam perducatur.

1. *Aue Maria.*

Hunc Dei & hominum Mediatorem promittit misericordissimus Dominus, cum peccantibus poenam denuncians simul prædiceret, Semen mulieris tandem contritum caput serpentis.

2. *Aue Maria.*

Eandem Redemptoris promissionem renouat piissimus Deus Patriarchæ Abrahamo, dicens: In semine tuo benedicentur omnes Gentes.

3. *Aue Maria.*

Rursum hunc ipsum Redemptorem promittit Deus Davidi Regi, dicens: De fructu lumborum tuorum ponam super sedem tuam, & stabiliam thronum Regni eius usque in sempiternum.

4. *Aue Maria.*

Transactis ab initio mundi annis quasi 4000. Archangelus Gabriël, missus a Deo ad immaculatissimam Virginem Mariam, eam salutat, dicens: AVE GRATIA PLENA, DOMINVS TECVM, BENEDICTA TV IN MULIERIBVS.

5. *Aue Maria.*

Audiens hæc humilima Virgo turbatur in sermone isto, & cogitat sub silentio in corde suo, qualis sit ista salutatio; nihil enim minus expectabat, quam tantas de se audire laudes.

6. *Aue Maria.*

Ait ei Angelus: Ne timeas M A R I A ,
inuenisti enim gratiam apud Deum; ecce
concupies in vtero, & paries filium, &
vocabis nomen eius I E S V M.

7. *Aue Maria.*

Quærit tunc ab Angelo prudētissima
Virgo : Quomodo fiet istud, quoniam
virum (inquit) non cognosco? *perpetuam
enim vouerat Virginitatem.*

8. *Aue Maria.*

Respondet Angelus: Spiritus sanctus
superueniet in te, & virtus Altissimi ob-
umbrabit tibi. Ideoque quod nascetur
ex te Sanctum, vocabitur Filius Dei.

9. *Aue Maria.*

Et ecce Elizabeth cognata tua, ipsa
concepit filium in senectute sua, & hic
mensis sextus est illi quæ vocatur sterilis;
quia non erit impossibile apud Deum
omne verbum.

10. *Aue Maria.*

Assentit B. Virgo, dicens: Ecce Ancilla
Domini, fiat mihi secundum verbum
tuum. Statimque V E R B V M C A R O
F A C T V M E S T, & habitauit in nobis,
Deus & homo in vna diuina persona.

2. *Mysterium gaudiosum.*

*M. de Vos inuent.
Ioan. Collaert scul.*

2. PATER NOSTER.

Visitat B. Virgo MARIA
Elizabetham.

Virgo humilima , quæ modò nunciū ad se Archangelum à Deo de Cœlis missum recepit; quæ ab eodē Archangelo gratia plena salutata est; quæ Dei Filium vnigenitum Christū Dominum, mundi Redemptorē, in virgineo vtero iam concepit , Deiq; Mater effecta est, & omniū in cœlis & in terris creaturarum Regina constituta : hæc ipsa , tot tantisque modis ad excelssimum dignitatis gradum euecta , quò sublimiùs exaltatur, eò submissiùs se gerens, congruum sibi officium esse iudicat , vt ipsa iunior cognatam suam seniore , iam sex mensibus prægnantē Elizabetham visitet. Adeoq; nec propriā, intuens præminentē dignitatē, nec cognatæ suæ dedignās tenuitatē, nec itineris longitudinem aut asperitatē metuēs, nec quibusuis rebus alijs (quæ ipsam remorari possent) perterrita vel præpedita, exurgens iter suscipit in montana cū festinatione, in ciuitatem Iuda quæ vocatur Hebron. Hic ergo debes (anima mea) simul mirari tantam in Matre Dei humilitatem, & summam in virgine magnanimitatē, quæ nihil sibi in officijs pijs vel indignum vel arduum cogitat.

1. *Aue Maria.*

Ingressa sanctissima Virgo ciuitatē, in domū se confert Zachariæ; Ibiq̃ue humanissimè salutat cognatā suā Elizabethā, illi congratulans cōceptionem filij.

2. *Aue Maria.*

Vt primū audit Elizabeth salutationem Mariæ, exultat infans in vtero eius; præsentit enim ipse aduentum Saluatoris, eodemq̃; momento sanctificatur, & Spiritu sancto repletur.

3. *Aue Maria.*

Repleta quoque Spiritu sancto Elizabeth, exclamat voce magna, dicens:
BENEDICTA TV IN MVLIERIBVS,
ET BENEDICTVS FRVCTVS VENTRIS TVI.

4. *Aue Maria.*

Insper admirans Elizabeth tantā in vna Beatissimæ Virginis persona cum summa dignitate humilitatem, Et vnde hoc mihi, (*inquit*) vt veniat Mater Domini mei ad me?

5. *Aue Maria.*

Omne verò à se repellens laudem humilima Virgo, & Deo illam tribuens, ipsum cum cantico laudat, dicens: MAGNIFICAT ANIMA MEA DOMINVM: ET EXVLTAVIT SPIRITVS MEVS IN DEO SALVTARI MEO.

6. *Aue Maria .*

Elizabeth parit filium: audientes verò vicini & cognati eius, quòd ita magnificauit Dominus misericordiam suam cum illa, congratulantur ei.

7. *Aue Maria.*

Die octaua circunciditur infans, alijs autem volentibus vocare eum nomine patris sui Zachariam, instat mater vt vocetur IOANNES, tandem pater scribit: IOANNES EST NOMEN EIVS.

8. *Aue Maria.*

Apertum est ilico os Zachariæ (qui iam decem mensibus mutus fuerat, quia non credit verbis Angeli, quòd vxor eius pareret filium) & repletus Spiritu sancto prophetat, dicens: BENEDICTVS DOMINVS DEVS ISRAEL, QVIA VISITAVIT, &c.

9. *Aue Maria.*

Mirantur omnes qui hæc vident & audiunt in cordibus suis, dicentes: Quis, putas, puer iste erit? Etenim manus Domini erat cum illo.

10. *Aue Maria.*

Intemerata Virgo valedicens cognatæ suæ redit inde domū versus postridie circuncisionis pueri, vt videtur; mansit enim cum cognata quasi tribus mensibus; & hac die Ecclesia celebrat festum Visitationis.



3. PATER NOSTER.

Natiuitas Domini nostri
I E S V Christi.

Post Beatissimæ Virginis à visitatione cognatæ suæ reditum, videns Ioseph vir eius eam grauidam, quam nouit castissimam, plurimum obstupescit, dubius valde in hoc casu quid agat. Ex vna enim parte Legem timet, si sponsæ suæ aliunde & nō ex ipso grauidæ cohabitet: ex altera verò parte tam piam, tam castam, tam puram, & inculpata, in omnibus agnoscit Virginis vitam, vt nullo modo eam traducere vel in leuissimam suspicionem vocare audeat. Ipsamet autem verecundissima Virgo, hoc tantum Mysterium nemini, ne sponso quidem charissimo, indicare præsumit. Quare Ioseph, vir sanctus & iustus, vt hac se perplexitate liberet, statuit eam occultè dimittere. Verùm hæc eo cogitante, Ecce Angelus Domini apparens ei in somnis, dicit: Ioseph fili David, noli timere accipere M A R I A M coniugem tuam: Quod enim in ea natum est, de Spiritu sancto est. Pariet autem Filium, & vocabis nomen eius I E S V M. Ipse enim saluum faciet populum suum à peccatis eorum.

1. *Aue Maria.*

Iuxta edictū Cēſaris (vt describerētur ſinguli in ciuitate ſua) aſcendit Ioseph cum Maria coniuge ſua Virgine pręgnante, de Galilęa in Bethleem Iuda ciuitatem Dauid, eo quòd erant ambo de domo & familia Dauid.

2. *Aue Maria.*

Vbi propter paupertatem ſuā, & plurimorum tunc temporis cōcurſum, non inuenientes locum in diuerſorio, hoſpitantur (vt poſſint) in ſtabulo.

3. *Aue Maria.*

Parit ibi ſacra Virgo Dei ſuumq; Filiū vnigenitū, pannis eum inuoluit, & reclinat in præſepio iuxta bouem & aſinū; vt ipſorum ſpiritu vitali caleſiat, qui cunctis creaturis ſuum eſſe dat & conſeruat.

4. *Aue Maria.*

Apparens Angelus paſtoribus ait: Nolite timere: ecce enim Euangelizo vobis gaudiū magnū, quod erit omni populo; quia natus eſt vobis hodie SALVATOR, qui eſt Chriſtus Dñs, in ciuitate Dauid.

5. *Aue Maria.*

Et ſubitò facta eſt cum Angelo multitudo militiæ cæleſtis, laudantiū Deum & dicentium: GLORIA IN ALTISSIMIS DEO, & in terra pax hominibus bonæ voluntatis.

6. *Aue Maria.*

Visitant confestim pastores Infantē in præsepio, glorificantes Deum in omnibus quæ audierant & viderant. Maria autem conseruat hæc omnia conferens in corde suo.

7. *Aue Maria.*

Die octaua circūciditur puer, & vocatur nomen eius IESVS : (hoc est SALVATOR) quod vocatum est ab Angelo, prius quam in vtero conciperetur.

8. *Aue Maria.*

Tres Magi (Reges vel Principes) cognoscentes per apparitionē præfulgentis stellæ, iam natum esse Regem Iudeorum, ab Oriente veniunt Hierosolymam, ut eum adorent.

9. *Aue Maria.*

Audiens hæc Herodes Rex turbatur, & omnis Hierosolyma cū illo : Ibi tamē audiunt Magi à Principibus Sacerdotū, Christum secundum Scripturas nasci debere in Bethleem.

10. *Aue Maria.*

Euntes ergo Magi Bethleem versus, iterū vident stellam, eiusque ductu domum ingressi, proni adorant Infantem, & munera ei offerunt, Aurum, Thus, & Myrrham.

4. *Mysterium gaudiosum.**M. de Vos invent.**Ioan. Collaert sculp.*

4. PATER NOSTER.

*Purificatio B. Virginis, & præ-
sentatio Christi.*

Herodes Rex expectat reditū trium Magorum. Illis enim Ierosolyma discedentibus mandauerat, vt diligenter puerum quærerent: cumque ipsum inuenissent, renunciarent ei, vt & ille (scz) veniens adoraret eum. Sic enim prætendebat impius Hypocrita, cupiens Christum in cunabulis occidere. Magi verò admoniti à Deo, per Angelum in somnis, ne redirent ad Herodem, per aliam viam reuersi sunt in regionem suam. Interea Virgo immaculatissima, nulla licet indigeret purificatione, nec ad legis illius caeremoniam teneretur, aliarum nihilominus Matrum consuetudinem obseruatura, ad iter se accingit, paratque iuxta (imò & supra) eandem Moyse legem oblationem suam, par turturum, & duos pullos columbarum; vtrorumque enim binos offert, (quamuis alterutrum sufficisset) ob mysticas quas habent (vt docet Doctor Angelicus) significationes. Nam turtur, qui est solitarius, secretas denotat suspirantium lachrymas: columba verò, quæ est gregalis, publicas significat Ecclesiæ orationes.

1. *Aue Maria.*

Ascendit Virgo Mater Hierosolymā,
deferens eò filium suum cum oblatione,
comitante eam & adiuuante Ioseph vi-
ro suo, putatiuo patre I E S V.

2. *Aue Maria.*

Præsentat Deo in Templo sacratissi-
ma Virgo Filiū suum, iuxta legis præscri-
ptionem, die quadragesima ab ipsius
Natiuitate.

3. *Aue Maria.*

Simeō senex venerabilis, homo iustus
& timoratus, responsum iam acceperat à
Spiritu sancto non visurum se mortem,
nisi prius videret C H R I S T V M Do-
mini. i. M E S S I A M promissum.

4. *Aue Maria.*

Cū inducunt ergo puerum I E S V M
parentes eius, vt stant eum Domino,
venit in Templū (speciali Dei instinctu
ductus) sanctus iste senex Simeon.

5. *Aue Maria.*

Accipit venerandus senex à Matre
Virgine Infantem I E S V M in vlnas suas,
summoque gaudio repletur cor eius, &
tacitus spiritu exultat.

6. *Aue Maria.*

Mox vt præ gaudio loqui possit, benedicit Deum cum cantico, dicens : NUNC DIMITTIS SERVVM TVVM DOMINE, SECUNDVM VERBVM TVVM IN PACE : QVIA VIDERVNT OCVLI MEI SALVTARE TVVM.

7. *Aue Maria.*

Mirantibus Maria & Ioseph super his quæ dicuntur de puero , benedicit eis Simeon, & ait Matri : Ecce positus est hic in ruinam & in resurrectionē multorum in Israël, & in signum cui contradicetur.

8. *Aue Maria.*

Addit porrò Simeon alloquens Matrem : Et tuam ipsius animam pertransibit gladius , vt reuelentur ex multis cordibus cogitationes .

9. *Aue Maria.*

Religiosa etiam vidua nomine Anna eadem hora superueniens cōfiteretur Domino : & prophetat de puero isto omnibus qui expectant redemptionem Israël.

10. *Aue Maria.*

Vt perfecerunt omnia secundū legem Dei, domū se recipiunt incolumes & in pace : Herode nihil adhuc suspicantē hunc esse puerum quem tantopere timet, & perdere cogitat.

5. MYSTERIUM GAUDIOSVM.



5. PATER NOSTER.

*Inuentio Saluatoris in Templo,
cum triduo fuisset amissus.*

Herodes Rex, videns tandem se illum esse à Magis (ad ipsum non redeuntibus) iratus valde, missis satellitibus occidit omnes pueros, in Bethleem & in omnibus finibus eius à bimatu & infra, numero quatuordecim millia, (nec suo inter ceteros parcēs filio) qui omnes, speciali priuilegio, martyrij coronas consequuntur. Interea Ioseph admonitus ab Angelo in somnis, accipit Puerū & Matrē eius, noctēque secedēs fugit in Ægyptū. Ita impletum est illud Isaïæ vaticinium:

DOMINVS ASCENDET SVPER NVBEM LEVEM, ET INGREDIETVR ÆGYPTVM, ET COMMOVEBUNTVR SIMVLACHRA ÆGYPTI A FACIE EIUS, ET COR ÆGYPTI TABESCET IN MEDIO EIUS. Deportato enim

Christo à virgine sua Matre in Ægyptū, omnia ibi Idolorū simulachra corruunt. Manentque ibidem Sanctissimi profugi vsque ad obitum Herodis (spatio circiter sexennij) Quo mortuo redeūt in terram Israël, sed timentes Archelaum, filiū eius & successorem regnantē in Iudæa, habitant in Nazareth ciuitate Galilææ, vnde Christus vulgò N A Z A R Æ V S vocatur.

1. *Aue Maria.*

I E S V S annos natus duodecim ascendit cum parentibus Hierosolymā, iuxta annuam ipsorū consuetudinem, ad diem festum Paschatis celebrandum.

2. *Aue Maria.*

Consummatis diebus festis, cæterisq; domum redeuntibus, manet puer I E S V S Hierosolymis, nescientibus hoc parentibus eius.

3. *Aue Maria.*

Existimantes I E S V M esse in comitatu, iter diei peragunt parentes eius: vesperi illum quærunt inter cognatos & notos, sed non inveniunt.

4. *Aue Maria.*

Manè surgentes die sequenti reuertuntur Hierosolymam, ibi eum sollicitè requirentes.

5. *Aue Maria.*

Post triduum inveniunt puerum I E S V M in Templo sedentem in medio Doctorum, audientem eos & interrogantem.

6. *Aue Maria.*

Mirantur obstupefacti omnes , qui
puerum audiunt , super prudentia &
responsis eius.

7. *Aue Maria.*

Ait autem Mater eius ad illum : Fili,
quid fecisti nobis sic ? ecce Pater tuus &
ego dolentes quærebamus te.

8. *Aue Maria.*

Ait I E S V S ad illos : Quid est quòd me
quærebatis ? nesciebatis quia in his quæ
Patris mei sunt oportet me esse ?

9. *Aue Maria.*

Descendit tunc I E S V S cum paren-
tibus suis , venit Nazareth , & est illis
subditus.

10. *Aue Maria.*

Mater sanctissima hæc omnia confer-
uat alta mente reposita , sedulò de eis
meditans in corde suo.

Cæpit IESVS facere et docere.




CREDO IN DEVM PATREM.

Æterna Dei Sapiētia cū sit Dominus omnium, formam tamen serui accipiens faber habetur vulgò, & fabri filius, ac prorsus illiteratus, ad annū vsque ætatis suæ trigesimum. Quo tempore Matri valedicit, iam non ampliùs cum illa in eadem familia habitaturus. Moxque à Ioanne Baptizatus pergit in desertum. Vbi cū quadraginta diebus & quadraginta noctibus ab omni cibo corporali abstinens ieiunasset, tribus præcipuis modis à Dæmone tentatur, victor in omnibus euadēs hoste prostrato, & in verbo eius fugato. Deinde Discipulos vocat; quibuscum inuitatus ad nuptias in Cana Galileæ, ad Matris instantiam aquam conuertit in vinum. Ioanne autem in carcerem misso, palàm prædicat Dominus pœnitentiā omnibus necessariam ad regnum Cœlorum (quod nunc appropinquare docet) consequendum. Tum ex Discipulis (nocturna præmissa oratione) duodecim eligit Apostolos. Sacramentū Baptismi instituit in remissionem peccatorum, (cuius figura tantum præcessit Baptisma Ioannis) Exemplo simul & verbo veræ iustitiæ opera docet, summa beatitudinis mercede bene operantibus proposita.

Et licet propterea eum oderint, & variè persecuti fuerint Principes sacerdotum, Scribæ, Pharisei, Sadducæi, Herodiani, cæteri que omnes impii atque ingrati; ipse nihilominus cunctis benefacere perseuerat, miraculis doctrinam suam confirmat, errores ipsorum confutat, peccata arguit & reprehendit, captiosas & maleuolas interrogationes prudentissimè soluit; calumnias, etiam secretas cordium cogitationes, diuinissimè detegit; à furiosa eorundem violentia sæpe declinat, idque aliquoties miraculose. Tandem post huiusmodi, per triennium & amplius, impensam operam, cum coram tribus Apostolis transfiguratus quoque fuisset, (aliquod gloriæ suæ specimen illis ostendens) gloriosè intrat ciuitatem Hierusalém insidens, Discipulis ac turba triumphum agentibus, vestimenta quoque & ramos palmarum aliarumque arborum sternentibus in via, omnes eum vt Regem suum recipiunt ingenti cum gaudio, etiam pueri acclamantes: OSANNA FILIO DAVID, Benedictus qui venit in nomine Domini, Osanna in altissimis, O Rex Israël.

Secundum Rosarium B. Virgi-
nis MARIAE, rosæ rubeæ assimilatum,
[quinque continens Myste-
ria dolorosa.

*In nomine Patris & Filij ✠ &
Spiritus sancti, Amen.*



A Bsit mihi gloriari, nisi in Cru-
ce Domini Nostri IESV Chri-
sti: qui humiliavit semetipsum,
factus obediens vsque ad mor-
tem, mortem autem Crucis.

B

1. *Mysterium dolorosum.*

1. PATER NOSTER.

*Agonia Saluatoris orantis in
horto Gethsemani.*

Dominus Saluator noster post esum Agni Paschalis cū duodecim Apostolis, pridie Passionis suæ, surgens à cœna deponit vestimenta sua; & linteo præcinctus mittit aquam in peluim, pedes omnium Apostolorū lauat; statimq; recumbens, humilitatē & vitæ puritatem hortatus, instituit ministratq; sanctissimum Corporis & Sanguinis sui Sacramentū, & (*secundum ordinem Melchisedech*) Noui Testamenti Sacrificium, sub speciebus panis & vini: simulque instituit sanctū Sacrorum Ordinum Sacramentum, mandando Apostolis (eorumque pariter successoribus) illud ipsum facere; id est, Corpus & Sanguinem suū consecrare & offerre, donec ipse veniat iudicaturus mundum. Exit tunc Iudas foras. Dominus verò cæteros diuinissimè instruit & consolatur, Patrem inuocat, Spiritum Sanctum (aliū illis futurum Paracletum) promittit, & egressus cum vndecim intrat in hortum Gethsemani trans torrentem Cedron, locum Iudæ cognitum, frequenter enim I E S V S conuenerat illuc cum Discipulis suis.

1. *Aue Maria.*

Ingressus Dominus IESVS in hortum Gethsemani dicit Discipulis suis: Sedete hîc, donec vadam illuc & orem.

2. *Aue Maria.*

Progressus paululum, coram Petro, Iacobo, & Ioanne, cæpit IESVS pauere & tædere, aitque illis: Tristis est anima mea usque ad mortem: Sustinete hîc, & vigilate mecum.

3. *Aue Maria.*

Avulsus etiam ab his tribus, quantum est iactus lapidis, procidit in faciem suam super terram, & orat, dicens: PATER MI si possibile est, transeat à me Calix iste, verumtamen non mea voluntas sed tua fiat.

4. *Aue Maria.*

Surgens venit ad Discipulos, & inuenit eos dormientes, aitque Petro: Simon dormis? Non potuisti vna hora vigilare mecum? Vigilate, & orate, vt non intretis in tentationem.

5. *Aue Maria.*

Iterum abijt Dominus ab eis, & orat vt antè: PATER MI, si possibile est, transfer à me Calicem istum, sed non quod ego volo, sed quod tu vis.

6. *Aue Maria.*

Reuersus denuo inuenit Discipulos dormientes, erant enim oculi eorum grauati, & ignorant quid ei respondeant. Sed & Dominus ipse nunc fileat.

7. *Aue Maria.*

Rursum abijt, & orat tertio eundem sermonem, dicens: PATER MI, si non potest transire Calix iste nisi vt bibam illum, fiat voluntas tua.

8. *Aue Maria.*

Apparet illi Angelus (vel in trina, vel saltem in vltima oratione) de cœlo confortans eum. O quanta humilitas! Dominus à seruo ad agonem animatur.

9. *Aue Maria.*

Dum in Agonia prolixius orat, factus est SV D O R E I V S S I C V T G V T T Æ S A N G V I N I S decurrentis in terram.

10. *Aue Maria.*

Venit tertio ad Discipulos, & ait illis: Dormite iam & requiescite. (Pauloꝝ post) Sufficit, Venit hora: Ecce, filius hominis tradetur in manus peccatorum; Surgite, eamus; Ecce, qui me tradet propè est.

2. MYSTERIUM DOLOROSUM.



2. PATER NOSTER.

Apprehenditur Christus, crudelissime tractatur, & flagellatur.

ADhuc loquente Salvatore nostro venit Iudas Iscariotes, vnus de Duodecim, & cum illo turba multa cum laternis, facibus, gladijs, & fustibus. Cæteros verò antecedens Iudas, & ad IESVM accedens, Ave inquit Rabbi, osculatur eum, & ad lictores recedit. Qui omnes ad vocem IESV dicentis, EGO SVM, abeuntes retrosum, cadunt in terram. Surgentes verò (Deo ita permittente) manus iniiciunt in IESVM: Petrus gladio auriculam Malchi dextram amputat; quam statim Dominus restituit, & sanat; iubetque Petrum mittere gladium suum in vaginam; asserens esse Patris voluntatem, vt modò patiatur pro humano genere; alioqui se posse multas legiones Angelorū propugnatores habere, si illud magis conueniret diuinæ bonitati, & hominum saluti. Tunc Discipuli omnes relicto Domino fugiunt. Percusso enim Pastore disperguntur oues gregis.

1. *Aue Maria.*

IESVS ligatus ducitur ad Annam, deinde ad Caipham; Interrogatur de Discipulis & de doctrina: falsò accusatur, & à ministro Pontificis percutitur in facie.

2. *Aue Maria.*

Caiphas religiosè IESVM adiurat, vt dicat: An sit CHRISTVS FILIVS DEI VIV I? Respondens quòd sit, iudicatur blasphemus & reus mortis. Ac per totam noctem indignissimè tractatur.

3. *Aue Maria.*

Vilissimi serui modò in faciem Domini conspuunt, modò pugnis & palmis eum cædunt, modò velatis oculis colaphos ei incutiunt, dicentes: Prophetiza nobis Christe, quis est qui te percussit?

4. *Aue Maria.*

Interea Petrus ter Dominum negat, sed gallo canente, & IESV eum respiciente, egressus foras fleuit amarè. Principes verò sacerdotum, Scribæ & seniores populi consilio inito, IESVM mortis reū iudicāt.

5. *Aue Maria.*

Manè summi Sacerdotes cum vniuerso concilio tradunt IESVM Pontio Pilato Præsidi, & Cæsaris ibi locū tenenti. *Videns tum Iudas, IESVM à Iudæis morti iudicatum, abiens laqueo se suspendit.*

6. *Aue Maria.*

Interroganti Pilato de causa eius, respondent: Si non esset hic malefactor, non tibi tradidissemus eum. Accipite eum vos (*inquit*) & iudicate, vrgent verò ipsi vt Crucifigatur.

7. *Aue Maria.*

Tandem de tribus eum accusant, quòd gentem subuerteret, censum Cæsari dare prohiberet, & se Regem diceret: ad duo priora (*vti friuola*) nihil responderet, se autem Regem profiteretur, sed Regnū suum non esse de hoc mundo.

8. *Aue Maria.*

Audiens Pilatus Christum Galilæum esse, mittit eum ad Herodem: à quo illusus, & veste alba indutus vti stultus (tamen innoxius) remittitur.

9. *Aue Maria.*

Proponit populo Pilatus, vt vel Barabbam vel IESVM petant liberandum, petunt illi Barabbam; offert illis & IESVM; sed clamant simul omnes: Tolle hunc, & dimitte nobis Barabbam.

10. *Aue Maria.*

Cupiens Præses (salua Christi vita) Iudæos placare, facit IESVM dirissimè flagellari, donec à vertice ad plantas non maneat in eo sanitas. Plagis inflictis (*vt sanctæ Brigittæ reuelatum esse fertur*) 55. 0.

3. MYSTERIUM DOLOROSVM.



3. PATER NOSTER.

*Coronatur Dominus spinis, &
condemnatur ad Crucem.*

Post diram & ignominiosissimam Domini nostri flagellationem, ducunt eum milites in atriū prætōrij: vbi (tanquā ad ludicrum spectaculum) vniuersa conuocata cohorte, non solum Christo Domino, sed etiam toti Iudæorum Nationi (cuius Rex reputatur) insultātes, & vsurpatum Regium nomen iridentes, chlamydem coccinam (*seu purpurā aut purpuræ similem*) nudo corpori, proprijs iterū vestibus spoliato, & copioso vndiq; ebulliēte sanguine, circundāt. Tū de horrēdis acutissimisq; spinis CORONAM plectentes, tenerrimo & sacratissimo capiti eius imponunt. Et ne quid desit, quod vel dolorem vel ludibrium augeat, arundinem ponunt in manu eius dextra. Tum hisce quasi regalibus (*purpura, corona, & sceptro*) insignitum, in sublimi sede collocant, vnoq; genu flexo, scurrili voce ipsum totius mūdi Dominū salutant: AVE REX IUDÆORVM: simulq; spurcissimi illuso- res faciem eius conspuunt, ac palmis & pugnis eum diuerberant: sicuti nocte præcedente fecerant Iudæi.

1. *Aue Maria.*

Tum arundine de manu Dñi aliquoties erepta, spinas altiùs & fortiùs capiti eius impingūt, vnde plus adhuc sacri sanguinis erūpit, & super totum corpus defluit.

2. *Aue Maria.*

Pilatus falsò sibi persuadēs, tali spectaculo Iudæos moueri posse, vt cruciatibus contumelijsque illatis, tâtoque sanguine effuso satiati, desinant mortem eius expetere, IESVM rursus ad eos adducit.

3. *Aue Maria.*

IESVM ergo purpura indutū, spinis coronatū, arundinem in dextera tenentem, totoque corpore miserrimè lacerato, & proprio sanguine perfuso, ostendit Pilatus, dicitque Iudæis: ECCE HOMO.

4. *Aue Maria.*

Pontifices verò & tota turba Iudeorū, instar canum rapidorū & tigrium, acriùs clamitant, CRUCIFIGE, CRUCIFIGE eum, quasi dicant, Modò quidem tu bene cæpisti, sed perge, Crucifige, talis enim flagellatio rectè conuenit crucifigendo.

5. *Aue Maria.*

Tāta feritate cōmotus Præses, indignatus ait: Accipite eum vos & crucifigite; ego enim non inuenio in eo causam, correctum ergo dimittam: replicant illi, Debere eum mori, & debere crucifigi.

6. *Aue Maria.*

Vidētes Iudei nulla importunitate posse Pilatū induci, vt Christū crucifigat, Cæsaris timorē ei incutiūt, clamātes: Si hūc dimittis, non es amicus Cæsaris; omnis enim qui se Regē facit, cōtradicit Cæsari.

7. *Aue Maria.*

Sed & iterū Pilatus pro tribunali iam paratus Christum licet innocentissimū, sibi que pro tali cognitū, potius morti tradere, quam vt se apud Cæsarem vel in leuissimam suspicionem vocari sustineat.

8. *Aue Maria.*

Iterū ergo IESVM Iudeis ostendens, illi que exprobrās, ait: Ecce rex vester: illi autē clamāt: Tolle, Tolle, Crucifige eum, Pilatus adhuc: Regem vestrū crucifigam? Respondēt Pōtiffices: Nō habemus Regē nisi Cæsarē.

9. *Aue Maria.*

Vidēs Pilatus se nihil proficere, lauans manus corā populo, dicit: Innocens ego sum à sanguine Iusti huius, vos videritis: respondēs vniuersus populus, clamat: Sanguis eius super nos, & super filios nostros

10. *Aue Maria.*

Demū Pilatus nō rationibus nec accusationibus, sed timore Cæsaris & clamoribus populi victus, sententiam de tribunali fert huiusmodi: IESVS Nazarenus Rex Iudæorum Cruci affixus mortem subito.

4. MYSTERIUM DOLOROSUM.



4. PATER NOSTER.

*Portat IESVS suam Crucem
Caluariam versus.*

IESVM iam ad mortē Crucis cōdemna-
tum, abducunt milites à loco iudicij in
atrium: vbi vt priùs ipsi illudunt, iniurias
antea illatas repetunt, quibus & nouas
plagas superaddūt. Dum enim purpurea
veste eum exuant, ex vulneribus (quibus
cōgelato iam cruore fortiter inheret) eam
extrahant, & vestimētis suis illū induāt,
ita totum corpus affligunt, vt excoriari
potius, quàm vestem mutare videatur:
CORONAM verò spineam nō auferunt,
sed ad maiorem tum ignominiā, tum af-
flictionem, eam capiti impressam relin-
quunt, ne fortè vel nō appareat omnino
Rex esse, vel in Cruce pendenti puluinus
ei deesse possit, in quo caput suū reclinet:
Tum truculentissimam & ponderosam
CRUCEM (interea paratam) in humeros
IESV imponūt portandam, cuius vel solo
visu grauissimè torquetur mitissimus
Dominus, multo quē magis tam ingentis
trabis pondere: veruntamen super omnia
eum affligit peccatorum nostrorum (pro
quibus hæc omnia patitur) continua me-
ditatio, & præsertim nostra erga eum in-
gratitudo.

1. *Aue Maria.*

Exit ergo IESVS è ciuitate, gemens sub CRUCE scelera nostra, viam, qua pergit, sanguine signans, vt qui (sua quoque sublata in humeris cruce) ipsum sequi velint, à recto tramite non aberrant.

2. *Aue Maria.*

Occurrit ei in via Mater eius mœstissima, suam quoque per summam compassionem portans crucem : cuius ex conspectu nouus adhuc Saluatori nascitur dolor & compassio.

3. *Aue Maria.*

Fessus nimis & totus debilis Dominus noster, post tantū laborem, dolorem, & sanguinis effusione, pronus sub CRUCE in terram corruit, quasi mox moriturus.

4. *Aue Maria.*

Milites omni reiecta commiseratione & humanitate, Dominū nostrum humi prostratū cædunt, trahunt, impellunt, pedibusq; non surgentem cōculcant. Ipse, vt vermis & non homo, opprobrium hominum, & abiectio plebis, omnia mitissimè sustinet.

5. *Aue Maria.*

Verū ne moriatur in via antea quàm crucifigatur, prætereuntem quendam Simonem Cyrenæum CRUCEM pro Christo portare cogunt, per reliquū quod restat itineris.

6. *Aue Maria.*

Mulieres quædam videntes I E S V M tam indigna pati, qui nulli nocuus, multis verò beneficus fuerat, eum ex pio gratoq; affectu plangunt & lamentantur.

7. *Aue Maria.*

Conuersus ad illas I E S V S ait; Filie Hierusalê, nolite flere super me, sed super vos ipsas flete, & super filios vestros; quoniam dies venient, in quibus miserioribus erunt omnes incolæ Hierusalê, quàm nunc me esse putatis.

8. *Aue Maria.*

Deuotissima quædam mulier, nomine V E R O N I C A, sudarium ei porrigit, quo faciem tergat sudore & sanguine perfusam, fædis manibus percussam, ac impuris saluiis conspersam.

9. *Aue Maria.*

Reddit illud Dominus eidē matronæ, non maculatū (quod expectaretur) sed cū desiderabili sui ipsius (præ filiis hominum speciosi) in ipso impressa imagine.

10. *Aue Maria.*

Venit mox Saluator CALVARIAM, locū execrabilem, cadaueribus & ossibus mortuorū plenū, in quo non nisi insignes malefactores crucifigi solent. Ibi putāt multi ex sanctis Patribus sepultum fuisse Adamum primum hominem.

5. *Mysterium dolorosum.*

5. PATER NOSTER.

Crucifixio DOMINI NOSTRI
IESV CHRISTI, & morseius in Cruce.

CVM ad CALVARIÆ verticē peruē-
cum est, pro vino dulci & delectabi-
li (*quale mærentibus & morte pleētendis ad cor-
dis leuamen & virium refocillationem moris erat
præbere*) pijsimo Domino vinum acidum
myrrha & felle permixtū offerunt, quod
cū gustasset, noluit bibere. Deinde il-
lius iterū auellūt vestes, tali cum furore &
immanitate, vt vulneribus recrudescēti-
bus nouū adhuc extrahant sanguinē, to-
tumq; nudū (ne filū quidē ad regendam
quācunque corporis partē ei relinquētes)
in rigidā Crucem proijciunt, manus eius
tenerrimas ad longitudinem CRVCIS vi
magna trahentes, vnā post alteram crassis
& obtusis clauis, per venas, nernos, & of-
ficula, crebris malleorū ictibus Cruci af-
figunt; eodemque modo vtrumque pe-
dem; & ne quid ignominię tāto cruciatui
desit, inter duos latrones quasi omnibus
sceleratiorem collocant, & titulum super
caput eius apponunt, nomen, patriam, &
causam mortis continentem, Hebraicē,
Græcē, & Latinē scriptum: IESVS NA-
ZARENVS REX IVDÆORVM, & sic
Crucem erigentes in foramen (ad hoc in
petra incisum) impingunt.

1. *Aue Maria.*

Quanto cum cruciatu cuncta nunc corporis membra concutiuntur, piè hîc meditari liceat: Itemque quanti sacri sanguinis riuuli, ex quatuor hisce vulneribus, de excelsa cruce ad terram usque effluunt.

2. *Aue Maria.*

Quantus item Christo dolor sit, audire quàm plurimos etiam vilissimos homunciones summis blasphemijs se impetere, pro quibus omnibus nûc pendet in *Cruce*.

3. *Aue Maria.*

Perfectissimâ etiam charitatē Domini tui hîc contemplare, qui pro ipsis crucifixoribus orat, dicēs: PATER DIMITTE ILLIS, NON ENIM SCIUNT QUID FACIUNT.

4. *Aue Maria.*

Summam quoq; benignitatē eius erga pœnitentes meditare, qua latroni secum pendenti (*blasphemũ socium corripienti, ipsum Dominum confitenti, defendenti, & deprecanti*) plus quàm petit, promittit, dicens: HODIE MECUM ERIS IN PARADISO.

5. *Aue Maria.*

Considera insuper amorem illum, quo dulcissimam matrem & dilectũ Discipulũ sibi mutuò commendat, dicens Matri: MULIER. ECCE FILIVS TVVS, & Discipulo: ECCE MATER TVA.

6. *Aue Maria.*

Factis tenebris Christus (vt homo) seipsum Deo sacrificiū offert, summū interea perpeffus dolorē, quē tandē voce magna declarat, ELI, ELI, LAMAZABATHANI?
i. *Deus meus, Deus meus, vt quid dereliquisti me?*

7. *Aue Maria.*

Exhaustus ferè Dominus tāta sanguinis effusione, multoq; magis de vniuersis saluandis hominibus anxius, vtrumque vno voce exprimit, dicens: SITIO, quasi dicat, *sitit quidem caro mea potum, sitit vcrò Spiritus meus salutem animarum.*

8. *Aue Maria.*

Ex spongia hyssopo inuoluta bibit Dñs acetum sibi arundine porrectū, & dicit: CONSUMMATVM EST, & hoc nimirum quod restabat vaticiniū, & quidquid præterea me passurum prædictum vnquam fuerat.

9. *Aue Maria.*

Qui modò clamabat se derelictū à Deo (secundum partem sensitiuam) tamen in Patris sui protectione semper esse, hac voce declarat, PATER IN MANVS TVAS COMMENDO SPIRITVM MEVM.

10. *Aue Maria.*

Mortē preueniens, cū possit adhuc diutius viuere, sponte tradit spiritum. Illud sic adimplens quòd antea dixerat, *Animam meam nemo tollit à me, sed ego pono eam à meipso.*

Erit sepulchrum eius gloriosum.



CREDO IN DEVM

D V M admirabile hoc adimpletum est æternæ Sapientiæ Decretum, vt FILIVS DEI in CRUCE pro humani generis Redemptione moreretur, ad tam stupendū mysteriū contestandum, edidit simul eadem Dei Virtus alia multa miracula, Iudæis & Gentibus conspicua. Pendente enim in CRUCE omnium creaturarum Cōditore, inprimis ipse sol suū detrahit lumen, fiuntq; (per ipsius eclipsim) densissimæ tenebræ ab hora sexta vsque ad nonā, idque in plenilunio. Tum sponte (antequā natura cogat) animam suam ponit. Eodemque temporis momento velum Templi scinditur in duas partes à summo vsque deorsum, Terra mouetur, Petræ rumpuntur, Monumenta aperiuntur, & (*post Christi resurrectionē*) multa corpora Sanctorum, qui dormierant, apparent multis in sancta ciuitate. Cēturio & milites, qui modò eū crucifixerūt, statim post mortē confitentur coram omni populo, Quòd verè Filius Dei sit iste. Turbæ etiā Iudeorū reuertūtur percutientes pectora sua. Aperiente quodam milite latus IESV (*iam mortui*) lancea, exit sanguis & aqua. Ioseph ab Arimathia, nobilis Senator & Discipulus Christi, sed hactenus occultus propter metū Iudeorū, audacter nunc adiens Pilatum petit corpus IESV

& de CRUCE deponit. Cui in hoc pijs-
mo opere se sociū adiungit alius Iudeorū
Princeps Nicodemus nomine (qui nocte
aliquando IESVM accesserat, non ausus
id palam facere) mixturam afferens myr-
rhæ & aloës, quasi libras centum. Quæ
omnia supra vniuersæ naturę cursum di-
uinitus facta, ad confirmanda corda fide-
liū, ab ipsis Euangelistis sacris mandan-
tur litteris. Quibus & illud meritò adiū-
gi debet, quod Beatissima VIRGO MA-
TER, cū iam Filij sui corpus deplorans
accipit in vlnas, nihil tamen indecorum,
nihil summa modestia, inuicta fortitudi-
ne & heroicissima virtute indignū admit-
tit, sed & ipsa operam suam in sepelien-
do dilectissimo filio deuotè impendit. Ita
post tot tantosque cruciatus & ignomi-
nias, tandem Sacrosanctum corpus aro-
matibus conditum, & pretiosa syndone
inuolutum, honorificè reponunt in mo-
numento nouo in petra exciso, in quo
nondū quisquam positus erat, aduoluto
ad ostium saxo magno, quod etiam Iudei
permisso Pilati oblignant, & custodibus
muniūt, ne fortè (*inquiunt*) veniant disci-
puli eius, & furentur eum, & dicant ple-
bi, Surrexit à mortuis.

Tertium Rosarium B. Virginis
 MARIE, Damascenę rosę assimilatum,
 quinq; continens Mysteria gloriosa.

*In nomine Patris & Filij ✠ &
 Spiritus sancti, Amen.*



Dominus Noster IESVS Chri-
 stus factus est obediens vsque
 ad mortem, mortem autem
 CRUCIS. Propter quod &
 Deus exaltauit illum, & donauit illi no-
 men, quod est super omne nomen.

1. *Mysterium gloriosum.*

1. PATER NOSTER.

Resurrectio Domini nostri IESV CHRISTI.

SANCTISSIMA semperq; gloriosa anima Christi Domini Nostri, corpore suo in Cruce relicto, statim ad inferos, id est, ad Limbum sanctorum veteris Testamenti Patrum descendit: quorum animas, hucusque ibi in tenebris captiuas, clarissima luce & immensa lætitia ac gaudio replet, illisq; optatissimam beatitudinem (quæ in Dei visione consistit) impertit; illud ibi facto præstans, quod latroni promiserat illis verbis: *Hodie mecum eris in paradiso*. Tertia verò die, tempore antelucano, idem Dominus noster corpore rediuiuus & gloriosus prodit de sepulchro, adhuc clauso & signato. Mox verò Angelus de cælo descendens, & lapidem reuoluens ab ostio monumenti, super eum sedet. Cuius ex aspectu, pariterq; ex terræ motu eodem momento facto, exterriti custodes, fugiunt in ciuitatem, annunciantes Principibus sacerdotum & Senioribus populi, quæ facta sunt. Sed postea accepta ab illis copiosa pecunia, dicunt (sicut erant ab iisdem Iudæis edocti) Discipulos Christi nocte venientes corpus eius, ipsis dormientibus, furatos esse.

1. *Aue Maria.*

Primū apparet Dominus pijsſimæ Matri, ſoli ſemper lucernæ ardenti, ad conſolationem; Poſtea alijs ad firmandā fidem; *vt congruum putatur, cū ipſe ſingulis pro meritis largiatur.*

2. *Aue Maria.*

Feminis Dominum vncturis dicit Angelus eum reſurrexiſſe, currens Magdalena hoc narrat Apoſtolis, quibuſcum ad ſepulchrum redeunti, & cæteris reſceſſis, ſoli manenti & ploranti, apparet I E S V S; eamque remittit ad Apoſtolos.

3. *Aue Maria.*

Iterum Magdalena, & alijs duabus domum reuertentibus apparens I E S V S, *Auete, inquit, nolite timere: Ite, nunciate fratribus meis, vt cant in Galileam, ibi me videbunt.*

4. *Aue Maria.*

Apparet eadem die Petro, ad confirmandam illi fidem. Fortè & Ioanni ad conſolationem: *ipſe enim, poſt viſum ſepulchrum, Dominum reſurrexiſſe credidit.*

5. *Aue Maria.*

Apparet item Iacobo iuſto (qui dicitur frater Domini) vt veriſimile eſt eadē die. *Fertur enim eū nihil guſtaſſe à quo biberat de Calice Domini, donec Chriſtum videret reſurrexiſſe à mortuis.*

6. *Aue Maria.*

Eadem die apparet Cleophæ, & alteri Discipulo euntibus in Emaus, de eo colloquentibus, sed ipsum resurrexisse non credentibus; donec vt peregrinus inuitatus, agnoscitur in fractione panis.

7. *Aue Maria.*

Apparet eadē die decem Apostolis, cōgregatis in vna domo ianuis clausis; solo Thomā absente, qui illis non credit Dominum verē resurrexisse testantibus.

8. *Aue Maria.*

Octaua die apparet iterum Apostolis, & dicit Thomæ: Infer digitum tuum huc, & mitte manū tuam in latus meū, & noli esse incredulus, sed fidelis. Exclamat ille: DOMINVS MEVS, ET DEVS MEVS.

9. *Aue Maria.*

Apparet iterū IESVS Petro, Iacobo, Iohanni, Thomæ, Nathanaël, & duobus alijs, ad mare Tyberiadis. Constituit ibi Petrū Ecclesiæ suæ supremū Pastorē, mortemq; Crucis illi subeundam prædicit.

10. *Aue Maria.*

Apparēs quoq; in mōte Thabor, mādat Apostolis Officiū docendi, & in Ecclesiā recipēdi omnes Gētes; se semper illis affuturū promittēs, vsque ad consummationē seculi. *Hic verisimile est, quingentis fratribus visum esse; de quo S. Paulus scribit. I. Cor. 15.*

2. *Mysterium gloriosum.*

2. PATER NOSTER.

Ascensio Domini Nostri
IESV CHRISTI.

QUoties quibuscq; personis Dominus Noster IESVS CHRISTVS, inter Resurrectionem suam & Ascensionē, præter apparitiones iam dictas, apparuit, omnibus mortalibus ignotū est. Non est tamē dubitandum eum multoties apparuisse Beatissimę Virgini Matri suę, hanc consolationem præ omnibus alijs optimē merenti. Quin etiam dilectis suis famulis, Enoch & Elię (adhuc in carne mortali viuentibus) aliquoties eum apparuisse in dubiē creditur. Quòd etiam sæpius Apostolis suis apparuerit, ac familiariter cum illis versatus fuerit, non solū antiquissimi Patres, sed & sacrę Scripturę apertē testatur, affirmantes eum post Passionem suā per dies quadraginta illis apparuisse, & locutum esse de regno Dei, *id est, de Ecclesia, rebusq; in illa agendis*, plenamque potestatem Ecclesiam suam ex totius orbis terrarum Gentibus cōgregandi, regendi, & ad finem vsque seculi continuandi, & conseruandi illis tradidisse, & ad hæc omnia præstanda Spiritū sanctū promississe. Beatis interim animabus ex Limbo eductis, ipsū quocūq; iret comitantibus.

1. *Aue Maria.*

Demum quadragesima die post Resurrectionem, apparens Dominus Apostolis (*iam Hierosolymā ex Galilæa reuersis*) præcipit vt non discedant inde, donec induantur virtute ex alto.

2. *Aue Maria.*

Dicit porrò eos testes fore Passionis, Resurrectionis, & per ipsum Remissionis peccatorū in Hierusalem, & in omni Iudæa, & Samaria, & vsque ad vltimum terræ.

3. *Aue Maria.*

In monte Oliueti DOMINVS iam ascensurus in Cælum, pro vltima in terris Valedictione, eleuatis manibus suis benedicit eis; *gratiam suam (sicut sæpe fecerat) signo externo impertiens.*

4. *Aue Maria.*

Data hac benedictione, rectà in Cælum ascendit Dominus I E S V S, multis eum videntibus, donec nubes ingressus ab oculis eorum abscondatur.

5. *Aue Maria.*

Dumque intuentur eum in Cælū euntem, Ecce duo Angeli (*in virorum forma*) astant iuxta illos in vestibus albis.

6. *Aue Maria.*

Dicunt autē Angeli: Viri Galilēi, quid hīc statis aspicientes in Cælū? Hic IESVS qui assumptus est à vobis, sic veniet quē-
admodū vidistis eum euntem in Cælum.

7. *Aue Maria.*

Adorant fideles IESVM in Cælis iam regnantē, & reuertuntur Hierosolymam cum gaudio magno; gratias illi agentes, pro immensis suis beneficijs collatis, & ad animarum salutem præparatis.

8. *Aue Maria.*

Intrant Apostoli cū MARIA MATRE IESV, alijsq̃ue fidelibus, in vnum cœnaculum, & vnanimiter perseuerant in oratione; omnes simul numero ferè centum & viginti.

9. *Aue Maria.*

Petrus ibi, vt Antistes & illius collegij Primas, cæteris denuntiat eligendum esse alium Apostolum, in locum de quo cecidit Iudas.

10. *Aue Maria.*

Statutis duobus Ioseph (qui vocatur Barsabas) & Mathia, orant Deum vt dirigendo sortem ostendat, quem ex his elegerit ad Apostolatam. Cadit sors super Mathiam, & annumeratur cum vndecim Apostolis.

3. *Mysterium gloriosum.*

3. PATER NOSTER.

*Aduentus Spiritus sancti in
die Pentecostes.*

CUm sanctissima Virgo Dei genitrix plena gratia, & omnes Apostoli non solum iustificati, sed etiam multiplici præditi potestate (ut *Dæmonia eijciendi, infirmos curandi, Euangelium prædicandi, peccata remittendi, aliaq; multa faciendi*) & alij fideles iusti & pij simul cōgregati, decē continuis diebus perseuerarent orātes, pro aduentu Spiritus sancti illis promissi: quanto magis debemus nos peccatores, vasa fictilia & valde infirma, orationi & obsecrationi pœnitentiam agentes incumbere, vt vel gratiam iustificantem, vel acceptæ augmentum, consequamur. Hic autem (anima mea) ideo debeas esse diligentior, quā in alijs Mysterijs meditandis, quoniam tuus hic cōsensus, tua cooperatio, ad sanctificationē tuā omnino requiritur, quæ in creatione, redemptione, ac vocatione tua, nihil prorsus diuinū opus vel promouere vel impedire poteras: nunc verò nisi hanc tibi oblatam gratiam libere & voluntariè acceptaueris, eidemque cooperata fueris, non modò cælestem gloriam non consequēris, sed etiam maiorem tibi, pro tantis contemptis beneficijs, damnationem acquires & accumulabis.

1. *Aue Maria.*

Decima ab Ascensione die hora tertia (ab ortu solis) factus repente de Cælo sonus, tanquam aduenientis spiritus vehementis, replet totam domum in qua fideles resident orantes.

2. *Aue Maria.*

Apparent autem illis dispersitæ linguæ tanquam ignis, sedentque supra singulos eorum.

3. *Aue Maria.*

Replentur omnes Spiritu sancto, recipientes abundantissimam septem eius Donorum gratiam: nempe, Sapientiæ, Intellectus, Consilij, Fortitudinis, Scientiæ, Pietatis, & Timoris Domini.

4. *Aue Maria.*

Facta autem hac voce conuenit multitudo, & mente confusa mirantur omnes, quoniam audit vnusquisque lingua sua Apostolos loquentes Magnalia Dei.

5. *Aue Maria.*

Aliqui irridentes dicunt: Muste pleni sunt isti. Petrus prædicat IESVM CRUCIFIXVM à morte resurrexisse, in Cælum ascendisse, ac inde Spiritum sanctum misisse: & tria millia hominum conuertuntur & baptizantur.

6. *Aue Maria.*

Apostoli miraculis doctrinam suam confirmantes, iubentur sub graui poena, ne omnino loquantur de I E S V C R V C I F I X O ; sed respondent, Se debere Deum potius audire, quàm homines.

7. *Aue Maria.*

Ananias & Saphira propter sacrilegiũ verbo Petri cadunt mortui, alij curantur ab Apostolis ; etiam per vmbra[m] Petri. Ipsi verò in carcerẽ coniecti per Angelũ liberantur, & interũ docent in Templo.

8. *Aue Maria.*

Rursus apprehensi, arguũtur quòd cõtra præceptũ docuissent in NOMINE I E S V : Respondent ; Deo obediendũ esse magis, quàm hominibus ; & flagellis cæsi, gaudẽt se pro hoc nomine contumeliam pati.

9. *Aue Maria.*

Stephanus (cũ sex alijs) ordinatur Diaconus ; prædicat Christum ; accusatur de blasphemia ; & lapidatur ; sed in Cælis coronatur ; & plurimi per ipsius mortem & orationes conuertuntur.

10. *Aue Maria.*

Apostoli cõficiunt Symbolũ fidei, & in varias mundi regiones eunt prædicatum Euangeliũ. Saulus, antea insignis persecutor, conuersus & factus Apostolus, per vniuersum ferè orbẽ, prædicat Christum.

4. *Mysterium gloriosum.*

4. PATER NOSTER.

*Assumptio Deiparæ Virginis
in Cælum.*

DVm Apostoli pro tradita sibi potestate Christi Euangeliū prædicarēt, singuli præcipuè in hisce orbis Terrarum partibus: Petrus primū in Iudæa, tū in Syria, postremò & præsertim in Italia, Andreas in Achaia: Iacobus maior in Hispania: Ioānes in Asia: Thomas in India: Iacobus minor in Ierusalē: Philippus in Thrygia: Bartholom. in Scythia: Matthæus in Æthiopia: Sīmon in Persia: Thaddæus in Mesopotamia: Mathias in Palæstina: Paulus in vniuerso quasi orbe: vbiq; Domino cooperāte & sermonē cōfirmāte sequētibus signis: totaq; Ecclesia omniū virtutū splēdore vigeret: Beatissima Virgo MARIA Dei Mater, licet adeò rerū diuinarū tam infusa quā experimentalī abundaret sciētia, vt ipsos Euāgelistas plurima edocuerit Mysteria, sibi præ alijs omnibus cognita & perspecta; tamen cū femina sit, & omniū creaturarū humilima & modestissima, neque palā prædicat, neque cum multis versatur, sed in priuato statu Virginitatē perpetuā cæterasq; virtutes obseruās, optimā illam contēplatiuam vitæ partem persequitur, quā ab infantia elegerat, didicerat, & diligenter exercuerat.

1. *Aue Maria.*

Mūdanis ergo curis liberrima Deipara virgo, diuinis meditationibus assidue vacat, *procurante illi omnia ad vitam necessaria Ioanne Apostolo, cui à Domino in Cruce commendata fuerat.*

2. *Aue Maria.*

Post quindecim annos ab Ascensione Domini, diuinitus reuelatur Virgini Matri, quòd iam mortis debitum soluens, ad gloriosissimam Filij sui fruitionē in Cælos perueniet.

3. *Aue Maria.*

Supplex tunc petit Dei Mater eundē Dominum Filium suum, vt dignetur ei Apostolorum suorum conspectum præstare, antequam ex hac vita decedat.

4. *Aue Maria.*

Vniuersi Apostoli momento tēporis in sublimē elati, cōueniunt Hierosolymis ad Virginem Visitandā, exceptis S. Iacobo (iam pro Christi gloria occiso) & Thoma, qui speciali Dei prouidentia paulo tardiùs accedit.

5. *Aue Maria.*

Congregatis itaque Apostolis, alijsque Apostolicis viris, in manus Dei sanctissimum tradit spiritum; ingenti eam cælestium agminum circumfulgente lumine, & in Cælos euolantem, comitante.

6. *Aue Maria.*

Sacrum verò corpus, quod ineffabili modo Deum in vtero conceperat, Angelica simul & Apostolica cū Psalmodia (*suauissima Harmonia*) Ghetsemani deponitur in loculo honorifico.

7. *Aue Maria.*

Quo in loco permanet per tres integros dies, Chorus illi Angelorū Psalmos, Hymnos, & Cantica spiritualia canentiū, & Deum in Matre sua laudantium.

8. *Aue Maria.*

Post tres dies, Angelorū cantu cessante, venit Thomas Apostolus, qui deuotissimo flagrans desiderio, sacrum corpus Virginis videndi & venerandi, illud sibi licere à Coapostolis obnixè petit.

9. *Aue Maria.*

Volentes ergo cæteri Apostoli hanc Thomæ præstare gratiam, loculum aperiunt: sed præterquam sancti funeris linthea, ibidem dulcissimè redolentia, aliud nihil inueniunt.

10. *Aue Maria.*

Neque aliud iudicare possunt tot tantique oculati testes, quàm immaculatum Virginis corpus incorruptum in Cælum singulari priuilegio assumptum esse; & hoc ipsum tam speciali Dei prouidentia sibi declaratum.

5. *Mysterium gaudiosum.*

5. PATER NOSTER

*Coronatio gloriosissimæ Virginis
Deiparæ Cælorum Reginae.*

R Estituuntur Apostoli in regiones illas unde delati erant, à quibus sicut & ab alijs Apostolicis viris, cū Beatissimæ Virginis dormitio, & in cælos Assumptio, ubique torrarū annuntiata fuerit, cœpit indies illud eiusdem DEI MATRIS magis magisque adimpleri vaticiniū, de se dicentis: EX HOC BEATAM ME DICENT OMNES GENERATIONES: tota quippe deinceps Christi Ecclesia, per orbem terrarum diffusa, solemnissimè celebrat non solū sacratissimæ eius animæ de terris in cælos migrationem (sicut aliorū Sanctorum) verū etiam eiusdem Virginis corporis Resurrectionem, Assumptionem, & Glorificationem in cælo ipso empyrio, vbi iam clara perfectā & omnibus modis absoluta Dei visione in summo beatitudinis post filium suum gradu fruitur, augustissima Cælorum & omnium Beatorum Regina constituta: & diademate illo ornata, de quo præcessit figura, dum Salomon in occursum matris progressus, & sibi à dextris in Throno sedere faciens, ait: *Pete (quæ volueris) mater mea: neque enim fas est vt auertam faciem tuam.*

1. *Aue Maria.*

Coronatur Regina Sanctorum coniugum, aliorumq; Confessorum, & sanctorum Angelorum, quia in maritali statu virginalem obseruans puritatem, diuina nihilominus prole exstitit fecunda.

2. *Aue Maria.*

Coronatur Regina Sanctarum Viduarum, & Archangelorum; quia & Archangelum recepit nuncium vt Dei Filium conciperet; & Filio simul ac coniuge orbata, Virgo, Mater & Vidua fuit omnino afflictissima.

3. *Aue Maria.*

Coronatur Regina Virginum, & Angelicorum Principatum; quia tantum ceteris omnibus virginali puritate praeluxit, quantum Regina suis subditis dignitate praeeminet.

4. *Aue Maria.*

Coronatur Regina omnium Religiosorum, & Angelicarum Potestatum; quia per virginитatis votum, ordinariam conceptionis viam excludens, concepit ex Spiritu sancto, humani generis Redemptorem.

5. *Aue Maria.*

Coronatur Regina Euangelistarum, & Angelicarum Virtutum; quia ipsos Euangelistas multa diuina Arcana docuit, postquam Deum (*qui solus per se miracula facit*) in utero concepit, & mundo edidit.

6. *Aue Maria.*

Coronatur Regina Episcoporum, & Angelicarum Dominationum, quia ipsum celestem panem toti mundo præbuit, dum per suum specialem consensum S. Trinitatis de VERBO incarnando decretum confirmavit.

7. *Aue Maria.*

Coronatur Regina SS. Patriarcharum, & Thronorum; quia verum Deum hominem Virgo semper existens concepit, & novem mensibus in utero unum & eundem Dei & suum Filium portavit.

8. *Aue Maria.*

Coronatur Regina Prophetarum, & Sanctorum Cherubin; quoniam omnia Mysteria illis reuelata perfectissime cognovit, imò plura (*Matris privilegio*) quam quævis alia creatura, in se persensit.

9. *Aue Maria.*

Coronatur denique Regina SS. Martyrum, Apostolorum, & ardentium Seraphin; quoniam illos omnes longè superavit in ardentissima charitate, qua ipsi alios omnes Dei famulos præcipuè excellunt.

10. *Aue Maria.*

Quæ ergo omnibus tum hominum tum Angelorum Ordinibus gratia præluxit, ipsædem gloria præfulgens, ab excellentissimo Filio Mater, excellentissima cæterarum omnium creaturatum, Regina coronatur.

Omne iudicium dedit Filio: quia Filius Hominis est.



CREDO IN DEVM.

G Ratias nunc & semper age (anima mea) Benedictissimæ Trinitati, vni trinoque æterno Deo, qui te secundum sui ipsius creauit imaginem, vt illi seruiens cæleste ipsius regnum hæreditares, eiusq; beatifica visione in æternum fruereris; quique ad te redimendam, sibi-que reconciliandam, cum per peccatum inimica ei facta esses, vnicum misit Dei Filium, qui humanam assumens carnem, ex Virgine natus, plurimas maximasque per totam vitam tribulationes, & tandem acerbissimam, modisque omnibus longè ignominiosissimâ, in Cruce passus est mortem, pro tua redemptione; Tertia die Resurrexit, pro tua iustificatione; quadragesima verò sequenti die in cælos Ascendit, pro tua glorificatione, qui etiam die ab Ascensione decima, *i. in die Pentecostes*, Spiritum Sanctum, Tertiam eiusdem superbenedictæ Trinitatis Personam (*qui à Patre Filioque procedit, consubstantialis, coequalis, & coæternus Deus*) de cælis in terram misit, vt tibi hæc (quam tam carè comparauerat) applicetur medicina. Huius etenim Spiritus Sancti gratia (quam tu nullo modo mereri poteras) te ouem perditam in ouile suum

suum reduxit , Ecclesiæ suæ Catholica
adiunxit , adeoq; multorum Sacramen-
torum ac sanctorum Charismatum, om-
niumque meritorum , atque orationum
conseruatorum tuorū in hoc seculo, item-
que omnium cælestium ciuium , ipsius
etiam cælorum Reginę participem fecit,
à peccatis te abluens & sanctificans. Qui
etiam Redemptor tuus, te denuo relap-
sam & sæpissime peccantem nō permisit
hucusq; in peccatis tuis mori, (sicut iustis-
simè commerita es) sed per gratiam suā, &
peccatorum tibi veniam & sanctifica-
tionē pollicetur, modò ipsa eam ample-
cti volueris , etiam hoc ipso momento,
nisi tu eius gratiam à te repellas ; ac de-
num, si modò in finem vsque in Dei ob-
sequio perseueraueris, tibi (anima mea)
breui post exitum , & tui gratia,
etiam corpori meo, in generali
iudicio (cū omnis caro
resurget) inestimabilem
dabit gloriæ coronā,
& vitā æternam.

A M E N.

Corona B. Mariæ Virginis incomparabilis : Cum particularibus punctis in eius recitatione meditandis.

In nomine Patris & Filij ✝ & Spiritus sancti, Amen.



R

Ecogita (anima mea) Passionem Domini Nostri IESU Christi, & Compassionē Beatissimæ Virginis Matris : Illis

& tu compatere, vt cum eis glorificeris.

D

In sudore vultus tui, vesceris pane tuo.



1. PATER NOSTER.

Priuilegia quædam incomparabilis Virginis ante Natiuitatem.

E Adem Dei SAPIENTIA, quæ ante omnia secula ad redimendum genus humanū à captiuitate peccati & damnationis (*in quam per delictum Adami omnes cecidimus*) MESSIAM. I. CHRISTVM Dominum nostrū definito tēpore incarnandū, & in hunc mundum venturū ordinauit: simul etiā decreuit VIRGINEM quandam paulo antè nascituram, alijs omnibus creaturis etiam Angelicis, gratia, puritate, & sanctitate præcellentem; quæ & eiusdem Redemptoris Mater sit futura, & eidem cooperando tantum nobis (multoque plus) prodesset, quàm Euā, occasionem peccandi Adamo præbendo, nocituram præuidit. Vnde licet vehemēter quidem nobis vir vnus & mulier vna nocuere, per vnum nihilominus virum & mulierem vnā omnia restaurantur, nec sine magno fœnore gratiarum. Excedit enim damni æstimationem beneficij magnitudo, dum clementissimus Deus quod quassatū est non confringēs, sed in melius omnino reficiens, pro terrestri Adamo dedit nobis Christum Redēptorē, & pro veteri Eua, Dei Matrem.

1. *Aue Maria.*

Hanc singularem virginem promittit misericors Deus statim post humani generis lapsum, denunciās inimicitias fore inter mulierem & serpentem, sed ipsam tandem contrituram caput serpentis.

2. *Aue Maria.*

Prima femina etiā post peccatū (*cū iam esset mater morientium*) vocatur Eua, *i. mater viucentium*, in figura Beatæ huius Virginis, quæ futura est mater Dei, Authoris vitæ.

3. *Aue Maria.*

Præfiguratur quoque per Saram, Rachælem, Annam, Elizabetham, aliasque diu steriles, sed tandem insignes matres: hæc enim omnium insignissima, semper permanens Virgo, Deum pariet & hominem, creatura suum Creatorem.

4. *Aue Maria.*

Hanc eiusdem sacræ Virginis fœcunditatem significant rubus Moyfi, virga Aaronis, vellus Gedeonis, Arca fœderis, speculū sine macula, hortus conclusus, & aliæ multæ veteris Testamenti vmbre.

5. *Aue Maria.*

Propter alias autē præcellentes in omni genere virtutū, præfiguratur hæc Virgo per Rebeccam, Mariam Moyfi sororem, Deboram, Iaël, Iudith, Esther, aliasque personas & res plurimas.

6. *Aue Maria.*

Eandem sacratissimam Virginem clarissimè prænunciant Prophetæ; Egredietur Virga de radice Iesse; Virgo concipiet & pariet Filium; Femina circumdabit virum; & id genus alia.

7. *Aue Maria.*

Egregiè & apertè describitur hæc singularis Dei sponsa in Canticis; Liliū inter spinas; Tota pulchra, in qua macula non est; Pulchra ut Luna; Electa ut Sol; Stella maris, &c.

8. *Aue Maria.*

De hac quoque mirabili virgine Sybillæ (Dei apud Gentiles prophetissæ) ita canūt: *Iam redit & Virgo, redeunt Saturnia regna: Iam noua progenies cælo demittitur alto, Chara Dei soboles.*

9. *Aue Maria.*

Concipit Anna Ioachimi vxor diuino munere, post viginti annorum sterilitatem, hanc toties promissam, præfiguratam, ac prænunciatam Virginem, Dei Matrem præelectam.

10. *Aue Maria.*

Hæc, vnà cum animæ infusione (ne vnquam peccati rea, Dei inimica, iræ filia, & Dæmonis serua existat) ab originali labe (singulari priuilegio) a multis piè putatur præseruata, & Spiritus sancti gratia repleta.

Quæ est ista quæ progreditur quasi aurora consurgens.



2 . PATER NOSTER .

*Natiuitas B. Virginis, & vita
eius vsque ad desponsationem.*

SIcut aurora noctis fugans tenebras, præter illam quã mundo affert lucem maiorem instare prænunciat: sic Saluatoris ortum (qui est lux vera illuminãs omnem hominem venientem in hunc mundum) diuina ordinatione præcedit rutilãs illa aurora, clarissima virgo MARIA, & veri illius luminis per excellentissimas suas virtutes prænuncia, & per singularem gratiam eiusdem Mater futura. Hæc enim est illa singularis Dei SPONSA, quæ multis retro seculis, Regijs suis patribus est repromissa; Mysticis præfigurata miraculis; & Oraculis pronunciata prophetis; Quæ ex benedicto Patriarcharum semine, & præclaro Prophetarum germine, ac sacra Sacerdotali stirpe, generosa quoque Regali progenie, inelyta virtutis Dei Virga, insignis VIRGO processit sine macula. Quæ omni splendore purissimæ sanctitatis sic debuit præfulgere, quoniam ipsum totius sanctissimæ Generositatis fontem & florem, principium & finem, meruit germinare.

1. *Aue Maria.*

Vocatur hæc Virgo M A R I A. i. Mare amaritudinis, Myrrha maris, Doctrinæ & Domina maris, & Exaltata, quo vno nomine varia notantur illi euentura, læta, tristia, & gloriosa.

2. *Aue Maria.*

Cum primum (ad rationis usum perueniens) de Deo audit, serio de immenso illo Numine cogitans, illique se consecrans, totam vitam in eius obsequio, sine vlla vel leuissima offensa, transigere firmissimè proponit.

3. *Aue Maria.*

Triennis præsentatur à parentibus in Templo, vbi illud promptissimi ad perpetuum Dei obsequium animi specimen præbet, quod ipsamet, nullius hominis ope nixa, quindecim Templi gradus strenuè ascendit.

4. *Aue Maria.*

A prima luce ad horam diei tertiam diuinis Officijs incumbit. Inde ad sextam opera tractat manualia. Mox à cibo (parcissimè sumpto) lectioni sacræ reliquum diei tempus sedulo impendit.

5. *Aue Maria.*

Omnes quidem in ea elucet virtutes, sed præcipuè humilitas, obedientia, prudentia, modestia, grauitas: Item fides, spes, charitas, & mundi contemptus.

6. *Aue Maria.*

Virginitatis verò virtutē, mūdo hactenus incognitā, non modò vnice colit, sed etiā ad eā perpetuò seruandā, voto se obstringit; & ne quid perfectioni suæ desit, paupertatis & obediētię vota superaddit.

7. *Aue Maria.*

Est hæc inter pudicas pudicissima, inter bonas optima, inter sapientes sapientissima, & sola inter omnes ipsam religiosi status perfectionem plenè assecuta.

8. *Aue Maria.*

Ad eam etiā diuini consilij cognitionē pertingit, vt inter alia mysteria, ipsi diuinitus reuelata, Deū intelligat ex Virgine nasciturum, & mundum per mortem Crucis redempturum.

9. *Aue Maria.*

Nihil nunc prius in votis habet, quàm vt REDEMPTOREM illum aliquando videat, eiusque Augustissimæ MATRIVIRGINI humilimum famulatum præstare sibi liceat.

10. *Aue Maria.*

Cura Sacerdotum despondetur sacra Virgo, Ioseph pio iuueni. Cui cum illa suum de Virginitate perpetuò seruanda nunciet votum, mox ille diuino instinctu & huic assentit, & simile ipse votū continentię emittit.

Fecit mihi magna qui potens est.



M. de Vos invent.

Ioan. Collaert sculp.

3. PATER NOSTER.

*Annunciatio, cum alijs Myſterijs,
uſque ad Purificationem.*

C Ompletis omnibus quæ aduentum
M E S S I Æ præcedere debebāt, mittit
superbenedicta Trinitas legatum ſuum
Archangelum Gabriëlem ad M A R I A M
Virginem, tribus præcipuè (*ut videtur*) de
cauſis. Primùm, ut illi ex parte Dei om-
nipotentis, Cæli terreꝯ; & omniũ quæ in
eis ſunt conditoris, annunciet, quòd ipſa
Filium Dei, hoc eſt, Æ T E R N I P A T R I S
V E R B U M, ſecundam eiſdem Sanctiſſi-
mæ Trinitatis perſonã, M E S S I A M iam
diu promiſſum, humani generis Redem-
ptorem, in ſuo vtero cõcipiet, & mundo
pariet: Deinde, ut eiſdẽ Virginis, ad hoc
ineffabile opus perficiendũ, aſſenſum po-
ſtulet; ſine quo diuina Sapientia idipſum
completum noluit. Tertiò, ut Angelico toti
mundo innotefcat testimonio, hoc quod
nunc affertur, tam Angelis quàm homi-
nibus gaudium magnum. Hodie enim
Angeli C A P U T recipiunt, per quod rui-
nas ſociorũ ſibi in humano genere replẽ-
das vident. Homines verò R E D E M-
P T O R E M ſuſcipiunt, per quem totum
ſuum genus à Dæmonistyranide libe-
randum agnoſcunt.

1. *Aue Maria.*

Ingressus Angelus ad Virginē, toto corde orationi intētam, ita eam salutat: AVE GRATIA PLENA, DOMINVS TECVM, BENEDICTA TV IN MVLIERIBVS. Turbatur illa huiusmodi sermone, quo se audit tantis laudibus extolli.

2. *Aue Maria.*

Ait ei Angelus: Ne timeas MARIA, inuenisti enim gratiam apud Deum. Ecce concipies & paries filium, & vocabis nomen eius I E S V M. Hic erit magnus, & Filius Altissimi vocabitur.

3. *Aue Maria.*

Quærit prudens Virgo (*cum iam perpetuam vouerat Virginitatem*) quo nam modo filium concipiet? respondet Angelus: Spiritus sanctus superueniet in te, & virtus Altissimi obumbrabit tibi.

4. *Aue Maria.*

Respondente Virgine: ECCE ANCILLA DOMINI, FIAT MIHI SECVNDVN VERBVM TVVM. Filius Dei fit Filius hominis, & ipsa sacra Virgo, Dei Mater.

5. *Aue Maria.*

Visitat mox Virgo prægnans Elizabetham quoque prænantem, Exultat in vtero Baptista Christum præsentem per sentiēs. Et exclamat Elizabertha, tantam Dei Matris humilitatem Admirans.

6. *Aue Maria.*

Post tres Menses domū redit sanctissima Virgo: Quam Ioseph pregnantē videns, anxius quid agat, ab Angelo discit, eam de Spiritu sancto concepisse. Et sic ei vt antea cohabitāt, & necessaria parat.

7. *Aue Maria.*

Iuxta edictum Cæsaris, ascēdit Ioseph cum Maria Bethleem. Ibi nascitur Christus Dominus. Reponitur in præsepio. Angeli canunt. Pastores Infantē visitant, Et Deum laudibus efferunt.

8. *Aue Maria.*

Octaua die circūciditur puer, & vocatur nomen eius IESVS, *nomen quod est super omne nomen. Verè oleum effusum nomen istud. Deus enim dando nobis SALVATOREM, quasi totam in nos effundit suam largitatem.*

9. *Aue Maria.*

Magi vidētes stellā fulgentē & peregrinam veniunt Hierosolymā, Regem quērentes Iudeorum: Bethleem hunc inveniunt, supplicesque adorant, & munera ei offerunt, Aurum, Thus, & Myrrham.

10. *Aue Maria.*

Virgo purissima Purificationis ceremoniam (*ad eam non obligata*) obseruat, Filium in Templo præsentat: Quem Simeon lætus in vlnas suscipit, Deū laudat, & matrem de futuris doloribus præmonet.

Virgula ex aromatibus myrrhæ et thuris.



M. de Vos invent. Iuan. Collaert sculp.

4. PATER NOSTER.

*Præcipuæ tribulationes & conso-
lationes sacræ Virginis, à Purificatione
vsque ad Passionem Christi.*

DVM Herodes Christū in cunabulis occidere quærit, iubetur Ioseph ab Angelo, sibi in somnis apparente, vt in Ægyptū cum Puero & Matre eius fugiat. Qui confestim surgens, & eadē nocte sedens, in Ægyptū transit. Vbi ad suam & Filij vitā sustentandā, aliquid sacro Virgo acquirit colo & acu, aliquid pius Ioseph sua arte fabrili lignaria, de reliquo elemosynā recipiunt ab incolis, quantū paupertati suæ sufficiat. Habentes enim alimēta & quibus regantur, his cōtentissimi viuūt. Etenim tā in exilio isto Ægyptiaco, quā ante & post illud, in hac sancta familia cū summa pace, sanctissima semper viget cōsentio. Quelibet enim persona se summè humiliās, cæteris vult esse longè inferior. **I**B s v s cū sit Cæli & Terræ Dñs, patri tamen putatiuo, pariterque Virgini Matri, subditus degit. Virgo Mater dū Filiū nutrit & curat, eundē simul Deū suū agnoscit, & maritum vt Dñm & caput suū honorat. Ioseph quoq; dum vtrunq; in rebus agendis dirigit & iuuat, Filiū tamen vti Cælorum Regē, & Matrem eorundē Reginā, supplex semper veneratur.

1. *Aue Maria.*

Mortuo Herode Ioseph (iussus ab Angelo in somnis) redit cū Puero & Matre eius in terrā Israēl. Sed timentes Arche-laum filium Herodis regnantē in Iudæa, habitant in ciuitate Nazareth Galilæe.

2. *Aue Maria.*

Iesus annos natus duodecim manet post Pascha Hierosolymis in scijs parentibus. Qui putātes eum esse in comitatu, ibi non inuentū, tristes Hierosolymam reuertuntur ipsum quæritantes.

3. *Aue Maria.*

Post triduū inueniunt eum in Templo sedentem in medio Doctorū, eos audientem & interrogantem. Tum Matri causam absentiæ petenti respondet; Oportere se esse in his quæ Patris sui sunt.

4. *Aue Maria.*

Anno ætatis suæ trigesimo valedicit Dominus Matri suæ, iam non ampliùs cū ea habitaturus. Breuique post (ut videtur) Ioseph mortem obit, & cōhabitat Virgo vidua alijs cognatis.

5. *Aue Maria.*

Baptizatur Dñs à Ioanne. Ieiunāt quadraginta diebus in deserto. Vocat Discipulos. Et post anni circulū inuitatus cum Discipulis ad nuptias, Matre eum rogante, conuertit aquam in vinum.

6. *Aue Maria.*

Diuinas Filij conciones pia Mater deuotissimè audit. Miracula etiam vider. Varios hominum affectus obseruat. Et de omnibus assiduè meditatur.

7. *Aue Maria.*

Deuotione accensa quædam mulier, ex sermone Domini, in illius pariterque Matris laudes prorumpens, clara voce interpellàs ait: Beatus venter qui te portauit, & vbera quæ suxisti.

8. *Aue Maria.*

Dñs (*maiolem addens laudem*) respondet: Quinimo, beati qui audiunt verbū Dei, & custodiunt illud, *quasi dicat*: Beata quidem quæ me genuit & nutriuit; *sic sola beata Mater mea*, sed beatiore, qui Dei verbum audiunt, & custodiunt; & *sic beatissima Mater*

9. *Aue Maria.* (*mea.*

Videns Mater multa hominum millia Filiū suum sequi & admirari, aliosq; non paucos ipsius mortem machinari, ipsa in omnibus æquabilis persistit, maiora his in utroque genere futura cognoscens.

10. *Aue Maria.*

Dum turba & Discipuli Dñm Hierosolymam ingredientem gloriosè suscipiunt, & Regem salutant, sola Virgo de Passione meditatur, quā paucis post diebus subiturus est idem suus & Dei Filius.

Tuam ipsius animam pertransibit gladius.



5. PATER NOSTER.

*Compassio B. Virginis, in Passione
Dei sui que Filij.*

Q Vale omnium virtutum Sacrarium fuerit Beatissima virgo, tum in tota vita, tum maximè Christo Domino moriente, omnibus innotescit. Præ cæteris verò virtutibus in illa nunc prælu-
cet (*quæ aliarum omnium Domina & Regina est*) ardentissima charitas. Quam neque multorū in Filium suum immane odium, neq; nequissimi Iudæ proditio, neq; totius Iudaici populi (imò totius mundi) ingratitude, quouis modo labefactare minuerēve possit; sed ecōtra omnino his ipsis de causis, huius erga omnes adaucta charitas in immensum crescit. Quo enim longiùs peccatores à sua aberrare salute videt, eo magis pijsissima Virgo ipsorum omnium salutem sitit. Ideoque & doloris gladium suam ipsius animā pertransituum parui facit, & quia nec mors sua (*quā obire parata est*) humano generi redimendo sufficiat, Filio suo vnico, longè optimo & charissimo, non parcens, (*sicut nec Pater celestis eidem parcat, nec ipsemet sibi Filius*) eum pro nobis vltro ad omnem illam offert Passionem & Mortem, quam ab eo strictissima Dei Iustitia pro vniuerso mundo exigit tolerandam.

1. *Aue Maria.*

Orante Domino in horro Gethsemani, Mater eius domi orans spiritu videt, & mox à discipulis fugientibus audit, Filiū suum ab hostibus captū esse, funibus vinctum, & ad Annā & Chaiphā ductum.

2. *Aue Maria.*

Videt porrò spiritu, quod & manè audit, Filiū suū falsò esse accusatū, à vilissimis ministris cēsum, variè illusum, per totam noctem crudelissimè tractatum, & à Iudæorū concilio reū mortis iudicatum.

3. *Aue Maria.*

Manè intelligit Filiū suum Pilato esse traditū; ad Herodē quoq; missum, indeq; remissum; postea miserrimè flagellatum, spinis coronatum, & tandem Pilati sententia ad mortē Crucis condemnatum.

4. *Aue Maria.*

Exiens tunc afflictissima Mater cū Iohanne & alijs occurrit Filio, sacro suo sanguine per totum corpus perfuso, spineam coronam in capite, & Crucem in humeris, portanti.

5. *Aue Maria.*

Videt ibi Filiū suū sub Cruce (*præ corporis nimia inbecillitate*) pronum in terram cadentē, nec ita tamen mori permissum. Alius enim, ne ipse in via nondū crucifixus moriatur, Crucē pro illo ferre cogitur.

6. *Aue Maria.*

Vidit mox Filium suū totum nudum, rigidæ Cruci per manus & pedes clavis confixum, in altum erigi; & sacratissimū sanguinem ex quatuor illis vulneribus (instar tot fluminum) in terram vsque effluentem.

7. *Aue Maria.*

Audit tum Filium suum pro ipsum cruci-
gentibus & blasphemantibus orare; la-
troni pœnitenti paradisum promittere; & se
afflictissimam Matrem, ac dilectum Discipulum,
sibi mutuò commendare.

8. *Aue Maria.*

Audit tandem Filiū suum querentē, Se
omni solito Dei solatio esse destitutum; Siti op-
pressum; Omnia consummata esse affirmantem;
& spiritū suū in manus Patris commendantem.

9. *Aue Maria.*

Nouum adhuc videt mœstissima Mater
in latere Filij lācea militis infligi vulnus;
vnde nouissimus vnā cū aqua effluit san-
guis. Nec tamen discedit, donec sacrum
Corpus de Cruce deponi videat.

10. *Aue Maria.*

Accipit demū corpus emortuum & ex-
angue in vlnas suas: Quod cū aliquā-
diu cōtemplata sit, ab ea rursus aufertur,
in sepulchro reconditur, obseratur, & à
militibus, ne inde tollatur, custoditur.

Conseruat omnia verba hac conferens in corde suo.



M. de Vos inuent.

J. Collaert sculp.

6. PATER NOSTER.

*Acta B. Virginis à Resurrectione
Christi ad suam Mortem & Assumptionem.*

Peracto sacratissimæ Passionis Christi mysterio, dū alij huc alij illuc, prout diuersissimè afficiuntur, cursitant, & plerique omnes de Domini Resurrectione vel plurimum hæsitant, vel penitus desperant, sola intemerata virgo firmissimè credit, & nullatenus dubitat, ipsum tertia die resurrecturum à mortuis. Vnde cubiculum ingressa, mox vt vulnera Filij ac Domini sui, cæteraque iam exacta mysteria, & tormèta ab illo tolerata, paululum lamentata est, finem tandem tragico isti actui apud se imponit, & quæ nunc à Filio suo geruntur, mente considerat. Ad sepulchrum ergo se conuertit, ibi Deum suum adorat; carnem quippe humanam licet inanimatam, tamen Diuinitati perpetuò coniunctam, ab omni etiam corruptione liberam, moxque resuscitandā & glorificandam, contemplatur. Tum in infernū respiciens, Filiū eundemque Deū suum intuetur, in limbo fugatis tenebris resplendentem; deuicta morte triumphantem; captiuitate soluta captiuos liberantem; & ipsum limbum sua diuina præsentia, Paradisum efficientem.

1. *Aue Maria.*

Die tertia Dominus noster rediuiuus & gloriosus apparet dulcissimæ Matri. Hoc ei primum impertiens gaudium, quæ & illi tam natura quàm gratia coniunctissima, & in eius Passione plus omnibus est compassa.

2. *Aue Maria.*

Ascendenti in cælos Filio, & ad Patris dexteram sedenti, tanto plus omnibus congaudet virgo Mater, quanto est ipsa cæteris fidelibus fide certior, spe firmior, & charitate feruentior, omniq; virtute perfectior.

3. *Aue Maria.*

In festo Pentecostes replentur omnes fideles Spiritu sancto: sed abundatissimè illa, quæ quāto erat antea gratia plenior, eo est eiisdē semper augendæ capacior.

4. *Aue Maria.*

Reliquū vitæ, mundanis deinceps curis liberrima, & diuinis officijs ac laudibus magis magisq; attenta, cum deuotissimis personis transigit.

5. *Aue Maria.*

Appropinquante hora, qua Dei Mater ad Filium suum est transitura, adsunt ei Apostoli (diuina virtute ex varijs mundi regionibus Hierosolymā adducti) alijq; multi Apostolici viri.

6. *Aue Maria.*

Tantis ergo stantibus Ecclesiæ Prælatibus, vnâ cum cælestium spirituum agminibus Deum ac Deiparam laudantibus, ipsa summa cum suauitate in manus Dei sanctissimum tradit spiritum.

7. *Aue Maria.*

Sacrû verò corpus deponunt Apostoli, in loculo honorifico Gethsemani. Vbi Angelorû chori toto triduo suauissimos Cantus, Hymnos, Psalmosque concinunt.

8. *Aue Maria.*

Post tres dies, Angelico cessante cantu, venit Thomas Apostolus, qui deuotissimo flagrês desiderio, sanctissimæ virginis corpus videndi & venerandi, illud sibi licere à coapostolis obnixè petit.

9. *Aue Maria.*

Volentes igitur cæteri Apostoli hanc Thomæ præstare gratiâ, loculû aperiunt: sacrum verò corpus non inueniunt, sed linteamina solummodo, quibus inuolutum fuerat, dulcissimo odore fragrantia.

10. *Aue Maria.*

Hoc obstupefacti miraculo, tot tâtique oculati testes indubiè iudicant, quòd qui ex virgineo corpore carnem accepit, illud ipsum incorruptû à mortuis suscitauit, in cælos assumpsit, & glorificauit.

Eia ergo *ADVOCATA* nostra, illos tuos
misericordes oculos ad nos conuerte.



PATER NOSTER .

*Coronatio Gloriosæ Dei Matris,
& singularis eius honor in cælis, & in terris.*

Tanta cùm sit cuiusvis Sancti gloria, ut nullius vel lingua eam dicere, vel mens cogitare aut intelligere possit, (*nec enim oculus vidit, nec auris audiuit, nec in cor hominis ascendit, quæ præparavit Deus diligenti- bus eum*) quanto minùs comprehendi aut concipi à quovis queat celsissima Dei genetricis gloria super omnes Angelorù choros exaltatè? Sed num propterea omnino filebimus? Numquid de ipsa vel cogitare cessabimus, quia nostrù longissimè superat & sensum & intellectum? Ne quaquã. Imò de eo ipso gaudeamus, quòd nunquã pijs mētibus materia deficiet laudis, ubi nunquã sufficiet copia laudatoris. Quibus ergo possumus, Dei Matrē cum Filio regnantē, collaudemus vocibus, quã omnes fidelium generationes beatā dicunt, deuotè colunt, religiosè honorant, assiduè prædicāt, fructuosè inuocant, obsecrant, implorant, ut pro ipsis oret, & à Filio suo quæ salutaria sint iure Matris impetret. Duo enim illi semper adsunt: velle, & posse, succurrere miseris. Ipsa enim Mater est misericordiæ, Mater gratiæ, Mater vitæ, Mater gloriæ, Mater omnis & solius boni.

1.. *Aue Maria.*

Coronatur gloriosissima Dei Mater, Regina beatorum Confessorum, Viduarum, & Virginum: Item Angelorum, Archangelorum, & Principatum.

2. *Aue Maria.*

Coronatur Regina Sanctorum omnium, Religiosorum, Ecclesie Pastorum, & Episcoporum: Item Potestatum, Virtutum, & Dominationum.

3. *Aue Maria.*

Coronatur Regina Sanctorum Patriarcharum, Prophetarum, & Martyrum, atque Apostolorum: Itemque Thronorum, Cherubin, atque Seraphim, & creaturarum omnium personarum.

Credo in Deum.

Gratias itaque age (anima mea) Sanctissimae Trinitati omnium Creatori. Qui pro tua totiusque generis humani salute, non solum pro veteri ac terrestri Adamo, novum ac caelestem IESUM Christum mundi Redemptorem nobis donavit, sed etiam pro eo quod infelix quondam Eva nostrae quodammodo extitit causa ruinae, (illud Adamo suggerendo peccatum, quo ipse totum genus nostrum perdidit) novam nobis dedit beatissimam feminam, immaculatam virginem MARIAM. Quae nostrae, simili quasi modo,


do, facta est causa salutis, (*Saluatori nimirum in plurimis Redemptionis nostræ Mysteriis coope-
rando, & continuo pro nobis in cælis apud eundem
Filium suū intercedēdo*) longè plus nobis præ-
stans beneficij, quā illa altera intulit dāni.

Tibi autem, ô sacratissima Virgo, quas
demū gratias agam, pro immensa tua erga
me & vniuersum mundum benignitate?
vel quibus ego homuncio te laudibus ef-
ferā? Cuius incomparabilē excellentiam
(*ut corpus umbra, & veritatem figura*) præfig-
nificarunt clarissima maris stella, lunæ
pulchritudo, splendor solis, rubus Moyfis
ardens inconbustus, virga Aaronis, vellus
Gedeonis, arca fœderis, speculū sine ma-
cula, puteus hortorum, fons aquæ viuæ,
hortus conclusus, liliū cōuallis, palma in
Gades, rosa in Iericho, speciosa oliua, ex-
celsa Cedrus Libani, Cypressus in Sion,
turris Dauid, porta cæli, alięque res mul-
tę, omnes quoque à condito mundo ce-
lebriores feminæ, nec est istis quicquam,
nec simul omnia, tuas satis valeant expri-
mere singulares gratias, dotes, virtutes &
dignitates. Quæ es tota pulchra, nulla
vnquā macula aspersa. Quæ virgo semper
existens, eum in vtero tuo, quem cæli
capere non poterant, concepisti, & mūdo
peperisti. Quæ es singularis Patris cæ-

estis Sponsa, Mater Filij Dei, & supra omnes creatas personas Spiritu sancto repleta, ac totius mundi celestis & terrestris inestimabilis gemma. Qualem te certissimè agnoscentes, & vbique terrarum sincerè cōfidentes, nos tui Catholici cliētuli, tuam admiramur singularem gratiā; tibi gratulamur præeminentissimam gloriā; ad te confugimus, tuā prærogatiuam implorantes intercessionem: quia tu post Filiū tuum es Aduocata nostra, Spes nostra, Refugium, Solatium, & Auxiliū nostrum, suprema omniū Domina & Regina; Mater totius boni, Mater enim Christi, Mater vtique Dei. Tuam ergo supplīces deprecamur cælestem Maiestatem, vt nos audire & Filium tuū pro nobis peccatoribus orare digneris, nunc, & in hora mortis nostræ, vt eiusdē digni efficiamur promissionibus Christi. Per eundem Dominum nostrum IESVM Christum, Dei & tuum Filium: Qui cum Patre & Spiritu sancto viuit & regnat Deus, per omnia secula seculorum,
A M E N.

Corona Domini Nostri IESV
Christi, cum particularibus Diuino-
rum Mysteriorum punctis, inter reci-
tandum meditandis.

*In nomine Patris & Filij ✠ &
Spiritus sancti, Amen.*



A B æterno decreuit, & multo-
ties prædixit pijsſimus Deus,
Filium ſuum ex virgine naſci-
turum, per mortem Crucis
humanum genus redempturum, & to-
tum mundum iudicaturum.

Aduentus Domini nostri in hunc mundum.

1. *Pater noster.*

Missus Archangelus Gabriël à Deo, annunciat B. Virgini M A R I Æ, quòd ipsa concipiet Filium Dei. Data autem virginis consensu, I N C A R N A T V R C H R I S T V S, Deus homo factus.

2. *Pater noster.*

Visitante & salutante sacra Virgine Elizabethá, sanctificatur infans in utero Elizabethæ, & præ gaudio Christi præseptis, lætus exultat.

3. *Paternoster.*

Nascitur Dominus noster Bethleem, pannis inuoluitur, & reclinatur in præsepio. Angeli pastoribus Euangelizant, Natum esse SALVATOREM mundi; & canunt, GLORIA IN EXCELSIS DEO.

4. *Pater noster.*

Pastores festini vadunt Bethleë, Puerum visitant, & reuertuntur ad gregem, mirantes & glorificantes Deum, in omnibus quæ audierant & viderant.

5. *Paternoster.*

Die octaua Circunciditur Puer, & vocatur nomen eius I E S V S, id est, SALVATOR. Ipse enim saluum faciet populum suum à peccatis eorum.

6. *Pater noster.*

Tres Magi (*Reges vel Principes, Gaspar, Melchior, & Balthazar dicti*) veniētes ab Oriente Christū infantē adorant, & munera ei offerunt, aurum, thus, & myrrham.

7. *Pater noster.*

Præsentatur Dominus noster in Templo, & redimitur quinque siclis. Mater offert par turturū, & duos pullos columbarum. Simeon accipit puerum in vlnas.

8. *Pater noster.*

Quærente Herode occidere Christum infantem, Ioseph admonitus per Angelū in somnis eadem nocte secedens, fugit cum Pæro & Matre eius in Ægyptum.

9. *Pater noster.*

Occidit tunc Herodes omnes pueros in Bethleē, & in finibus eius à bimatu & infra. Fugiūt dæmones ab Idolorū simulachris in Ægypto, Christo ibi præsentē.

10. *Pater noster.*

Defuncto Herode, reuertātur ex Ægypto in Nazareth Galileæ, (*Christo nondum septenni*) non ausi redire in Iudæam, propter Archelaum Filium Herodis.

1. *Aue Maria.*

Cooperatur B. Virgo Sanctissimæ Trinitati & Christo Salvatori in his omnibus Mysterijs peragendis.

Conuersatio Domini nostri in hoc mundo.

1. *Pater noster.*

I E S V S annos natus duodecim, manet Hierosolymis inscijs parentibus. Post triduū inuenitur in Templo, sedēs in medio Doctorū, illos audiēs & interrogans.

2. *Pater noster.*

Interroganti Matri, de causa post illum morandi, respondet, Oportere se esse in his quæ Patris sui sunt. Et descendens cum illis Nazareth, est eis subditus.

3. *Pater noster.*

Anno ætatis trigésimo, dum baptizatur à Ioanne, descendit super eum Spiritus sanctus in specie columbæ; & vox de cælo auditur: HIC EST FILIVS MEVS DILECTVS, IN QVO MIHI COM-
PLACVI.

4. *Pater noster.*

Ieiunat in deserto quadraginta diebus. Tentatus, demonem vincit, nos prius exemplo postea verbo instruens, ad pugnam cum spirituali hoste ineundum.

5. *Pater noster.*

Vocat discipulos, & eos mittit vt prædieēt (sicut ipse) in ciuitatibus Iudææ penitentiam, ad regnum Dei, quod nunc appropinquat, consequendum.

6. *Pater noster.*

Doctrinam suam confirmat miraculis, Scripturis, rationibus, bonorum testimonijs, & sua ipsius tam sancta vita, vt nemo eum possit de vilo peccato arguere.

7. *Pater noster.*

Præmonet sæpius Apostolos, quòd Hierosolymis tradendus sit Gentibus, illudendus, conspuendus, flagellandus, & crucifigendus, ac tertia die resurrecturus.

8. *Pater noster.*

Quo verò minùs in Passione scandalizentur, multa disserit de gloria futura, & coràm tribus Apostolis transfiguratur, aliquod suæ gloriæ specimen eis ostendens.

9. *Pater noster.*

Varijs tum verbis tum factis os sæpe obstruit calumniantibus, errâtes conuincit, peccâtes arguit, & se multoties è manibus inimicorum miraculosè subtrahit.

10. *Pater noster.*

Intrat Hierosolymam pullo asinæ insidens, vbi magno cum triumpho exceptus, & Rex Israël salutatus, vendentes & ementes è Templo eijcit.

2. *Aue Maria.*

Participat sacra Virgo Mater de omnibus Filij actionibus secundis & aduersis; Verbum eius audiens, & fidelissimè custodiens.

Nos immundos munda tuo sanguine.



PATER NOSTER. AVE MARIA.

Exitus Domini nostri de hoc mundo.

1. *Pater noster.*

Manducat Dominus Agnum Paschalem cum duodecim Apostolis, lauat eorum pedes, & instituit sanctissimū Corporis & Sanguinis sui Sacramentum & Sacrificium, sub speciebus panis & vini.

2. *Pater noster.*

Tristis in horto ter orat ut non Crucifigatur, Patris tamen voluntati suā submittit, Sanguinem sudat, Ab Angelo confortatur, & osculo Iudæ traditur.

3. *Pater noster.*

Vinctus ducitur ad Annā & Caiphā, falsò accusatur, illuditur, ceditur, cōspuitur, à Petro ter negatur, & à Iudeorum concilio reus mortis iudicatur.

4. *Pater noster*

Traditur Pilato ut crucifigatur, mittitur ad Herodem, cui cum multa vana interroganti nihil responderet, illusus & veste alba indutus, remittitur Pilato.

5. *Pater noster.*

Iudæi petunt potius Barabbam quam IESVM dimitti. Quos ut placaret Pilatus facit IESVM dirissimè flagellari: plagis inflictis (ut reuelatum dicitur) quinquies mille quadringentis nonaginta.

6. *Pater noster.*

IESVM Coccino, Spinis, & Arundine insignitū, Pilatus Iudæis ostendit, dicens: ECCE HOMO. Ipsi clamant, CRUCIFIGE, CRUCIFIGE eum.

7. *Pater noster.*

Pilatus suā protestans innocentia, lauat manus coram populo, (*hoc sibi & filijs suis imprecante crimen*) tamen ne fortè Cæsarem offendat, IESVM iudicat Crucifigendum.

8. *Pater noster.*

Ablato coccino, sed spinea Corona in capite relicta, IESVS Crucem baiulat, ac sub ea pronus corruit. Et feminas lamentantes de futuris in Hierusalem miserijs præmonet.

9. *Pater noster.*

IESVS inter duos crucifixus latrones, in summis pœnis summam ostendit patientiam, & infinitam erga omnes (bonos & malos) charitatem.

10. *Pater noster.*

Post tres horas sponte TRADIT SPIRITVM. Anima statim in Limbo triumphat. Vesper corpus de Cruce deponitur, & honorificè sepelitur.

3. *Aue Maria.*

Hęc omnia patienti Domino, omnium maximè cōpatitur alma Mater, dolores mortis multoties passa.

Glorificatio Domini nostri post Passionem.

1. *Pater noster.*

Tertia die Dominus noster gloriōse Resurgit à morte, sanctos veteris Testamenti Patres liberans è limbo, Matri in primis tum alijs apparet, & cum illis per quadraginta dies versatur.

2. *Paternoster.*

Die quadregesima Ascendit in cælos, Sedetq̃ue ad dexteram Patris, vnicus singularis & proprius noster ad Deum Mediator existens. Per quem multos habemus Intermediatores ac Intercessores.

3. *Pater noster.*

In die Pentecostes Spiritum sanctum de cælo mittit visibilibus signis. Per quem Ecclesiam colligit, regit, & sanctificat, omnibus diebus, vsque ad consummationem seculi.

4. *Aue Maria.*

De Domini nostri Resurrectione & Ascensione Mater super omnes gauisa, & singulari Spiritus sancti gratia repleta, anima quoque & corpore glorificata, cælorum constituitur Regina, & totius Ecclesiæ Aduocata.

Credo in Deum.

Ille idem Dominus noster **I E S V S**
 Christus, qui ante omnia secula huma-
 ni generis præordinatus est Redemptor:
 Qui tempore definito, in summa humili-
 tate ex **M A R I A** virgine, natus est: Qui
 maximos subiuit labores, omnes ad pœ-
 nitentiam vocans, omnes exemplo &
 verbo ad gratiam inuitans, omnes utiq;
 volens saluos fieri: Qui post infinita op-
 probria & tormenta ignominiosissimam
 & acerbissimã Crucis mortem sustinuit:
 Qui deniq; gloriosè à morte Resurrexit:
 in cælos Ascendit: ibique regnans, Eccle-
 siam suam in terris continuò conseruat
 & sanctificat: Hic ipse iterum veniet
 in virtute multa & maiestate, omnium
 Iudex Angelorum & hominum:
 Singulis redditurus (prout bene
 vel malè gesserint) pæ-
 nam vel gloriam
 sempiternam,
 Amen.

Silvius Canus Aloysius

Rosarium quindecim orationū

Dominicarum, & Angelicarum Salutationum, cum vno Symbolo. In memoriam octo gaudiorum, & septem Dolorum B. Virginis M A R I Æ.

In nomine Patris & Filij ✠ & Spiritus sancti.

Benedicta sit sancta & indiuidua Trinitas, nunc & semper, & in infinita secula seculorum, Amen.

1. *Pater. Ave. Primum gaudium.*

Annunciat Archangelus Gabriël B. Virgini, quòd ipsa Filium Dei concipiet.

2. *Pater. Ave. 2. gaudium.*

Visitante Matre Dei Elizabethá, Infans in vtero, ambæ Matres, Zacharias, cognati, & vicini exultant.

3. *Pater. Ave. 3. gaudium.*

Nascitur Christus. Angeli canunt. Pastores Infantem visitant. Magi adorant.

4. *Pater. Ave. 4. gaudium.*

Præsentante B. Virgine Filiū in Templo, Simeon lætus eum accipit in vlnas.

5. *Pater. Ave. Primus dolor.*

Ioseph cum Puero & Matre, nocte secedentes, fugiunt in Ægyptum.

6. *Pater. Ave. 2. dolor.*

IESVM triduo amissum quærunt parentes eius, anno ætatis suæ duodecimo.

7. *Pater. Ave.* 3. *dolor.*

Anno ætatis trigesimo Christus Dominus valedicit Matri suæ (iam etiã viduæ) non ampliùs cum ea habitaturus.

8. *Pater. Ave.* 4. *dolor.*

Audit B. Virgo Filium vincitū teneri, flagellari, spinis coronari, & ad Crucē dam-

9. *Pater. Ave.* 5. *dolor.* (nari,

Occurrit Filio suo Crucem baiulanti, videtque eum sub illa humi prostratum.

10. *Pater. Ave.* 6. *dolor.*

Videt Filium inter duos latrones Crucifixum, agonizantem, & morientem.

11. *Pater. Ave.* 7. *dolor.*

Corpus Filij accipit in vlnas, & dum illud contemplatur, ab ea aufertur, & sepelitur.

12. *Pater. Ave.* *Quintū gaudium.*

Christus rediuiuus apparet Matri gloriosus, iam non ampliùs moriturus.

13. *Pater. Ave.* 6. *gaudium.*

Gaudet præ omnibus pia Mater de Filij sui Ascensione, & in cælis Exaltatione.

14. *Pater. Ave.* 7. *gaudium.*

Spiritus sancti gratia donisque tota roboratur & confirmatur Ecclesia.

15. *Pater. Ave.* 8. *gaudium.*

Anima & corpore assumitur in cælum, & super omnes Angelorum choros exaltatur, Regina cælorum.

Credo in Deum.

Sanctissimus Dominus noster, in quo nunquam poterat esse peccatum, & Beatissima virgo ab omni peccati labe semper præservata, propositis sibi gaudijs dolores maximos sustinendo, in gloriam suam intrauerunt, nobis relinquentes exemplum, ut eorum sequamur vestigia.

Quanto igitur magis nos peccatis obnoxij, imperfectionibus repleti, & tentationum periculis circumdati, debemus necessarias æquanimiter ferre castigationes, ut spe gaudentes, in tribulatione patientes, orationi instantes, non fatigati animis, tandem cum illis conregnemus, conglorificemur, & cohæredes efficiamur gaudij æterni, quod nemo tollet à nobis. Quod ipse nobis concedat, qui nos suo sanguine redemit, per intercessionem pijsimæ suæ Matris, & omnium Sanctorum, **A M E N.**

Oremus.

Christe omnipotens, qui ab æterno Filius Dei existens, humanum genus in tempore Nascendo lætificasti, Patiendo & Moriendo à peccati captiuitate redemisti, Resurgendo ab inferis liberasti, Ascendēdo in cælos adduxisti; præsta quæsumus, ut qui summis hisce beneficijs læti gaudemus, venientem quoque te Iudicem seculæ videamus, & gloriosum Remuneratorem habeamus. Qui viuis & regnas, cum Deo Patre, in vnitæ Spiritus sancti Deus. Per omnia secula seculorum, **A M E N.**

Laudate pueri Dominū, laudate nomen Domini.



M. de Voranen. J. van. Collier & Sculp.
PATER NOSTER. AVE MARIA.

SEPTEM PSALMI POENITENTIALES,

cum Litanis , dicuntur
flexis genibus .

Antiph. Ne reminiscaris.

Psalmus 6.

DOMINE ne in furore
tuo arguas me : ne que
in ira tua corripas me.
Miserere mei Domi-
ne, quoniam infirmus
sum : sana me Domi-
ne, quoniam contur-
bata sunt ossa mea .

Et anima mea turbata est valde : sed tu
Domine viquequo ?

Conuertere Domine , & eripe animā
meam : saluum me fac propter misericor-
diam tuam .

Quoniam non est in morte qui memor
sit tui : in inferno autem quis confitebi-
tur tibi ?

Labo-

Laboraui in gemitu meo, lauabo per singulas noctes lectum meum: lachrymis meis stratum meum rigabo.

Turbatus est à furore oculus meus: inueteraui inter omnes inimicos meos.

Discedite à me omnes qui operamini iniquitatem: quoniam exaudiuit Dominus vocem fletus mei.

Exaudiuit Dominus deprecationem meam: Dominus orationem meam suscepit.

Erubescant & conturbentur vehementer omnes inimici mei: conuertantur & erubescant valde velociter.

Gloria Patri & Filio.

Psalmus 31.

BEati, quorum remissa sunt iniquitates, & quorum tecta sunt peccata.

Beatus vir, cui non imputauit Dominus peccatum, nec est in spiritu eius dolus.

Quoniam tacui, inueterauerunt ossa mea: dum clamarem tota die.

Quoniam die ac nocte grauata est super me manus tua: conuersus sum in ærumna mea dum configitur spina.

Delictum meum cognitum tibi feci, & iniustitiam meam non abscondi.

Dixi, confitebor aduersum me iniustitiam meam Domino: & tu remisisti impietatem peccati mei.

Pro hac orabit ad te omnis Sanctus, in tempore opportuno.

Veruntamen in diluvio aquarum multarum, ad eum non approximabunt.

Tu es refugium meum à tribulatione quæ circumdedit me: exultatio mea, erue me à circumdantibus me.

Intellectum tibi dabo, & instruam te in via hac qua gradieris: firmabo super te oculos meos.

Nolite fieri sicut equus & mulus, quibus non est intellectus.

In chamo & freno maxillas eorum constringe, qui non approximant ad te.

Multa flagella peccatoris, sperantem autem in Domino misericordia circumdabit.

Latamini in Domino, & exultate iusti: & gloriamini omnes recti corde.

Gloria Patri & Filio.

Psalmus 37.

Domine ne in furore tuo arguas me, neque in ira tua corripias me.

Quoniam sagittæ tuæ infixæ sunt mihi, & confirmasti super me manum tuam.

Non est sanitas in carne mea à facie iræ tuæ, non est pax ossibus meis à facie peccatorum meorum.

Quo-

Quoniam iniquitates meæ supergressæ sunt caput meum : & sicut onus graue grauata sunt super me .

Putruerunt & corruptæ sunt cicatrices meæ, à facie insipientiæ meæ.

Miser factus sum, & curuatus sum vsq; in finē : tota die contristatus ingrediebar.

Quoniam lumbi mei impleti sunt illusionibus , & non est sanitas in carne mea.

Afflictus sum, & humiliatus sum nimis; rugiebam à gemitu cordis mei.

Domine , ante te omne desiderium meum , & gemitus meus à te non est absconditus.

Cor meum conturbatum est , dereliquit me virtus mea : & lumen oculorum meorum, & ipsum non est mecum.

Amici mei & proximi mei aduersum me appropinquauerunt & steterunt.

Et qui iuxta me erant, de longè steterunt : & vim faciebant, qui quærebant animam meam.

Et qui inquirebant mala mihi , locuti sunt vanitates : & dolos tota die meditabantur.

Ego autem tanquam surdus non audiebam : & sicut mutus non aperiens os suum.

Et

Et factus sum sicut homo non audiēs,
& non habens in ore suo redargutiones.

Quoniam in te Domine speravi, tu
exaudies me Domine Deus meus.

Quia dixi, ne quando supergaudeant
mihi inimici mei: & dum commouentur
pedes mei, super me magna locuti sunt.

Quoniam ego in flagella paratus sum,
& dolor meus in conspectu meo semper.

Quoniam iniquitatem meam annun-
ciabo, & cogitabo pro peccato meo.

Inimici autem mei viuunt, & confir-
mati sunt super me: & multiplicati sunt,
qui oderunt me iniquē.

Qui retribuunt mala pro bonis, detra-
hebant mihi, quoniā sequebar bonitatē.

Ne derelinquas me Domine Deus
meus: ne discesseris à me.

Intende in adiutorium meum, Domi-
ne Deus salutis meæ.

Gloria Patri, & Filio.

Psalmus 50.

Miserere mei Deus, secundum ma-
gnam misericordiam tuam.

Et secundum multitudinem misera-
tionum tuarum dele iniquitatem meam.

Amplius laua me ab iniquitate mea, &
à peccato meo munda me.

Quoniã iniquitatẽ meã ego cognosco,
& peccatum meũ contra me est semper.

Tibi soli peccaui, & malum coram te
feci: vt iustificeris in sermonibus tuis, &
vincas cùm iudicaris.

Ecce enim in iniquitatibus conceptus
sũ, & in peccatis concepit me mater mea.

Ecce enim veritatẽ dilexisti, incerta &
occulta sapientiã tuẽ manifestasti mihi.

Asperges me Domine hyssopo, &
mundabor: lauabis me, & super niuem
dealbabor.

Auditui meo dabis gaudium & lætitiã,
& exultabunt ossa humiliata.

Auerte faciam tuam à peccatis meis, &
omnes iniquitates meas dele.

Cor mundum crea in me Deus: & spi-
ritum rectum innoua in visceribus meis.

Ne proijcias me à facie tua, & spiritum
sanctum tuum ne auferas à me.

Redde mihi lætitiã salutaris tui, &
spiritu principali confirma me.

Docebo iniquos vias tuas: & impij ad
te conuertentur.

Libera me de sanguinibus Deus, Deus
salutis meæ: & exaltabit lingua mea iu-
sticiã tuam.

Domine labia mea aperies, & os meũ
annunciabit laudem tuam.

Quo-

Quoniã si voluisses, sacrificium dedissem vtique, holocaustis non delectaberis.

Sacrificium Deo spiritus contribulatus, cor contritum & humiliatum Deus non despicias.

Benignè fac Dñe in bona voluntate tua Sion, vt ædificentur muri Hierusalē.

Tunc acceptabis sacrificium iustitiæ, oblationes & holocausta, tunc imponent super altare tuum vitulos.

Gloria Patri & Filio.

Psalmus IOI.

Domine exaudi orationem meam, & clamor meus ad te veniat,

Non auertas faciem tuam à me, in quacunque die tribulor, inclina ad me aurem tuam.

In quacunque die inuocauero te, velociter exaudi me.

Quia defecerunt sicut fumus dies mei, & ossa mea sicut cremium aruerunt.

Percussus sum vt fœnum, & aruit cor meum, quia oblitus sum comedere panem meum.

A voce gemitus mei, adhæsit os meum carni meę.

Similis factus sū pelicano solitudinis, factus sum sicut nycticorax in domicilio.

Vigilaui, & factus sum sicut passer solitarius in tecto.

Tota die exprobrabant mihi inimici mei: & qui laudabant me, aduersum me iurabant.

Quia cinerem tanquam panem manducabam, & potum meum cum fletu miscebam.

A facie iræ indignationis tuæ, quia eleuans allifisti me.

Dies mei sicut vmbra declinauerunt, & ego sicut fœnum arui.

Tu autem Domine in æternum permanes, & memoriale tuum in generatione & generationem.

Tu exurgēs Dñe misereberis Siō: quia tēpus miserendi eius, quia venit tempus.

Quoniam placuerunt seruis tuis lapides eius, & terræ eius miserebuntur.

Et timebunt gentes nomē tuum Domine, & omnes reges terræ gloriam tuā.

Quia ædificauit Dominus Sion, & videbitur in gloria sua.

Respexit in orationem humilium, & non spreuit preces eorum.

Scribantur hæc in generatione altera: & populus qui creabitur, laudabit Dñm.

Quia prospexit de excelsō sancto suo, Dominus de cælo in terram aspexit.

Vt audiret gemitus compeditorum, vt
solueret filios interemptorum.

Vt annuncient in Sion nomē Domi-
ni: & laudem eius in Hierusalem.

In conueniendo populos in vnum, &
reges, vt seruiant Domino.

Respondit ei in via virtutis suæ, pau-
citatē dierum meorum nuncia mihi.

Ne reuoces me in dimidio dierum
meorum, in generatione & generatio-
nem anni tui.

Initio tu Domine terram fundasti, &
opera manuum tuarum sunt cæli.

Ipsi peribunt, tu autem permanes, &
omnes sicut vestimentum veterascent.

Et sicut opertorium mutabis eos, &
mutabuntur, tu autem idem ipse es, &
anni tui non deficient.

Filij seruorum tuorum habitabunt, &
semen eorum in seculum dirigetur.

Gloria Patri, & Filio, & Spiritui sancto:
Sicut erat in principio.

Psalmus 129.

DE profundis clamaui ad te Domi-
ne, Domine exaudi vocem meam.

Fiant aures tuæ intendentes in vocem
deprecationis meæ.

Si iniquitates obseruaueris Domine,

Domine quis sustinebit?

Quia apud te propitiatio est, & propter legem tuam sustinui te Domine.

Sustinuit anima mea in verbo eius, sperauit anima mea in Domino.

A custodia matutina vsque ad noctem, speret Israël in Domino.

Quia apud Dominum misericordia, & copiosa apud eum redemptio.

Et ipse redimet Israël, ex omnibus iniquitatibus eius.

Gloria Patri.

Psalms 142.

Domine exaudi orationem meam, auribus percipe obsecrationē meā: in veritate tua, exaudi me in tua iustitia.

Et non intres in iudicium cum seruo tuo: quia non iustificabitur in conspectu tuo omnis viuens.

Quia persecutus est inimicus animam meam, humiliavit in terra vitam meam.

Collocavit me in obscuris sicut mortuos seculi: & anxius est super me spiritus meus, in me turbatum est cor meum.

Memor fui dierum antiquorum, meditatus sum in omnibus operibus tuis, & in factis manuum tuarum meditabar.

Expandi

Expandi manus meas ad te, anima mea sicut terra sine aqua tibi.

Velociter exaudi me Domine, defecit spiritus meus.

Non auertas faciem tuam à me: & similis ero descendentibus in lacum.

Auditam fac mihi manè misericordiā tuam: quia in te speravi.

Notam fac mihi viam in qua ambulē, quia ad te leuaui animam meam.

Eripe me de inimicis meis Domine, ad te confugi: doce me facere voluntatē tuam, quia Deus meus es tu.

Spiritus tuus bonus deducet me in terram rectam: propter nomē tuum Domine viuificabis me in æquitate tua.

Educes de tribulatione animam meā: & in misericordia tua disperdes omnes inimicos meos.

Et perdes omnes qui tribulant animā meam: quoniam ego seruus tuus sum.

Gloria Patri & Filio.

Antiphona. Ne reminiscaris Domine delicta nostra, vel parentū nostrorū, neq; vindictam sumas de peccatis nostris.

In quibusdam Litanijs additur: Parce Domine, parce populo tuo, quem redemisti pretioso Sanguine tuo: ne in æternum irascaris ei.

LITANIÆ.

K Yrie eleison. Christe eleison.
 Kyrie eleison. Christe audi nos.
 Christe exaudi nos.

Pater de cælis Deus, Misereere nobis.

Fili redemptor mundi Deus, misere-
 re nobis.

Spiritus sancte Deus, misereere nobis.

Sancta Trinitas vnus Deus, misereere
 nobis.

Sancta MARIA, ora pro nobis.

Sancta Dei genitrix ora.

Sancta virgo virginum. ora.

Sancte Michaël ora.

Sancte Gabriël ora.

Sancte Raphaël ora.

Omnes sancti Angeli & Archangeli Dei
 orate pro nobis.

Omnes sancti beatorum spirituum or-
 dines orate.

Sancte Ioannes Baptista. ora.

Omnes sancti Patriarchæ & Prophetæ
 Dei, orate pro nobis.

Sancte Petre ora.

Sancte Paule ora.

Sancte Andrea ora.

Sancte

Sancte Iacobe	ora.
Sancte Ioannes	ora.
Sancte Thoma	ora.
Sancte Iacobe	ora.
Sancte Philippe	ora.
Sancte Bartholomee.	ora.
Sancte Matthee	ora.
Sancte Simon	ora.
Sancte Thadee	ora.
Sancte Matthia	ora.
Sancte Barnaba	ora.
Sancte Luca	ora.
Sancte Marce	ora.
Omnes sancti Apostoli & Euangelistæ, orate pro nobis.	
Omnes sancti discipuli Dñi,orate pro no.	
Omnes sancti Innocetes, orate pro nob.	
Sancte Stephane	ora.
Sancte Laurenti	ora.
Sancte Vincenti	ora.
Sancti Fabiane & Sebastiane , orate pro nobis.	
Sancti Ioannes & Paule,orate pro nobis.	
Sancti Cosma & Damiane,orate pro nob.	
Sancti Gervasi & Prothasi,orate pro nob.	
Omnes sancti martyres,orate pro nobis.	
Sancte Siluester	ora.
Sancte Gregori	ora.
Sancte Ambrosi	ora.

Sancte Augustine	ora.
Sancte Hieronyme	ora.
Sancte Martine	ora.
Sancte Nicolae	ora.
Omnes sancti Pontifices & Confessores, orate pro nobis.	
Omnes sancti Doctores	orate.
Sancte Benedicte	ora.
Sancte Antoni	ora.
Sancte Bernarde	ora.
Sancte Dominice	ora.
Sancte Francisce	ora.
Omnes sancti Sacerdotes & Leuitæ, orate pro nobis.	
Omnes sancti Monachi & Eremitæ, orate pro nobis.	
Sancta Maria Magdalena.	ora.
Sancta Agatha.	ora.
Sancta Lucia	ora.
Sancta Agnes	ora.
Sancta Cæcilia	ora.
Sancta Catharina	ora.
Sancta Anastasia	ora.
Omnes sanctæ virgines & viduæ, orate pro nobis.	
Omnes sancti & sanctæ Dei, intercedite pro nobis.	
Propitius esto,	parce nobis Domine.
Propitius esto,	exaudi nos Domine.
	Ab

- Ab omni malo, libera nos Domine.
Ab omni peccato, libera nos Domine.
Ab ira tua, libera nos Domine.
Ab imminentibus hæreticorū & omniū
inimicorum nostrorum periculis,
libera nos Domine.
A peste, fame & bello, libera nos Domine.
A subitanea & improuisa morte, libera
nos Domine.
Ab insidiis diaboli, libera nos Domine.
Ab ira, & odio, & omni mala voluntate,
libera nos Domine.
A spiritu fornicationis, libera nos Dñe.
A fulgure & tempestate, libera nos Dñe.
A morte perpetua, libera nos Dñe.
Per mysterium sanctæ incarnationis
tuæ, libera nos Domine.
Per aduentū tuum, libera nos Do mine.
Per natiuitatem tuā, libera nos Domine.
Per baptismum & sanctum ieiunium
tuum, libera nos Domine.
Per crucem & passionem tuam, libera
nos Domine.
Per mortem & sepulturam tuam, libera
nos Domine.
Per sanctam resurrectionem tuam, libera
nos Domine.
Per admirabilem ascensionē tuam, libera
nos Domine.

Per aduentum Spiritus sancti paracleti,
libera nos.

In die iudicii, libera nos.

Peccatores, te rogamus.

Vt nobis percas, te rogamus.

Vt nobis indulgeas, te rogamus. audi nos

Vt ad veram poenitentiam nos perducere digneris, te rogamus. audi nos.

Vt Ecclesiam tuam sanctam regere & cōseruare digneris, te rogamus. audi nos

Vt domnum Apostolicū, & omnes Ecclesiasticos ordines in sancta religione cōseruare digneris. te rogamus.

Vt inimicos sanctæ Ecclesiæ humiliare digneris, te rogamus. audi nos.

Vt ab hostilibus hereticorum incurribus Ecclesiam tuam protegere digneris, te rogamus. audi nos.

Vt regibus & principibus Christianis pacem & veram concordiam [donare digneris.] [concedere & cōseruare digneris,] te rogamus. audi nos.

Vt regibus & principibus Christianis vitam donare digneris, te rogamus.

Vt propugnatores tuos defendere & prosperare digneris, te rogamus.

Vt Turcarum conatus reprimere & ad nihilum redigere digneris, te rogamus.

Vt cuncto populo Christiano pacem & vnita-

vnitatem largiri digneris, te rogamus.
Vt nosmetipfos in tuo sancto seruitio
confortare & conseruare digneris,
te rogamus audi nos.

Vt mentes nostras ad cælestia desideria
erigas, te rogamus audi nos.

Vt omnibus benefactoribus nostris sem-
piterna bona retribuas, te rogamus.

Vt animas nostras, fratrum, propinquo-
rum, & benefactorum nostrorum, ab
æterna damnatione eripias, te roga.

Vt fructus terræ dare & conseruare di-
gneris, te rogamus audi nos.

Vt omnibus fidelibus defunctis requiem
æternā donare digneris, te rogamus.

Vt nos exaudire digneris, te rogamus.
Fili Dei. te rogamus.

Agnus Dei, qui tollis peccata mundi,
parce nobis Domine.

Agnus Dei, qui tollis peccata mundi,
exaudi nos Domine.

Agnus Dei, qui tollis peccata mundi,
miserere nobis.

Christe audi nos.

Christe exaudi nos.

Kyrie eleyson. Christe eleison.

Pater noster, secretò.

Vers. Et ne nos inducas in tentationē.

Resp. Sed libera nos à malo.

Psalmus.

DEus in Adiutorium meum intende,
Domine ad adiuuandū me festina.

Confundantur & reuereantur, qui
quærun animam meam.

Auertantur retrorsum, & erubescant,
qui volunt mihi mala.

Auertantur statim erubescences, qui
dicunt mihi, euge, euge.

Exultent, & latentur in te omnes qui
quærun te: & dicant semper, magnifice-
tur Dominus, qui diligunt salutare tuum.

Ego verò egenus & pauper sum, Deus
adiuua me.

Adiutor meus, & liberator meus es tu,
Domine ne moreris.

Gloria Patri, & Filio, &c.

Versus. Saluos fac seruos tuos. *Respons.*

Deus meus sperantes in te. *Vers.* Esto

nobis Domine turris fortitudinis. *Resp.*

A facie inimici. *Vers.* Nihil proficiat ini-

micus in nobis. *Respons.* Et filius ini-

quiritatis non apponat nocere nobis.

Versus. Domine non secundum peccata

nostra facias nobis. *Resp.* Neque secun-

dum iniquitates nostras retribuas nobis.

Vers. Oremus pro Papa nostro N. *Resp.*

Dominus cōseruet eum, & viuificet eum,

&

& beatum faciat eum in terra: & nō tradat eum in animam inimicorum eius.

Versus. Oremus pro benefactoribus nostris. *Respons.* Retribuere dignare Domine omnibus nobis bona facientibus propter nomen sanctum tuum vitā æternam, Amen. *Versus.* Oremus pro fidelibus defunctis. *Respon.* Requiem æternam dona eis Domine: Et lux perpetua luceat eis. *Versus.* Requiescant in pace. *Resp.* Amen. *Vers.* Pro fratribus nostris absentibus. *Resp.* Saluos fac seruos tuos Deus meus sperantes in te. *Versus.* Mitte eis Domine auxilium de sancto. *Resp.* Et de Sion tuere eos. *Versus.* Domine exaudi orationem meam. *Resp.* Et clamor meus ad te veniat.

Oratio.

DEus, cui proprium est misereri semper & parcere, suscipe deprecationem nostram: vt nos & omnes famulos tuos, quos delictorum catena constringit, miseratio tuæ pietatis clemēter absoluat.

Exaudi quęsumus Domine supplicum preces, & confitentium tibi parce peccatis: vt pariter nobis indulgentiā tribuas benignus & pacem.

Ineffabilem nobis Domine misericordiam

cordiam tuā clementer ostende: vt simul nos à peccatis omnibus eruas, & à pœnis, quas pro his meremur, benignus eripias.

Deus qui culpa offenderis, pœnitentia placaris: preces populi tui supplicantis propitius respice, & flagella tuæ iracundiæ, quæ pro peccatis nostris meremur, auerte.

Omnipotens sempiterne Deus, misere famulo tuo N. Pontifici nostro, & dirige eum secundum tuam clementiam in viam salutis eternæ: vt te donante, tibi placita cupiat, & tota virtute perficiat.

Deus à quo sancta desideria, recta consilia, & iusta sunt opera: da seruis tuis illā quam mundus dare non potest pacem: vt & corda nostra mandatis tuis dedita, & hostium sublata formidine, tempora sint tua protectione tranquilla.

Vre igne sancti Spiritus renes nostros, & cor nostrum Domine: vt tibi casto corpore seruiamus, & mundo corde placeamus.

Fidelium Deus omnium conditor & redemptor, animabus famulorum, famularumq; tuarum, remissionem cunctorū tribue peccatorum: vt indulgentiam, quā semper optauerunt, pijs supplicationibus consequantur.

Actiões nostras quæsumus Domine aspirando præueni, & adiuuando prosequere: vt cuncta nostra oratio & operatio à te semper incipiat, & per te cœpta finiatur.

Omnipotens sempiterne Deus, qui viuorum dominaris simul & mortuorū, omniumque misereris, quos tuos fide & opere futuros esse prænoſcis: te supplices exoramus, vt pro quibus effundere preces decreuimus, quosque vel præſens ſeculum adhuc in carne retinet, vel futurū iam exutos corpore ſuſcepit; intercedentibus omnibus Sanctis tuis, pietatis tuæ clementia omnium delictorum ſuorum veniam conſequantur. Per Dominum noſtrum Ieſum Chriſtum Filium tuum, Qui tecum viuit & regnat in vnitate ſpiritus ſancti Deus, Per omnia, &c. Amē.

Vers. Domine exaudi orationem meam.

Reſp. Et clamor meus ad te veniat.

Vers. Benedicamus Domino.

Reſp. Deo gratias.

Vers. Exaudiat nos omnipotens & miſericors Dominus. *Reſp.* Amen.

Vers. Et fidelium animæ per miſericordiam Dei requieſcant in pace.

Reſpon. Amen.

S E Q U E N T I A.

Dies iræ, dies illa,
Soluēt seclum in fauilla:
Teste Dauid cum Sibylla.

Quantus tremor est futurus,
Quando iudex est venturus
Cuncta strictè discussurus?

Tuba mirum spargens sonum,
Per sepulchra regionum,
Coget omnes ante thronum.

Mors stupebit & natura,
Cum resurget creatura,
Iudicanti responsura.

Liber scriptus proferetur,
In quo totum continetur,
Vnde mundus iudicetur.

Iudex ergo cum sedebit,
Quidquid latet, apparebit:
Nil inultum remanebit.

Quid sum miser tunc dicturus?
Quem patronum rogaturus,
Dum vix iustus sit securus?

Rex tremendæ maiestatis,
Qui saluandos saluas gratis,
Salua me fons pietatis.

Recordare Iesu pie,
Quod sum causa tuæ viæ,
Ne me perdas illa die.

Quærens me, sedisti lassus:
Redemisti, crucem passus:
Tantus labor non sit cassus.

Iustæ iudex ultionis,
Donum fac remissionis
Ante diem rationis.

Ingemisco, tanquam reus:
Culpa rubet vultus meus:
Supplici parce Deus.

Qui Mariam absolvisti,
Et latronem exaudisti:
Mihi quoque spem dedisti.

Preces meæ non sunt dignæ:
Sed tu bonus fac benignè,
Ne perenni cremer igne.

Inter oves locum præsta,
Et ab hædis me sequestra,
Statuens in parte dextra.

Confutatis maledictis,
Flammis acribus addictis,
Voca me cum benedictis.

Oro supplex & acclinis:
Cor contritum quasi cinis:
Gere curam mei finis.

Lachrymosa dies illa,
Qua resurget ex favilla
Iudicandus homo reus:
Huic ergo parce Deus.

Pie Iesu Domine,
Dona eis requiem, Amen.

Propter nomen sanctum tuum esto mihi IHESVS.



PATER NOSTER. AVE MARIA.

ORATIO DIVI GREGORII

Papæ, quæ habetur in fine explanationum septem Psalmorum poenitentialium.

Bone I E S V, Verbum Patris, splendor paternæ gloriæ, in quem desiderant Angeli prospicere, doce me facere voluntatem tuam: vt à Spiritu tuo bono deductus, ad beatam illam perueniam ciuitatem, vbi est dies æternus, & vnus omnium spiritus: vbi est certa securitas, & secunda æternitas, & æterna tranquillitas, & tranquilla felicitas, & felix suauitas, & suavis iucunditas: vbi tu Deus cum Patre & Spiritu sancto viuis & regnas per infinita secula seculorum, Amen.

Alia Oratio ad Iesum.

OBone Iesu, ô piissime Iesu, ô dulcissime Iesu, ô Iesu fili Mariæ virginis, plene misericordia & pietate: ô dulcis Iesu, secundam magnam misericordiã tuam, miserere mei. O clementissime Iesu, te deprecor per illum sanguinẽ pretiosum, quem pro peccatoribus effundere voluisti, vt abluas omnes iniquitates meas, & in me respicias miserum & indignum humiliter veniam petentem, & hoc nomen sanctum I E S V inuocantem. O nomen Iesu, nomen dulce:

dulce : nomen Iesu, nomen delectabile:
nomen Iesu , nomen confortans. Quid
est enim Iesus , nisi saluator? Ergo Iesu,
propter nomen sanctum tuum esto mihi
Iesus,& salua me : ne permittas me dam-
nari , quem tu de nihilo creasti , O bone
Iesu , ne perdat me iniquitas mea , quem
fecit omnipotens bonitas tua . O dul-
cis Iesu , recognosce quod tuum est, &
absterge quod alienum est. O benignis-
sime Iesu , miserere mei , dum tempus
est miserendi : ne damnes me in tempore
iudicandi . Quæ utilitas in sanguine
meo , dum descendero in æternam cor-
ruptionem ? Non mortui laudabunt te,
Domine Iesu , neque omnes qui de-
scendunt in infernum. O amantissime
Iesu , ô desideratissime Iesu , ô mitis-
sime Iesu , ô Iesu , Iesu , Iesu , admitte
me intrare in numerum electorum tuo-
rum : ô Iesu , salus in te credentium : ô
Iesu , solatium ad te confugientium :
ô Iesu , dulcis remissio omnium peccat-
orum . O Iesu , fili Mariæ virginis ,
infunde in me gratiam , sapientiam , cha-
ritatem , castitatem , & humilitatem :
vt possim te perfectè diligere , te lau-
dare , te perfrui , tibi seruire , & in te glo-
riari , & omnes qui inuocant nomen
tuum , quod est Iesus. Amen.

Oratio.

DEus , qui gloriosissimum Nomen
 I E S V Christi Filij tui Domini no-
 stri fecisti fidelibus tuis summo suauitatis
 affectu amabile , & malignis spiritibus
 tremendum atque terribile: concede pro-
 pitius , vt omnes , qui hoc nomen I E S V
 deuotè venerantur in terris, sanctæ con-
 solationis dulcedinem in præsentì perci-
 piant , & in futuro gaudium exultatio-
 nis & interminabilis beatitudinis obti-
 neant in cælis. Per eundem Dominum
 nostrum Iesum Christum Filium tuum,
 qui tecum viuit & regnat in vnitæte Spi-
 ritus sancti Deus, per omnia secula secu-
 lorum. *Resp. Amen.*

Iubilus S. Bernardi.

Iesu dulcis memoria,
 Dans vera cordis gaudia:
 Sed super me! & omnia
 Eius dulcis præsentia.

Nil canitur suauius,
 Nil auditur iucundius,
 Nil cogitatur dulcius,
 Quàm Iesus Dei Filius.

Iesu spes pœnitentibus,
 Quàm pius es petentibus,
 Quàm bonus te quærentibus,

Sed

Sed quid inuenientibus?

Iesu dulcedo cordium,
Fons viuus, lumen mentium,
Excedens omne gaudium
Et omne desiderium.

Nec lingua valet dicere,
Nec litera exprimere:
Expertus potest credere,
Quid sit Iesum diligere.

Iesum quero in lectulo,
Claufo cordis cubiculo:
Priuatim & in publico,
Queram amore sedulo.

Cum Maria diluculo
Iesum quæram in tumulto:
Clamore cordis quærulo,
Mente quæram, non oculo.

Tumbam profundam fletibus,
Locum replens gemitibus,
Iesu prouoluar pedibus,
Strictis hærens amplexibus.

Iesu Rex admirabilis,
Et triumphator nobilis,
Dulcedo ineffabilis,
Totus desiderabilis.

Mane nobiscum Domine,
Et nos illustra lumine,
Pulsa mentis caligine,
Mundum replens dulcedine.

Quan

Quando cor nostrum visitas,
Tunc lucet ei veritas,
Mundi vilescit vanitas,
Et intus feruet charitas.

Amor Iesu dulcissimus,
Et verè suauissimus:
Plus millies gratissimus,
Quàm dicere sufficimus.

Hoc probat eius passio,
Hoc sanguinis effusio:
Per quam nobis redemptio
Datur, & Dei visio.

Iesum omnes cognoscite:
Amorem eius poscite:
Iesum ardenter quærite,
Quærendo inardescite.

Sic amantem diligite,
Amoris vicem reddite:
In hunc odorem currite:
Et vota votis reddite.

Iesus author clementiæ,
Totius spes lætitiæ:
Dulcoris fons & gratiæ,
Veræ cordis delitiæ.

Iesu mi bone sentiam
Amoris tui copiam:
Da mihi per præsentiam,
Tuam videre gloriam.

Cùm dignè loqui nequeam ;

De te tamen non fileam:
Amor facit ut audeam,
Cum solum de te gaudeam.

Tua Iesu dilectio,
Grata mentis refectio:
Replens sine fastidio,
Dans famem desiderio.

Qui te gustant, esuriunt:
Qui bibunt, adhuc sitiunt:
Desiderare nesciunt,
Nisi Iesum quem diligunt.

Quem tuus amor ebriat,
Nouit quid Iesus sapiat:
Quam felix est, quem satiat:
Non est ultra quod cupiat.

Iesu decus Angelicum,
In aure dulce canticum,
In ore mel mirificum,
In corde nectar calicum.

Desidero te millies:
Mi Iesu quando venies?
Me letum quando facies?
Me de te quando saties?

Amor tuus continuus,
Mihi languor assiduus:
Mihi Iesu mellifluus,
Fructus vite perpetuus.

Iesu summa benignitas,
Mira cordis incunditas:

Incomprehensa bonitas,
Tua me stringat charitas.

Bonum mihi diligere
Iesum, nil vltra querere;
Mihi prorsus deficere,
Vt illi queam viuere.

O Iesu mi dulcissime,
Spes suspirantis animæ:
Te quærunt piæ lachrymæ:
Te clamor mentis intimæ.

Quocunque loco fuero,
Mecum Iesum desidero:
Quàm lætus, cùm inuenero:
Quàm felix, cùm tenuero!

Tunc amplexus, tunc oscula,
Quæ vincunt mellis pocula:
Tunc felix Christi copula:
Sed in his parua morula.

Iam quod quæsiui video,
Quod concupiui teneo:
Amore Iesu langueo,
Et corde totus ardeo.

Iesus cùm sic diligitur,
Hic amor non extinguitur:
Non tepescit nec moritur,
Plus crescit & accenditur.

Hic amor ardet iugiter,
dulcescit mirabiliter:
Sapit delectabiliter.

Et delectat feliciter.

Hic amor missus cœlitus
Hæret mihi medullitus,
Mentem incendit penitus:
Hoc delectatur spiritus.

O beatum incendium,
Et ardens desiderium:
Dulce refrigerium,
Amare Dei filium.

Iesu flos matris virginis,
Amor nostræ dulcedinis:
Tibi laus, honor numinis,
Regnum beatitudinis.

Veni, veni, Rex optime,
Pater immensæ gloriæ:
Effulge clarè clariùs,
Iam expectatus sapius.

Iesu Sole serenior,
Et balsamo suavior,
Omni dulcore dulcior,
Præ cunctis amabilior.

Cuius gustus sic afficit,
Cuius odor sic reficit:
In quo mens mea deficit,
Solus amanti sufficit.

Tu mentis delectatio,
Amoris consummatio:
Tu mea gloriatio,
Iesu mundi saluatio.

Mi dilecte, reuertere, Consors pater-
næ dexteræ: Hostem vicisti prospere,
Iam cœli regno fruire. Sequar te quo-
quò ieris, Mihi tolli non poteris, Cùm
meum cor abstuleris. Iesu laus nostri ge-
neris. Cœli ciues occurrite, Portas ve-
stras attollite, Triumphatori dicite: Ave
Iesu Rex inclyte. Rex virtutum, Rex
gloriæ, Rex insignis victoriæ: Iesu lar-
gitor veniæ, Honor cœlestis curiæ. Tu
fons misericordiæ, Tu veræ lumen
patriæ: Pelle nubem tristitiæ, Dans
nobis lucem gloriæ. Te cœli chorus
prædicat, Et tuas laudes replicat: Iesus
orbem lætificat, Et nos Deo pacificat.
Iesus in pace imperat, Quæ omnem sen-
sum superat: Hanc mens mea deside-
rat, Et ea frui properat. Iesus ad Pa-
trem redijt, Cœleste regnum subiit:
Cor meum à me transijt, Post Iesum si-
mul abiit. Quem prosequamur laudi-
bus, Votis, hymnis, & precibus: Vt
nos donet cœlestibus cum ipso frui sedi-
bus, Amen.

G 3

Sebastiano
...

O Clemens, O Pia, O dulcis Virgo Maria.



PATER NOSTER. AVE MARIA.

ORATIONES DE VENERABILI SACRAMENTO.

Oratio S. Thomæ Aquinatis.

ADoro te supplex latens Deitas, quæ sub his figuris verè latitas. Tibi se cor meū totum subiicit: quia te contem- plans totum deficit. Visus, gustus, tactus in te fallitur: sed auditu solo in te credi- tur. Credo quidquid dixit Dei filius: ver- bo veritatis nihil verius. In cruce latebat sola Deitas: sed hīc latet simul & huma- nitas. Ambo tamen credens atque confi- tens, peto quod petiuit latro pœnitens. Plagas sicut Thomas non intueor: Deum tamen meum te confiteor. Fac me tibi semper magis credere, in te spem habere, te diligere. O memoriale mortis Domini: panis verus, vitam præstans homini. Præ- sta meę menti de te viuere: teq; illi sem- per dulce sapere. Pie pelicane Iesu Do- mine, me imatundū munda tuo sangui- ne: cuius vna stilla saluum facere totum mundum posset omni scelere. Iesu, quem velatum nunc aspicio, quando fiet istud quod tam sitio: vt reuelata cernens facie, visu sim beatus tuæ gloriæ? Amen.

Alia Oratio.

A Nima Christi sanctifica me, Corpus Christi salua me, Sanguis Christi inebria me, Aqua lateris Christi laua me, Passio Christi conforta me. O bone Iesu exaudi me, intra vulnera tua absconde me, ne permittas me separari à te, ab hoste maligno defende me, in hora mortis meæ voca me, & iube me venire ad te, vt cum Sanctis tuis laudem te in secula seculorum, Amen.

H Y M N V S S. T H O M Æ

A Q V I N A T I S.

P Ange lingua gloriosi
Corporis mysterium:
Sanguinisque pretiosi,
Quem in mundi pretium,
Fructus ventris generosi,
Rex effudit gentium.

Nobis datus, nobis natus
Ex intacta virgine,
Et in mundo conuersatus
Sparso verbi semine:
Sui moras incolatus
Miro clausit ordine.

In supremæ nocte cœnæ
Recumbens cum fratribus,
Observata lege plenè

Cibis

Cibis in legalibus,
Cibum turbæ duodenæ
Se dat suis manibus.

Verbum caro, panem verum,
Verbo carnem efficit:
Fitque sanguis Christi merum,
Etsi sensus deficit:
Ad firmandum cor syncerum
Sola fides sufficit.

Tantum ergo sacramentum
Veneremur cernui:
Et antiquum documentum
Nouo cedat ritui:
Præstet fides supplementum
Sensuum defectui.

Genitori genitoque
Laus & iubilatio,
Salus, honor, virtus quoque,
Sit & benedictio:
Procedenti ab utroque
Compar sit laudatio, Amen.

SEQUENTIA EIVSDEM A V T H O R I S.

Lauda Sion Salvatorem,
Lauda ducem & pastorem,
In hymnis & canticis.

Quantum potes, tantum aude:
Quia maior omni laude,

Nec laudare sufficis.

Laudis thema specialis,
Panis viuus & vitalis,
Hodie proponitur.

Quem in sacra mensa coenæ,
Turbæ fratrum duodenæ,
Datum non ambigitur.

Sit laus plena, sit sonora,
Sit iucunda, sit decora
Mentis iubilatio.

Dies enim solennis agitur,
In qua mensæ primò recolitur
Huius institutio.

In hac mensa noui regis,
Nouum pascha nouæ legis,
Phase vetus terminat.

Vetustatem nouitas,
Vmbra fugat veritas;
Noctem lux eliminat.

Quod in cœna Christus gessit,
Faciendum hoc expressit,
In sui memoriam.

Docti sacris institutis,
Panem vinum in salutis
Consecramus hostiam.

Dogma datur Christianis,
Quod in carnem transit panis,
Et vinum in sanguinem.

Quod non capis, quod non vides,

Ani-

Animosa firmat fides,
Præter rerum ordinem.

Sub diuersis speciebus,
Signis tantum, & non rebus,
Latent res eximæ.

Caro cibus, sanguis potus:
Manet Christus tamen totus,
Sub vtraque specie.

A Sumente non concisus,
Non confRACTus, non diuisus:
Integer accipitur.

Sumit vnus, sumunt mille:
Quantum isti, tantum ille,
Nec sumptus consumitur.

Sumunt boni, sumunt mali:
Sorte tamen inæquali,
Vitæ vel interitus.

Mors est malis, vita bonis:
Vide paris sumptionis,
Quàm sit dispar exitus.

Fracto demum sacramento,
Ne vacilles: sed memento,
Tantum esse sub fragmento,
Quantum toto tegitur.

Nulla rei fit scissura:
Signi tantum fit fractura:
Qua nec status, nec statura,
Signati minuitur.

Ecce panis Angelorum:

Factus cibus viatorum:

Verè panis filiorum,

Non mittendus canibus.

In figuris præsignatur.

Cùm Isaac immolatur,

Agnus paschæ deputatur:

Datur manna patribus.

Bone pastor, panis vere,

Iesu nostri miserere:

Tu nos pasce, nos tuere:

Tu nos bona fac videre,

In terra viuentium.

Tu qui cuncta scis & vales,

Qui nos pascis hîc mortales:

Tuos ibi commensales,

Cohæredes & sodales,

Fac sanctorum ciuium.

Amen. Alleluia.

Oratio.

DEus qui nobis sub Sacramento mirabili Passionis tuæ memoriam reliquisti, tribue, quæsumus, ita nos corporis & sanguinis tui sacra mysteria venerari, vt redemptionis tuæ fructum in nobis iugiter sentiamus. Qui viuis & regnas cum Deo Patre, in vnitate Spiritus sancti Deus, per omnia secula seculorum, Amen.

*Alia ex B. Ambrosio in prec. præparat.
ad Missam.*

S Vmme Sacerdos & vere Pontifex Iesu Christe, qui obtulisti te Deo Patri, in ara Crucis Hostiam putam & immaculatam pro nobis miseris Peccatoribus, & qui dedisti nobis Carnem tuam ad manducandum, & Sanguinem tuum ad bibendum, fac me per Gratiam tuam semper illud de tanto Mysterio credere, & intelligere, sentire, & firmiter retinere, dicere, & cogitare, quod tibi placet, & expedit Animæ meæ.

Panis sancte, panis viue, panis pulcher, panis munde, qui descendisti de Cælo, & das vitam mundo. Veni in cor meum, & munda me ab omni inquinamento carnis & spiritus, intra in Animam meam, sana eam interiùs & exteriùs. Esto tutamentum & perpetua salus Corporis & Animæ meæ.

Repelle à me insidiantes mihi hostes, Recedant procul à præsentia tua, vt foris & intus per te munitus, recto tramite perueniam ad Regnum tuum, vbi non mysterijs, sicut in hoc tempore agitur, sed facie ad faciem te videbimus, cum tradideris Regnum Deo Patri, & erit Deus omnia in omnibus. Tunc me de te satiabis satietate mirifica, vt nec esuriam nec sitiam in æternum. Qui cum eodem Deo Patre & Spiritu sancto viuis & regnas per omnia secula seculorum. Amen.

Sub tuum praesidium confugimus S. Dei Genitrix.



*M. de Vos inuent.
Ioan. Collaert sculp.*

PATER NOSTER. AVE MARIA.

LITANIÆ QVÆ SINGV-

LIS DIEBVS FESTIS B. V.

& sabbati in Sacra Lauretana

æde Decantantur.

K Yrie eleison.

Christe eleison.

Kyrie eleison. Christe audi nos.

Christe exaudi nos.

Pater de cœlis Deus, Miserere nobis.

Fili redēptor mundi Deus, Miserere no.

Spiritus sancte Deus, Miserere nobis.

Sancta Trinitas vnus Deus, Miserere no.

Sancta Maria,

Sancta Dei genitrix,

Sancta virgo virginum,

Mater Christi,

Mater Diuinæ gratiæ,

Mater purissima

Mater castissima,

Mater inuiolata,

Mater intemerata,

Mater amabilis

Mater admirabilis,

Mater creatoris,

Mater saluatoris,

Virgo prudentissima,

Virgo veneranda,

Virgo prædicanda,

Ora pro nobis.

Virgo

Virgo potens,
Virgo clemens,
Virgo fidelis,
Speculum iustitiæ,
Sedes sapientiæ,
Causa nostræ lætitiæ,
Vas spirituale,
Vas honorabile,
Vas insigne deuotionis,
Rosa mystica,
Turris Daudica,
Turris eburnea,
Domus aurea,
Fœderis Arca,
Ianua Cœli,
Stella matutina,
Salus infirmorum,
Refugium peccatorum,
Consolatrix afflictorum,
Regina Angelorum,
Regina Patriarcharum,
Regina Prophetarum,
Regina Apostolorum,
Regina Martyrum,
Regina Confessorum,
Regina Virginum,
Regina Sanctorum omnium,
Agnus Dei, qui tollis peccata mundi,
parce nobis Domine.

Ora pro nobis.

Agnus

Agnus Dei , qui tollis peccata mundi,
exaudi nos Domine.

Agnus Dei , qui tollis peccata mundi,
miserere nobis.

Oremus.

GRatiam tuam, quæsumus Domi-
ne, mentibus nostris infunde, vt
qui Angelo nunciante Christi filij tui in-
carnationem cognouimus, per passionem
eius & Crucem, ad resurrectionis glori-
am perducamur. Per eundem Christum
Dominum nostrum, Amen.

Adoro te supplex, latens Deitas.



I. Collaert sculp.

PATER NOSTER. AVE MARIA.

ALIAE LITANIAE B. MARIAE
VIRGINIS IN AED
Lauretana dici solita.

K Yrie eleison.
Christe eleison.

Kyrie eleison.

Christe audi nos.

Christe exaudi nos.

Pater de cœlis Deus, Misere nobis.

Fili Redemptor mundi Deus, Misere.

Spiritus sancte Deus, Misere nobis.

Sancta Trinitas vnus Deus, Misere no.

Sancta Maria,

Sancta virgo virginum,

Mater viuentium,

Mater pulchræ dilectionis,

Mater sanctæ spei,

Paradisus voluptatis,

Lignum vitæ,

Domus sapientiæ,

Porta cœli,

Desiderium collium æternorum,

Ciuitas refugii,

Gloria Hierusalem,

Sanctuarium Dei,

Tabernaculum fœderis,

Altare thymiamatis,

Ora pro nobis.

Scala

Scala Iacob,
Speculum sine macula,
Lilium inter spinas,
Rubus ardens incumbustus,
Vellus Gedeonis,
Thronus Salomonis,
Turris eburnea,
Fauus distillans,
Hortus conclusus,
Fons signatus,
Puteus aquarum viuentium,
Nauis institoris de longè portans
panem.

Ora pro nobis.

Stella matutina,
Aurora confurgens,
Pulchra, vt Luna,
Electa vt Sol,
Castrorum acies ordinata.

Solium gloriæ Dei,
A cunctis periculis, libera nos Virgo
gloriosa.

Per salutarem Conceptionem tuam,
libera nos Virgo gloriosa.

Per sanctam Natiuitatem tuam, libera
nos Virgo gloriosa.

Per admirabilem Annunciationem tuam,
libera nos Virgo gloriosa.

Per immaculatam Purificationem tuam,
libera nos Virgo gloriosa.

Per

Per gloriosam Assumptionem tuam,
libera nos Virgo gloriosa.

Peccatores, Te rogamus audi nos.

Vt veram poenitentiam nobis impetrare
digneris, Te rogamus audi nos.

Vt societates tibi peculiari obsequio de-
uotas conseruare & augere digneris,
Te rogamus audi nos.

Vt Ecclesiæ sanctæ cunctoque populo
Christiano pacem & vnitatem impe-
trare digneris, Te rogamus audi nos.

Vt omnibus fidelibus defunctis requiem
æternam impetrare digneris, Te ro-
gamus audi nos.

Mater Dei, Te rogamus audi nos.

Agnus Dei, qui tollis peccata mundi,
Parce nobis Domine.

Agnus Dei, qui tollis peccata mundi,
Exaudi nos Domine.

Agnus Dei, qui tollis peccata mundi,
Miserere nobis.

Vers. Ora pro nobis sancta Dei Genitrix.

Resp. Vt digni efficiamur promissionibus
Christi.

Oremus.

Pietate tua, quaesumus Domine, no-
strorum solue vincula peccatorum, &
intercedente Beata Maria, cum omni-
bus

bus Sanctis tuis, nos famulos tuos, benefactores, atque loca nostra in omni sanctitate custodi, omnesque consanguinitate, affinitate, atque familiaritate nobis coniunctos, à vitijs purga, virtutibus illustra, pacem & salutem nobis tribue, hostes visibiles & invisibiles remoue; carnalia desideria repelle; aërem salubrem & fertilitatem indulge, amicis, & inimicis nostris charitatem largire, atque Oppidum Lauretanum, cum omnibus in eo habitantibus ab omni peste, infideliumque feritate & potentia illæsum conserva, & omnibus fidelibus vivis & defunctis in terra viventium vitam & requiem æternā concede, & Pontificem nostrum N. Protectorem, omnes Prælatos, & cunctum populum Christianum ab omni aduersitate custodi; & benedictio tua sit super nos semper. Per Christum Dominum nostrum. Amen.

Planctus B. Mariæ Virginis.

S Tabat mater dolorosa,
Iuxta crucem lachrymosa,
Dum pendeat Filius.

Cuius animam gementem,
Contristantem & dolentem,
Pertransiuit gladius.

Ⓞ quàm

O quàm tristis & afflicta
Fuit illa benedicta,
Mater vnigeniti.

Quæ mœrebat & dolebat,
Et tremebat, cùm videbat
Nati pœnas inclyti.

Quis est homo qui non fleret,
Christi matrem si videret
In tanto supplicio?

Quis posset non contristari,
Piam matrem contemplari,
Dolentem cum filio?

Pro peccatis suæ gentis,
Vidit Iesum in tormentis,
Et flagellis subditum.

Vidit suum dulcem natum,
Morientem desolatum,
Dum emisit spiritum.

Eia mater fons amoris,
Me sentire vim doloris,
Fac vt tecum lugeam.

Fac vt ardeat cor meum,
In amando Christum Deum,
Vt sibi complaceam.

Sancta mater istud agas,
Crucifixi fige plagas
Cordi meo valide.

Tui nati vulnerati,
Tam dignati pro me pati,

Pœnas mecum diuide.

Fac me verè tecum flere,
Crucifixo condolere,
Donec ego vixero.

Iuxta crucem tecum stare,
Te libenter sociare,
In planctu desidero.

Virgo virginum præclara,
Mihi iam non sis amara,
Fac me tecum plangere.

Fac vt portem Christi mortem,
Passionis eius sortem,
Et plagas recolere.

Fac me plagis vulnerari,
Cruce fac inebriari,
Ob amorem filij.

Inflammatum & accensus,
Per te virgo sim defensus
In die iudicij.

Fac me cruce custodiri,
Morte Christi præmuniri,
Confoueri gratia.

Quando corpus morietur,
Fac vt animæ donetur
Paradisi gloria, Amen.

Vers. Tuam ipsius animam doloris gla-
dius pertransiuit.

Resp. Vt reuelentur ex multis cordibus
cogitationes.

Oratio.

Oratio.

INterueniat pro nobis, quęsumus Domine Iesu Christe , nunc & in hora mortis nostrę, apud tuam clementiam beata virgo Maria mater tua , cuius sacratissimam animam, in hora tuę passionis , doloris gladius pertransiuit . Per te Iesu Christe Saluator mundi: Qui cum Patre & Spiritu sancto viuis & regnas Deus , in secula seculorum.

Concede nos famulos tuos , quęsumus Domine Deus , perpetua mentis & corporis sanitate gaudere , & gloriosa beatę Marię semper virginis intercessionē à pręsenti liberari tristitia , & æterna perfrui lætitia.

Deus qui corda fidelium sancti Spiritus illustratione docuisti, da nobis in eodem Spiritu recta sapere, & de eius semper consolatione gaudere.

Ecclesię tuę, quęsumus Domine, preces placatus admitte: vt destructis aduersitatibus , & erroribus vniuersis , secura tibi seruiat libertate.

Deus omnium fidelium Pastor & Rector , famulum tuum N. quem Pastorem Ecclesię tuę pręesse voluisti , propitius respice : da ei , quęsumus , verbo

H

&

& exemplo, quibus præest, proficere, vt ad vitam, vnâ cum grege sibi credito, perueniat sempiternam.

Defende, quæsumus Domine, beata Maria semper virgine intercedente, istam ab omni aduersitate familiam; & toto corde tibi prostratam, ab hostium propitius tuere clementer insidijs.

Omnipotens sempiterne Deus, qui facis mirabilia magna solus, prætende super famulos tuos, & super congregationes illis commissas, Spiritum gratiæ salutaris: & vt in veritate tibi placeant, perpetuum eis rorem tuæ benedictionis infunde.

Deus largitor pacis, & amator charitatis, da famulis tuis veram cum tua voluntate concordiam, vt ab omnibus, quæ nos pulsan, tentationibus liberemur. Per Christum Dominum nostrum. Amen.

C O M M E N D A T I O A D V I R G I N E M M A R I A M.

O Domina mea, sancta Maria, me in tuam benedictam fidem, ac singularem custodiam, & in sinum misericordiæ tuæ, hodie & quotidie, & in hora exitus mei, & animam meam, & corpus

corpus meum tibi commendo : omnem
spem meam & consolationem meam,
omnes angustias & miseras meas, vitam
& finem vitæ meæ tibi committo : vt
per tuam sanctissimam intercessionem,
& per tua merita , omnia mea dirigantur
& disponantur opera , secundum tuam
tuique filij voluntatem, Amen.

Alia Oratio ad Virginem.

O Maria , Dei genitrix , & virgo gra-
tiosa, omnium desolatorum ad te
clamantium consolatrix vera , per illud
magnum gaudium , quo consolata es,
quando cognouisti Dominum Iesum die
tertia à mortuis impassibilem resurrexis-
se , sis consolatrix animæ meæ : & apud
eundem tuum & Dei Natum vnigeni-
tum , in die nouissimo , quando cum
anima & corpore ero resurrecturus, & de
singulis meis factis rationem redditurus,
me digneris iuuare : vt perpetuæ dam-
nationis sententiam per te, pia mater &
virgo, valeam euadere , & cum electis
Dei omnibus ad æterna gaudia feliciter
peruenire. Amen.

A N T I P H O N A E D E B. M A R I A V I R G I N E,

A Dominica prima Aduentus, vsque ad Purificationem inclusuè.

A Lma Redemptoris mater, quæ
peruia cæli

Porta manes, & stella maris, succur-
re cadenti,

Surgere qui curat, populo: tu quæ ge-
nuisti,

Natura mirante, tuum sanctum geni-
torem,

Virgo prius ac posterius, Gabriëlis ab
ore

Sumens illud Ave, peccatorum miserere.

In Aduentu, Vers. Angelus Domini
nunciauit Mariæ.

Resp. Et concepit de Spiritu sancto.

Oremus. *Oratio.*

G Ratiam tuam, quæsumus Domine,
mentibus nostris infunde: vt qui
Angelo nunciante Christi Filij tui incar-
nationem cognouimus, per passionem
eius & crucem ad resurrectionis gloriam
perducamur: Per eundem Christum
Dominum nostrum.

Resp. Amen.

Post

Post Natiuitatem. Vers. Post partum
virgo inuiolata permanſiſti.

Reſp. Deigenitrix intercede pro nobis.
Oremus. *Oratio.*

DEus, qui ſalutis æternæ, beatę Marię
virginitate ſecunda, humano gene-
ri præmia præſtituisti: tribue quaſumus,
vt ipſam pro nobis intercedere ſentia-
mus, per quam meruimus auctorem vitæ
ſuſcipere, Dominũ noſtrum Ieſum Chri-
ſtum Filium tuum. *Reſp.* Amen.

*A Purificatione vſque ad Feriam quintam in
Cæna Domini excluſiue, Antiphora.*

A Ve Regina cælorum,
Aue Domina Angelorum:
Salve radix ſancta,
Ex qua mundo lux eſt orta.

Gaude glorioſa,
Super omnes ſpecioſa.
Vale valde decora,
Et pro nobis ſemper Chriſtum exora.

Vers. Dignare me laudare te virgo ſa-
crata.

Reſp. Da mihi virtutẽ contra hoſtes tuos.
Oremus. *Oratio.*

COncede miſericors Deus fragilitati
noſtrę præſidium: vt qui ſanctę Dei
genitricis memoriam agimus, interceſſio-
nis eius auxilio à noſtris iniquitatibus

resurgamus. Per eundem Christum Dominum nostrum. *Resp.* Amen.

Tempore Paschali vsque ad Octauam Pentecostes exclusiue, Antiphona.

Regina cæli lætare, alleluia. Quia quem meruisti portare, alleluia. Resurrexit, sicut dixit, alleluia. Ora pro nobis Deum, alleluia.

Vers. Gaude & lætare virgo Maria, alleluia.

Resp. Quia surrexit Dñs verè, alleluia.

Oremus.

Deus qui per resurrectionem Filij tui Domini nostri Iesu Christi, familiam tuã lætificare dignatus es: præsta quæsumus, vt per eius genitricem virginem Mariam, perpetuè capiamus gaudia vitæ. Per eundem Christum Dominum nostrum. *Resp.* Amen.

Ab Octaua Pentecostes vsque ad Aduentum exclusiue, Antiphona.

Salue Regina, mater misericordiæ. Vita, dulcedo, & spes nostra salue. Ad te clamamus exules filij Eux. Ad te suspiramus, gementes & flentes in hac lachrymarum valle. Eia ergo aduocata nostra, illos tuos misericordes oculos ad

nos

nos conuerte. Et Iesum, benedictum fructum ventris tui, nobis post hoc exilium ostende. O clemens, ô pia, ô dulcis virgo Maria.

Vers. Ora pro nobis sancta Dei genitrix,

Resp. Vt digni efficiamur promissionibus Christi.

Oremus.

OMnipotens sempiterne Deus, qui gloriosæ Virginis matris Mariæ corpus & animam, vt dignum filij tui habitaculum effici mereretur, Spiritu sancto cooperante præparasti: da, vt cuius commemoratione lætatur: eius pia intercessione ab instantibus malis & à morte perpetua liberemur. Per eundem Christum Dominum nostrum.

Resp. Amen.

Vers. Diuinum auxilium maneat semper nobiscum.

Resp. Amen.

Tuam ipsius animam pertransibit gladius.



M. de Vos invenc. J. Collaert sculp.

5. PATER NOSTER.

EXERCITIUM
QVOTIDIANVM,

*Cum manè surgis, munies te signo
sanctæ crucis, dic :*

In nomine Patris, & Filij, & Spiritus
sancti, Amen.

Benedicta sit sancta & indiuidua Trini-
tas, nunc, & semper, & per infinita
secula seculorum.

Pater noster, qui es in cælis. Sancti-
ficetur nomen tuum. Adueniat
regnum tuum. Fiat voluntas tua, sicut
in cælo & in terra. Panem nostrum quo-
tidianum da nobis hodie. Et dimitte no-
bis debita nostra, sicut & nos dimitti-
mus debitoribus nostris. Et ne nos in-
ducas in tentationem. Sed libera nos à
malo. Amen.

Ave Maria, gratia plena, Dominus
tecum: benedicta tu in mulieribus,
& benedictus fructus ventris tui Iesus.
Sancta Maria, mater Dei, ora pro nobis
peccatoribus, nunc, & in hora mor-
tis nostræ. Amen.

H 5

Credo

Credo in Deum Patrem omnipotentem , creatorem cæli & terræ. Et in Iesum Christum , Filium eius unicum ; Dominum nostrum. Qui conceptus est de Spiritu sancto , natus ex Maria virgine. Passus sub Pontio Pilato , crucifixus , mortuus , & sepultus. Descendit ad inferna : tertia die resurrexit à mortuis . Ascendit ad cælos: sedet ad dexteram Dei Patris omnipotentis. Inde venturus est iudicare viuos & mortuos. Credo in Spiritum sanctum . Sanctam Ecclesiam Catholicam, Sanctorum communionem. Remissionem peccatorum, carnis resurrectionem . Et vitam æternam. Amen.

Confiteor Deo omnipotenti , beatæ Mariæ semper virgini , beato Michaëli Archangelo , beato Ioanni Baptiste, sanctis Apostolis Petro & Paulo , & omnibus Sanctis, quia peccaui nimis cogitatione, verbo, & opere, mea culpa, mea culpa, mea maxima culpa. Ideo precor beatam Mariam semper virginē, beatum Michaëlem Archangelum, beatum Ioannem Baptistam, sanctos Apostolos Petrum & Paulum, & omnes Sanctos, orare pro me ad Dominum Deum nostrum.

Misere-

Misereatur nostri omnipotens Deus:
& dimissis omnibus peccatis no-
stris, perducatur nos ad vitam æternam.

Resp. Amen.

Indulgentiam, absolutionem, & remis-
sionem omnium peccatorum nostrorum,
tribuat nobis omnipotens & misericors
Dominus. *Resp. Amen.*

Dignare Domine die isto sine peccato
nos custodire. Misere nostri Domine,
misere nostri. Fiat misericordia tua Do-
mine super nos, quemadmodum spera-
uimus in te. Domine exaudi orationem
meam, & clamor meus ad te veniat.

Oratio.

Domine Deus omnipotens, qui ad
principium huius diei nos perue-
nire fecisti: tua nos hodie salua virtute:
vt in hac die ad nullum declinemus pec-
catum, sed semper ad tuam iustitiam fa-
ciendam, nostra procedant eloquia, diri-
gantur cogitationes & opera. Per Chri-
stum Dominum nostrum, Amen.

Oratio.

Angele, qui meus es custos pietate
superna, me tibi commissum serua,
defende, gubernare. Amen.

Benedictio. Dominus nos benedicat,
& ab omni malo defendat, & ad vitam

perducatur æternam: & fidelium animæ
per misericordiam Dei requiescant in
pace, Amen.

*Cum manè, meridie, & vesperi salutationis
Angelicæ signum datur.*

Angelus Domini nunciauit Mariæ, &
concepit de Spiritu sancto. Ave Maria.

Ecce ancilla Domini, fiat mihi secun-
dum verbum tuum. Ave Maria, &c.

Et verbum caro factum est,
& habitauit in nobis. Ave Maria, &c.

Oratio.

Gratiam tuâ, quæsumus Dñe, men-
tibus nostris infunde: vt qui Ange-
lo nunciante, Christi Filij tui incarna-
tionem cognouimus, per passionem eius
& crucem, ad resurrectionis gloriam per-
ducamur. Per eundem Christum Domi-
num nostrum, Amen.

Fidelium animæ per misericordiam Dei
requiescant in pace, Amen.

Ante inchoationem Officij.

Oratio.

Actiones nostras, quæsumus Domi-
ne, aspirando præueni, & adiuuân-
do prosequere: vt cuncta nostra oratio &
operatio à te semper incipiat, & per te cœ-
pta finiatur. Per Christum Dñm nostrum. Am.

Post

Post officium. Oratio.

SVscipe clementissime Deus, precibus
& meritis beatæ Mariæ semper virgi-
nis, & omnium Sanctorū & Sanctarum,
officium seruitutis nostræ: & si quid di-
gnum laude egimus, propitius respice: &
quod negligenter actum est, clementer
ignosce. Qui in Trinitate perfecta viuis
& regnas Deus, per omnia secula seculo-
rum. Amen.

In aspersione aquæ benedictæ.

Asperges me Domine hyssopo, & mū-
dabor: lauabis me, & super niuem deal-
babor.

*Ad sacrosanctum Eucharistiæ Sacra-
mentum. Oratio.*

Aue verum corpus natum de Maria
virgine. Verè passum, immolatum in
cruce pro homine. Cuius latus perforatū,
vnda fluxit sanguine. Esto nobis prægu-
statum mortis in examine. O dulcis, O
pie: O Iesu fili Mariæ, miserere mei. Amē.

Oratio ante Missam.

CLementissime Pater misericordia-
rum, & Deus totius consolationis,
qui non semel tantū Filium tuum vni-
genitum in cruce nostræ reparationi im-
pendisti, sed eius oblationem, tibi accep-
tissimam, in Ecclesia tua quotidie reno-

uari, ad eius fructum in nobis renouandum, voluisti: tribue nobis quæsumus, tam admirando huic, & tam salutari tuæ pietatis mysterio, sic attentè, reuerenter, & amanter interesse, vt eius participationem quàm efficacissimè consequi valeamus. Per eundem Dominum. &c.

Benedictio mensæ pro secularibus.

Benedicite. *Resp.* Dominus. *Oratio.* Benedic, Domine, nos, & hæc tua dona, quæ de tua largitate sumus sumpturi. Per Christum Dominum nostrum.

Resp. Amen.

Gratiarum actio post mensam. Benedicamus Domino. *Resp.* Deo gratias.

Oratio. Agimus tibi gratias omnipotens Deus, pro vniuersis beneficijs tuis. Qui viuis & regnas in secula seculorum.

Resp. Amen. Kyrie eleison. Christe eleison. Kyrie eleison. Pater noster.

secretò. Vers. Et ne nos inducas in tentationem. *Resp.* Sed libera nos à malo.

Vers. Sit nomen Domini benedictum.

Resp. Ex hoc nunc & vsque in seculum.

Oremus.

R Etribuere dignare, Domine, omnibus nobis bona facientibus propter nomen tuum vitam æternā. *Res.* Amen.

Vers. Et fidelium animæ per misericordiam

diam Dei requiescant in pace. *Res. Amē.*

*Cū vadis dormitum, muniens te signo
S. Crucis, dic:*

In nomine Patris, & Filij, & Spiritus
sancti, Amen.

*Examen conscientiae, puncta quinque
complectens.*

1. Domino nostro Deo, pro beneficijs acceptis, gratiae agenda sunt.
2. Ab eodem, pro cognitione & expulsionem peccatorū, gratia efflagitanda est.
3. De admissis praesenti die peccatis ratio ab anima nostra exigenda est, per horas singulas, ex quo surreximus, vestigando. Et primò quidem circa cogitationem, deinde circa loquelam, atque operationem.
4. Expetenda est venia de delictis.
5. Proponenda est, cum Dei gratia, emendatio.

Deinde iunctis manibus: Benedicta sit sancta & indiuidua Trinitas, nunc, & semper, & per infinita seculorum secula.

Pater noster. Ave Maria. Credo.
Confiteor. &c. *vt supra.*

Hymnus.

TE lucis ante terminum,
Rerum creator poscimus!

Vt solita clementia,
Sis præsul ad custodiam.
Procul recedant somnia,
Et noctium phantasmata:
Hostemque nostrum comprime,
Ne polluantur corpora.

Præsta Pater omnipotens,
Per Iesum Christum Dominum:
Qui tecum in perpetuum
Regnat cum sancto Spiritu. Amen.

Antiph. Salua nos Domine vigilantes, custodi nos dormientes: vt vigilemus cum Christo, & requiescamus in pace. Custodi nos Domine vt pupillam oculi: sub vmbra alarum tuarum protege nos. Dignare Domine nocte ista sine peccato nos custodire. Miserere nostri Domine, miserere nostri. Fiat misericordia tua Domine super nos, quemadmodum sperauimus in te. Domine exaudi orationem meam, & clamor meus ad te veniat.

Oratio.

Visita quæsumus Domine habitacionem istam, & omnes insidias inimici ab ea longè repelle: Angeli tui sancti habitent in ea, qui nos in pace custodiât, & benedictio tua sit super nos semper. Per Christum Dominum nostrum. Amen.
Angeles

Angele Dei, qui cultos es mei, me tibi commissum pietate superna, hac nocte illumina, custodi, rege, gubernare. Amen. *Benedictio.* Benedicat & custodiat nos omnipotens & misericors Dominus, Pater, & Filius, & Spiritus sanctus. Amen.

*Oratio præparatoria ad Confessionem
Sacramentalem.*

Conditor cali & terræ, Rex regum, & Dominus dominantium, qui me de nihilo fecisti ad imaginem & similitudinem tuam, & me proprio tuo sanguine redemisti, quem ego peccator non sum dignus nominare, nec inuocare, nec corde cogitare. Te suppliciter deprecor, & humiliter exoro, ut clementer respicias me seruum tuum nequam. Et miserere mei, qui misertus fuisti mulieri Cananæ, & Mariæ Magdalænæ: qui pepercisti publicano, & latroni in cruce pendenti. Tibi cōfiteor Pater pijsime peccata mea: quæ si volo abscondere, non possum tibi Domine. Parce mihi Christe, quem ego nuper multū offendi, cogitando, loquendo, operando, & in omnibus modis, in quibus ego fragilis homo & peccator peccare potui, mea culpa, mea culpa, mea maxima

maxima culpa. Ideo Domine precor tuâ clementiam, qui de celo pro mea salute descendisti, qui David à peccati lapsu erexisti, parce mihi Domine, parce mihi Christe, qui Petro te neganti pepercisti. Tu es creator meus, & redemptor meus, Dominus meus, & saluator meus; rex meus, & Deus meus. Tu es spes mea, & fiducia mea; gubernatio mea, & auxilatio mea; cōsolatio mea, & fortitudo mea; defensio mea, & liberatio mea; vita mea, salus mea, & resurrectio mea, lumen meū, & desiderium meum; adiutorium meum, & patrociniū meum. Te deprecor & rogo adiuua me, & saluus ero: governa me, & defende me: cōforta me, & consolare me: confirma me, & lætifica me: illumina me, & visita me. Suscita me mortuum, quia factura & opus tuū sum. Domine ne despicias me, quia famulus & servus tuus sum, quamvis malus, quamvis indignus & peccator, sed qualiscunq; sim, siue bonus, siue malus, semper tuus sum. Ad quem ergo fugiam, nisi ad te vadam? Si tu me elicis, quis me recipiet? si tu me despicias, quis me aspiciet? Recognosce me ergo indignū ad te refugientem, quamvis sim vilis & immundus: quia si vilis & immundus sum, potes me munda-

mundare: si cæcus sum, potes me illuminare: si infirmus sum, potes me sanare: si mortuus & sepultus sum, potes me resuscitare: quia maior est misericordia tua, quàm iniquitas mea: maior est pietas tua, quàm impietas mea: plus potes dimittere, quàm ego cõmittere; & plus parcere quàm ego peccator peccare. Non ergo despicias Domine, neque attendas multitudinem iniquitatum mearum: sed secundũ multitudinem miserationum tuarũ miserere mei, & propitius esto mihi maximo peccatori. Dic animæ meæ: Salus tua ego sum. Qui dixisti; Nolo mortem peccatoris, sed magis vt conuertatur & viuat: cõuertere me Domine ad te, & noli irasci cõtra me. Deprecor te clementissime Pater propter misericordiam tuam, supplico & exoro, vt perducas me ad bonum finem, ad veram pœnitentiam, puram confessionem, & dignam satisfactionem omnium peccatorum meorum, Amen.

Oratio ante confessionem Sacramentalem.

S Vicipe confessionem meã, piissime ac clemētissime Dñe Iesu Christe, vnica spes salutis animę meę, & da mihi (obsecro) contritionem cordis, & lachrymas oculis meis, vt defleã diebus ac noctibus
omnes

omnes negligentias meas cū humilitate
& puritate cordis. Appropinquet oratio
mea in conspectu tuo Domine. Si iratus
fueris contra me, quem adiutorē quēram?
quis miserebitur iniquitatibus meis? Me-
mento mei Domine, qui Cananæam &
Publicanū vocasti ad pœnitentiā, & Pe-
trum lachrymantē suscepisti, Dñe Deus
meus, suscipe preces meas. Saluator mūdi
Iesu bone, qui te crucis morti dedisti, vt
peccatores saluos faceres, respice me mi-
serū peccatorē, inuocantē nomen tuū: &
noli sic attendere malū meū, vt obliuif-
caris bonū tuum: & si commisi vnde me
damnare potes, tu nō amisisti vnde salua-
re soles. Parce ergo mihi, qui es saluator
meus, & misere peccatrici animæ meæ.
Solue vincula eius, sana vulnera. Domine
Iesu, te desidero, te quēro, te volo: ostende
mihi faciē tuā, & saluus ero. Emitte igitur
pijsime Dñe, meritis purissimæ & imma-
culatæ semper virginis genitricis tuæ
Mariæ, & Sanctorū tuorum, lucem tuam,
& veritatem tuam in animam meam,
quæ omnes defectus meos in veritate
mihi ostendat, quos confiteri me oport-
et, atque iuuēt & doceat ipsos plenē &
contrito corde explicare. Qui viuis &
regnas.

Oratio post confessionem.

SIt tibi Domine, obsecro, meritis beatę semper virginis genitricis tuę Marię, & omnium Sanctorum, grata & accepta ista confessio mea: & quicquid mihi defuit nunc & aliàs de sufficientia contritionis, de puritate & integritate confessionis, suppleat pietas & misericordia tua, & secundum illam digneris me habere plenius & perfectius absolutum in cælo. Qui viuis, &c.

ORATIO ANTE SAN-
CTAM COMMVNIONEM.

AD mensam dulcissimi conuiuij tui, pie Domine Iesu Christe, ego peccator de propriis meritis nihil præsumens, sed de tua confidens misericordia & bonitate, accedere vereor, & contemisco. Nam cor & corpus habeo multis criminibus maculatum, mentem & linguam non cautè custoditam. Ergo ô pia deitas, ô tremenda maiestas, ego miser inter angustias deprehensus, ad te fontem misericordię recurro, ad te festino sanandus: sub tuam protectionem fugio: & quem iudicem sustinere nequeo, saluatorem habere suspiro. Tibi Domine plagas meas ostendo: tibi verecundiam meã dete-

detego. Scio peccata mea multa & magna, pro quibus timeo. Spero misericordias tuas, quarum non est numerus. Respice in me oculis misericordiæ tuæ, Domine Iesu Christe, Rex æternæ, Deus & homo, crucifixus propter hominem. Exaudi me sperantem in te: miserere mei pleni miserijs & peccatis: tu qui fontem miserationis nunquam manare cessabis. Salve salutaris victima, pro me & omni humano genere, in patibulo crucis oblata. Salve nobilis & pretiose sanguis, de vulneribus crucifixi Domini mei Iesu Christi profluens, & peccata totius mundi abluens. Recordare Dñe creaturæ tuæ, quam tuo sanguine redemisti: pœnitet me peccasse; cupio emendare quod feci. Aufer ergo à me, clementissime Pater, omnes iniquitates & peccata mea: vt purificatus mēte & corpore, dignè degustare merear sancta sanctorū: & concede, vt sancta prælibatio corporis & sanguinis tui, quam ego indignus sumere intendo, sit peccatorū meorum remissio, sit delictorū perfecta purgatio, sit turpiū cogitationum effugatio, bonorumq; sensuum regeneratio, operumque tibi placentiū salubris efficacia, animę quoq; & corporis, contra inimicorū meorū insidias, firmissima tuitio. Am.

Alia

*Alia Oratio sancti Thomæ Aquinatis
ante Communionem.*

Omnipotens sempiterne Deus, ecce accedo ad Sacramentum vnigeniti Filij tui Domini nostri Iesu Christi. Accedo tanquam infirmus ad medicū vitæ, immundus ad fontē misericordiæ, cæcus ad lumen claritatis eterne, pauper & egenus ad Dominū cæli & terræ. Rogo ergo immensæ largitatis tuæ abundantiam, quatenus meam curare digneris infirmitatē, lauare fœditatem, illuminare cæcitatem, ditare paupertatem, vestire nuditatem: vt te panem Angelorum, Regem regum, Dominum dominantium, tanta suscipiā reuerentia & humilitate, tanta contritione & deuotione, tāta puritate & fide, tali proposito & intentione, sicut expedit salutis animæ meæ. Da mihi quæso, Domini corporis & sanguinis non solū suscipere Sacramentum, sed etiam rem & virtutem Sacramenti. O mitissime Deus, da mihi corpus vnigeniti Filij tui Domini nostri Iesu Christi, quod traxit de virgine Maria, sic suscipere, vt corpori suo mystico merear incorporari, & inter eius membra connumerari. O amantissime Pater, cōcede mihi dilectum Filiū tuum, quem

quem nunc velatum in via suscipere propono, reuelata tandem facie perpetuò contemplari. Qui tecum, &c.

*Oratio S. Thomæ Aquinatis post
Communionem.*

Gratias tibi ago Domine sancte, Pater omnipotens, æterne Deus, qui me peccatorem indignum famulū tuum, nullis meis meritis, sed sola dignatione misericordiæ tuæ, satiare dignatus es pretioso corpore & sanguine Filij tui Domini nostri Iesu Christi. Et deprecor, vt hæc sancta Communio non sit mihi reatus ad pœnam, sed intercessio salutaris ad veniam. Sit mihi armatura fidei, & scutum bonæ voluntatis. Sit vitiorum meorum euacuatio, cōcupiscentiæ & libidinis exterminatio, charitatis & patientiæ, humilitatis & obedienciæ augmētatio, contra insidias inimicorum omniū, tam visibiliū quàm inuisibilium, firma defensio: motuum meorum, tam carnalium quàm spiritualium, perfecta quietatio, in te vno ac vero Deo firma adhēsio, atque mei finis felix consummatio. Et precor te, vt ad illud ineffabile conuiuium me peccatorem perducere digneris: vbi tu cū Filio tuo, & Spiritu sancto, Sanctis tuis es
lux

lux vera, satietas plena, gaudium sempiternum, iucunditas consummata, & felicitas perfecta. Per Christum Dominum nostrum.

*Alia Oratio S. Bonauenturae post
Communionem.*

TRansfige, dulcissime Domine Iesu, medullas & viscera animæ meæ, suauissimo ac saluberrimo amoris tui vulnere, vera serenaque & Apostolica sanctissima charitate, vt langueat & liquefiat anima mea solo semper amore & desiderio tui: te concupiscat, & deficiat in atria tua: cupiat dissolui, & esse tecum. Da, vt anima mea te esuriat, panem Angelorum, refectionem animarum sanctarum, panem nostrum quotidianum, supersubstantialem, habentem omnem dulcedinem & saporem, & omne delectamentum suauitatis: te, in quem desiderant Angeli prospicere, semper esuriat, & comedat cor meum, & dulcedine saporis tui repleantur viscera animæ meæ: te semper sitiât fontem vitæ, fontem sapientiæ & scientiæ, fontem æterni luminis, torrentem voluptatis, vbertatem domus Dei: te semper
I ambiat,

ambiat, te quærat, te inueniat, ad te tendat, ad te perueniat, te meditetur, te loquatur, & omnia operetur in laudem & gloriam nominis tui, cum humilitate & discretione, cum dilectione & delectatione, cum facilitate & affectu, cum perseverantia vsque in finem: & tu sis solus semper spes mea, tota fiducia mea, diuitiæ meæ, delectatio mea, iucunditas mea, gaudium meum, quies & tranquillitas mea, pax mea, suauitas mea, odor meus, dulcedo mea, cibus meus, refectio mea, refugium meum, auxilium meum, sapientia mea, portio mea, & possessio mea, thesaurus meus, in quo fixa & firma & immobiliter semper sit radicata mens mea & cor meum, Amen.

Alia oratio post Communionem.

I Neffabilem misericordiam tuam, Domine Iesu Christe, humiliter exoro, vt hoc Sacramentum corporis & sanguinis tui, quod indignus suscepi, sit mihi purgatio scelerum, sit fortitudo fragilem, sit contra mundi pericula firmamentum, sit impetratio veniæ, sit stabilimentum gratiæ, sit medicina vitæ, sit memoria tuæ passionis, sit contra debilitatem

litem fomentum , fit viaticum meæ peregrinationis . Euntem me conducatur , errantem me reducat , reuertentem me suscipiat , titubantem me teneat , cadentem me erigatur , & perseverantem me in gloriam introducat . O altissime Deus , beatissima præsentia corporis & sanguinis tui sic immutetur palatum cordis mei , ut præter te nullam unquam sentiat dulcedinem , nullam amet pulchritudinem , nullum quærat illicitum amorem , nullam desideret consolationem , nullam admittat unquam delectationem , nullum curet honorem , nullam timeat crudelitatem . Qui vivis & regnas cum Deo Patre in unitate Spiritus sancti Deus per omnia secula seculorum , Amen .



MODVS VTILITER
AVDIENDI SACRVM.

I.

Ante Sacrum.

Ogita te sacrum audiendo eosdē prorsus animi motus sentire debere, quos sensisses si passioni Christi præsens interfuisses, & illum in sacra crucis ara sui corporis hostia, & pretiosi sanguinis effusione, mundum Patri reconciliantem cōtemplatus fuisses: est enim Missa sacrificij illius vera & viva representatio, vbi idem sacerdos Christus, eademque hostia, & fructus sacrificij.

ORATIO ANTE SACRVM.

R Edemptor humani generis Christe Iesu, tot tantisque à te sumus aucti promeritis, tantisque post assumptā carnē beneficijs cumulati: vt prorsus de tuo erga nos amore addubitare non possim. Hoc attestatur tuæ vitæ ac mortis religiosissima & cum omni æternitate adæquanda memoria: hoc prædicant ista, quæ tu extare volebas in humanū genus, monimenta diuini amoris sempiterna. Passus es, Saluator clementissime, mortem ignominiosissimam: vitam propter me duxisti contemptissimā: Nec vllis libera-

litatis finibus hæc tanta beneuolentia arceri potuit: Sed vilitatem tuam, abiectionem, ignominiam omnibus omnium seculorū mortalibus notam esse atque testatam voluisti. Imò verò vt tuo beneficio ego gratus & pius, in maximi beneficij memoria, esse possim, acerbissimā tuā mortē, & luctuosissimi funeris exequias, quotidie de integro præcipis celebrari. Concede obsecro mihi tuam gratiam, ne otiosus sanctissimæ oblationi tuæ assistā: sed vt meritam tibi Deo immortalī gratiā iustis honoribus persoluā. Concute terrenas animæ meæ cogitationes, & contende duritiem cordis mei, tantorum commemoratione beneficiorum.

ORATIO AD B. VIRGINEM MARIAM, Ante Sacrum.

O Mater pietatis & misericordiæ, beatissima Virgo Maria, ego miser & indignus peccator ad te cōfugio toto corde & affectu, & precor tuam pietatem, vt sicut dulcissimo filio tuo in cruce pendēti astitisti, & simul cum illo sacrificium immaculatum corporis & sanguinis eius in mundi redemptionem Deo Patri obtulisti; ita & nobis omnibus hīc & in tota Ecclesia huic sacrificio hodie præsentibus clemen-

clementer assistere digneris, vt tuis adiuti precibus, dignam & acceptabilem hostiã summæ Trinitati offerre, & diuinos eius fructus percipere valeamus, Amen.

2.

Dum Sacerdos facit confessionem.

Perpende quàm grauiã fuerint, tum primi parentis, tum alia omnia totius mundi peccata, propter quæ tollenda Dei Filius incarnari & mori voluit. Tua corã Deo agnosce & confitere; & roga vt pretiosus Christi sanguis, qui hîc offerendus est, & tuas & totius mundi sordes misericorditer abluat.

O R A T I O.

Sanctissime & piissime Iesu, splendor ipse æternæ gloriæ, non indigneris, quæso, mihi seruo tuo, quod te aduentantem, puro, sancto, & immaculato non accipiã hospitio: sed ecce in ipso ad tanta mysteria ingressu, inuito ad labes animæ purgandas, paralyticum, quem suum scelus de sanitate ac mente deturbauit, offero pristinæ saluti restituendum: animam meã, misera ægritudine afflictam, ostendo. Pudet me, Domine, deformitatis, inopiæ, & vilitatis meæ. Et hoc cui conquerar, mi Iesu, nisi tibi ipsi, qui misericordissimus es medicus animarum. Ignosce mihi, omnium concupiscentiarũ maculis

notatissimo. Agnosco & confiteor, purissimā vitam à te mihi donatam, omni dedecore esse inquinatam : quapropter obsecro, vt quicquid vanitas cogitationum, verborū leuitas, ac operum prauitas, maculis aspersit, tu precioso tuo sanguine eluere, ac tuo supplicio expiare digneris. Da mihi omnia merita, omnes virtutes, omnes iustitias, omnem denique decorē vitæ, passionis, ac mortis tuæ. Largire mihi quoque omnia promerita ac virtutes Beatissimę virginis Mariæ, omnium Sanctorum tuorum, & præcipuè quorū hodie festiuitas in regno tuo celebratur.

3.

In prima Missæ parte vsque ad offertorium vitam Christi, quæ varijs ceremonijs à Sacerdote representatur, meditando percurres: Eius in incarnatione charitatem, in natiuitate paupertatem, in circumcisione dolores, in tota vita obedientiam, in predicatione Zelum animarum ingentem, defatigationes, famem, sitim, miracula, & id genus alia, vel simul omnia, vel singula, prout affectus feret, considerando.

O R A T I O.

A Mantissime humani generis saluator Christe Iesu, mundi creator ac redemptor, vtinam ita mihi pietas esset in referendis gratijs iucūda: sicut tibi mea
salus

salus chara fuit , cùm miserabilis nostræ
tum damnationis tum calamitatis mise-
ricordia captus, de regalibus sedibus , de
mellifluo corde Patris, intra regionis mi-
seræ fines descendisti , & hanc à natura
communem lucem accepisti.

O Iesu amantissime , quantopere nos
ab initio dilexisti? Procreasti nos, & hoc
spiritu vitali donasti: & cùm prorsus ab
omni tutore orbat, nullius fidem implo-
rare potuissemus , salutem hominum in
tua esse tutela voluisti : & ne finis aut
exitus aliquis tuæ erga nos benevolentie
reperiretur, maximis vinculis propinqui-
tatis & affinitatis hominibus coniungi,
& hominum agnatione ac gente teneri
es dignatus. Adeoque pauper effectus es,
nostræque miseræ ita gustasti amaritudi-
nem: vt ipso natiuitatis tuæ tempore, nec
tantillum rei haberes hæreditariæ , vbi
puerilia tua membra hospitio accipi pos-
sint. Vix dum in lucem susceptus eras, &
adhuc inter castissima matris tuæ brachia
iacebas, necdum cuiquam verbum dixe-
ras: cùm crudeles homines vitam , quam
à parente sanctissima acceperas, adimere
quærebant. Et cùm triginta ferè annos,
sub matris obediētia latens, in hominum
ignoratione versatus fuisses, in profuen-

te Iordanis aqua ablutus, atque in summa illa famis & solitudinis patientia, ab hoste es laceffitus Iesu dulcissime, hoc modo nostram es redemptionem exorsus: ita salutem nostram es operatus, his pœnis atque ærumnis infantiam tuam consecrasti: his calamitatibus vitam exposuisti, atque vsque ad consumptionem tui, in laboribus & aduersitatibus, in vigilijs & lachrymis, in orationibus & prædicationibus, in fame & siti, in frigore & æstu, in itineribus & persecutionibus, temetipsum pro nobis afflixisti. Hæ fuerunt, amantissime Iesu, diuitiæ illæ, hæ merces, quibus viles nos homunciones comparasti: tanti nos faciens, vt amore nostri vitam tuam non modò in pœnas & opprobria, sed in extremum etiam discrimen ultro offerres. Adoro igitur te, Saluator noster, benedico te, & gratias ago tibi, pro innocentia tua singulari, pro vita tua & viuendi integritate sanctissima, pro doctrina saluberrima, pro peregrinatione laboriosissima, pro discipulorũ vocatione, pro beneficiorum erogatione, atque pro inæstimabili dilectione. Et per hæc omnia, ardentissimam charitatem tuam obsecro, vt me vilissimum, perfidia peccatorum à te distractum, in tuam gratiam reducas,

reducas, & me innocentia ac misericordia tua, à libidinum impetu & scelerum labe vindicare non desinas: seruum perpetuò fidelem me tibi efficias, reges, tuq; solus me, amantissime, secundum tuum beneplacitum, perpetuò possideas.

4.

Dum legitur Euangelium, attētus stabis, & spirituales aliquem ex eo fructū colligere conaberis. Quòd si symbolum dicatur, illud cum Sacerdote recitando, breuem fidei professionem facies.

5.

Ab offertorio ad elevationem cogita Christi immensam charitatem, qua tum toto vitæ suæ tempore, tum maximè triduo ante passionem Hierosolymam veniens, & postea orans in hortu se Deo Patri obtulit, ut nostris peccatis satisfaceret, & hostia viua nos Deo reconciliaret. Tu similiter Deo Patri cum Filij hostia te ipsum totum offeras.

ORATIO.

OBLATVS EST, QVIA IPSE VOLVIT.

VErè pius, verè misericors es Iesu clementissime: quis enim hoc attentaret, nisi tu offerri voluisses? Nam cum nihil pretiosius, nihil amabilius & charius te ipso habuissemus, quis in te pro peccatis & sceleribus nostris animadvertere præsumpsisses? Sola nostræ calamita-

tis misericordia te cepit, sola charitas te induxit, vt cūm propter paupertatem, & miseriam nostrā, soluendo non essemus, & ab omni prorsus auxilio destitueremur: tu ipse pretiū factus, debitū nostrę preuagationis sanguine tuo pretiosissimo persoluisti: nostrā salutem, quā vitam tuā, chariorē duxisti. Quid enim tu vnquam cōmisisti? quod scelus tuū? quę noxa tua? quę causa mortis? Ego, ego sum tui plaga doloris, tuę culpa occisionis. O mirabilis dignatio; peccat iniquus, & punitur iustus: offēdit impius, & dānatur pius. Quid Rex meus & Deus meus, quid retribuam tibi pro omnibus, quę tribuisti mihi? Ecce quicquid optimū, charissimū, pretiosissimum habemus, nimirū te ipsum, tibi iterum atq; iterū offerre volumus: Veni ergo, & de altissimo glorię tuę solio descēde. Ecce proferimus tibi Deo, rerū omniū Creatori & Saluatori, primitias ex tuis creaturis & donis, Panē & vinum aqua mixtum, in carnem & sanguinē tuū mox consecranda. Digneris summe Deus hanc oblationē, placatus pro cūcto populo tuo quę acquisuisti sanguine tuo, accipere. Et quoniam, Benignissime Iesu, quanta nos beneuolētia complectaris, antequā vinculis, & verberibus, atq; omni supplicio

ex-

excruciatus necareris, satis declarasti: Cū inter varia laudis & honoris præconia, quibus te a fello infidentē plebs cū ramis arborū occurrēs excepit, vrbis, imò magis animarum exitium & perniciem deflens, vim lachrymarū profudisti. Oro obsecro-
que hanc tuā charitatem, tuasq; lachrymas obtestās: da mihi pari lētitia te Christum in Sacramento præsenti excipere: & ita ad complectendū te. seruatorē procedere per sancta desideria, sicut plebs illa deuota in die Palmarū tibi obuiā prodijt. Da etiam nos ipsos, nostraq; omnia, pro tanto beneficio aspernari & contemnere: sicut illi vestimenta, ante conspectū tuum sternentes, abiecerunt in via. Sanctus, Sanctus, Sanctus, Dominus Deus, &c.

6.

Post præfationem orabis pro omnibus Ecclesie statibus, parentibus tuis, & amicis, &c.

ORATIO,

SVmme Sacerdos & vere Pontifex Iesu Christe, tibi humani generis redemptori, pro salute in primis mea, supplico: vt quoniam me ab initio in tua fide & potestate posuisti: nullam partem, neq; animi neque corporis, vacuam tua tutela relinquo: & omnē infestissimū hostium impetum à me propulses. Oro etiam Dñe

pro vniterſa ſancta Eccleſia Catholica,
pro omnibus Chriſtianorū Rectoribus,
pro Epifcopo præſertim & Rege noſtro,
pro religioſis atque ſecularibus, cunctiſq;
in te credentibus, qui tuo amori ſuū ſtu-
dium conſecrarunt. Præſta, Domine Rex
æterne, tibi Deo dicatis continentia, vir-
ginibus caſtitaſtem, coniugatis ſanctimo-
niam, pœnitentibus indulgentia, viduis
& orphanis tutelam, pauperibus auxi-
lium, peregrinantibus reditum, lugiſſi-
bus conſolationē; optimis vt in bonitate
ſemper conſiſtant, bonis & mediocribus
vt meliores fiant, prauē agentibus & de-
linquentibus vt citò ſe ad meliorem fru-
gem recipiant. Obteſtor te Saiuator dul-
ciſſime, per orationes Patriarcharum, per
merita Prophetarū, per ſuffragia Apoſto-
lorum, per conſtantiam Martyrum, per
fidem Confeſſorū, per caſtitaſtem Virgi-
num, & per interceſſionē omnium San-
ctorum, qui tibi ab omni æternitate pla-
cuerunt. Per te Ieſum agnum Paſchalem,
qui agnus ipſe iam iam pro nobis immo-
landus, cum diſcipulis comedens, corpus
tuum & ſanguinem ſub ſpecie panis &
vini ſumenda eiſdē tradidiſti, idipſumq;
à nobis in tuæ dilectionis & noſtrę redē-
ptionis memoriam fieri, præcipiens, inſti-
tuiſti.

tuiſti. Oro te, bone Ieſu, ignoſce omnibus iniquitatibus meis, & quidquid negligētiæ, quidquid delicti, circa hoc tremendū Eucharistiæ Sacramentum admiſi, ea deleas charitate, qua te nobis donasti. Accēde cor meum, flagrantissimo huius diuinissimi Sacramenti amore & desiderio.

7.

Quando eleuatur corpus & ſanguis Chriſti Domini, imaginaberis te Chriſtum videre in cruce ſuſpenſum, & ex eius vulneribus largiter decurrentē ſanguinem. Orabis vt te & totum mundū expurget, charitate inflammet, & ad ſe trahat: quia ipſe eſt qui dixit, cū exaltatus fuero à terra, omnia traham ad meipſum.

ORATIO S. THOMÆ
AQUINATIS.

ADoro te ſupplex latens Deitas, quæ ſub his figuris verè latitas. Tibi ſecor meū totum ſubiicit: quia te contemplanſ totum deficit. Viſus, guſtus, tactus in te fallitur: ſed auditu ſolo in te creditur. Credo quicquid dixit Dei filius: verbo veritatis nihil verius. In cruce latebat ſola Deitas: ſed hīc latet ſimul & humanitas. Ambo tamen credens atque confitens, peto quod petiuit latro pœnitens. Plagas ſicut Thomas non intueor: Deū
tamen

tamen meum te confiteor . Fac me tibi
semper magis credere, in te spem habere,
te diligere. O memoriale mortis Domini,
panis verus, vitam præstans homini. Præ-
sta meæ menti de te viuere, teq; illi sem-
per dulce sapere. Pie pelicane Iesu Do-
mine , me immundū munda tuo sangui-
ne : cuius vna stilla saluum facere totum
mundum posset omni scelere. Iesu, quem
velatum nunc aspicio , quando fiet istud
quod tam sitio: vt reuelata cernens facie,
visu sim beatus tuæ gloriæ? Amen.

8.

*Post eleuationem contemplare Christum in al-
tari crucis positum, eius vulnera singula & dolores
considera, & æterno Patri pro tuis totiusq; mundi
peccatis offer. Vel Christum roga, vt septem illa
verba, quæ in cruce dixit, iam ex altari tanquam è
cruce proferat; & pro peccatoribus, qui etiam hoc
tempore illum crucifigunt, oret Patrem, dicens: Pa-
ter parce illis, quia nesciunt quid faciunt.*

*Te beatæ Virgini quasi adstanti commendet, &
filialem erga illam affectū largiatur, vt S. Ioanni:
Mulier ecce filius tuus; ecce mater tua; vt nimirum
illam in tuam accipias.*

*Voce illa, Sitio, excitet te ad maiorem salutis
tuæ, & aliorum curam, & animarum zelum. Hoc
enim erat quod in cruce clamabat, & nunc in alta-
ri clamat, Sitio.*

Omnibus

Omniſus in mortis agone conſtitutis opem ferat & ſolatum, dicatq; illis quod Latroni, Hodie mecum eris in paradifo. Qui ſe propter te à Patre ſuo derelictum teſtatus eſt, concedat, vt nunquam à te derelinquatur, ſed perpetua paſſionis ſuæ memoria, & mundi contemptu perfectò te ſecum crucifigat, vt tibi mundus crucifixus ſit, & tu mundo.

Conſummet in te & perficiat Chriſtianæ vitæ debitum, quod in virtutem omnium perfectione conſiſtit. Ea enim eſt conſummatio, quam nobis meritus eſt Chriſtus paſſione ſua: Ideo dixit, conſummata ſunt; nam vna oblatione conſummauit ſanctificatos. Denique qui Patri ſuo animam ſuam commendauit, dicens: In manus tuas commēdo ſpiritum meum; concedat, vt poſt vitam Chriſtianè actam, animam tuam in manus eius commendare, & cum ſua gloria & pace mori, valeas.

ORATIO QVA REPRÆSENTAT HOMO DEO PATRI
PASSIONEM FILII.

Ex meditationibus D. Auguſtini.

A Spice pie Pater, piſſimum filium, pro me tam impia paſſum. Reſpice clementiſſime Rex, quis patitur, & reminſcere benignus pro quo patitur. Nōne hic eſt, mi Domine, innocens ille, quem vt ſeruum redimeres, filium tradiſti? Nunquid non auctor vitæ hic eſt, qui

qui vt ouis ad occisionem ductus , tibiq;
vsque ad mortem obediens factus , atro-
cissimæ non timuit necis genus subire?
Recole totius salutis dispensator , quia
hic est ipse , quem etsi ex tua virtute ge-
nuisti, meæ tamē infirmitatis participem
fieri voluisti. Verè hæc est tua Deitas, quæ
meam induit naturā, quæ crucis ascendit
patibulum, quæ in assumpta carne , triste
tulit supplicium. Reduc, Domine Deus
meus, oculos tuæ maiestatis super opus
inffabilis pietatis. Intuere dulcem natū
toto corpore extensum: cerne manus in-
noxias, pio manantes sanguine, & remit-
te placatus scelera, quæ patrarunt manus
meæ. Cōsidera inermē latus, crudeli per-
fossū cuspide, & renoua me sacro fonte,
quem inde credo fluxisse. Vide immacu-
lata vestigia , quæ non steterunt in via
peccatorum , sed semper ambulauerunt
in lege tua , diris infixæ clauis : & perfi-
ce gressus meos in semitis tuis , & fac me
odio habere benignus omnes vias iniqui-
tatis. Viam iniquitatis amoue à me , &
fac me propitius viam veritatis eligere.
Oro te Rex Sanctorum, per hunc Sanctū
Sanctorū, per hunc redemptorem meū,
fac me currere viam mandatorum tuo-
rum : vt ei valeam spiritu vniri , qui mea
non

non horruit carne vestiri. Nunquid non attendis, pie Pater, adolescentis filij charissimi caput, niuea ceruice deflexa, preciosissimam resolutū in mortem? Aspice, mitissime cōditor, dilectæ sobolis humanitatē, & miserere super infirmi plasmatæ debilitatem. Candet nudum pectus, rubet cruentum latus, tensa arent viscera, decora languent lumina, regia pallēt ora, procera rigent brachia, crura pendēt marmorea, rigat terebratos pedes beati sanguinis vnda. Specta, gloriose genitor, gratissimæ prolis lacerata membra: & memorare benignus, quæ in ea est substantia. Conspicere Dei hominis pœnam, & relaxa conditi hominis miseriam: Vide redemptoris supplicium, & redempti dimitte delictum. Hic est Dñe mi, quem propter peccata populi tui percussisti, licet ipse sit dilectus, in quo tibi bene placuisti. Hic est ille innocens, in quo dolus non est inuentus, & tamen inter iniquos deputatus est. Te igitur oro, patere per hunc filiū tuum exorari. Memento etiā quæso Pater sanctissime omniū credentiū, qui Christianæ & piæ lucis hanc vsuram perdiderunt. Memento N. Ne in iudicio cum eis contendas, ne à sinistris eos statuas, sed eos tecū in sempiternā requiē susci-

fulcipias: vbi te S.S. Trinitatem cum omnibus electis videant & celebrent. Pater noster, &c. Agnus Dei, qui tollis peccata mundi, &c.

9.

Quando Sacerdos est cōmunicaturus, excita pariter animæ tuæ vires, vt spiritualiter cōmunices, Spiritualiter communicare, est certissima fide Christi in altari præsentē confiteri & venerari: Deinde inflammato cordis affectu desiderare, si expediret, per realē etiam Sacramenti perceptionē ei vniri, & diuinos Eucharistiæ fructus recipere. Itaq; Christū orare debes, vt Spirituali saltē modo in animā tuā veniat, & thesauros suæ gratiæ in eam effundat, vt suo pretioso sanguine, & sūmā humilitate, superbiam tuā conterat, mūdēt sordes, & impuras cogitationes, & suauifortiq; amoris vinculo sibi cōiungat. Qui tres effectus maximè petendi vidētur.

ORATIO PRO CONSEQUENDIS EVCHARISTIÆ FRUCTIBVS.

Accipite & comedite, hoc est enim corpus meum.

O Sacrum, ô excellens conuiuium, in quo Christus sumitur: Christi corpus olim infantia vagitibus afflictum, iuuentutis sudoribus vexatū, ieiunijs maceratum, itineribus fessum, affectum flagris, cum mortuis deputatum, deniq; in dextera Patris omnipotentis collocatum,

pro-

proponitur. O Iesu, ô Christe benedicte, sis in æternū benedictus, qui in eminentissimo glorię tuę solio, atq; in sacerdotis manibus idem vis contineri, & meæ animæ cibis fieri non dedignaris. Obsecro Dñe, vt quam olim in naturæ cōmunis fragilitate, ab hostibus teterrimis in crucē sublatu, salutē acquisiisti, hodie per hunc sacratissimū cibum animæ, redditam ac restitutā accipere possimus. Medere, O Iesu, quotidianis conscientię meę vulneribus. Noli, ô benignissime Samaritane, seruum tuū, misera ægritudine afflictū debilitatumq; , in præteritis relinquere. Ecce ego ille idem, quem olim incolumitate donasti; nondū prorsus, propter frequentes cū latronibus conflictus, ægrimonia leuatus: Nec vnquā pristinæ restituar sanitati, nisi prius tuo sanguine expiatus fuero. Rogo vt in communi nostro dolore, pietati ac indulgentiæ tuæ seruias. Concede ad meā hodie seruire salutem, & Patris tui placationem, quòd pro omnium redemptione dignatus es impendere.

Amor, qui te traxit è cælo, vt perditum Adam redimeres, ipse te commoueat, vt me eiusdem peccati sociū, per hoc SS. Sacrificium, à perpetua scelerum seruitute liberes. Refice vires, satia & exple hoc
pane

pane vitæ viuo & vero : & extingue in nobis omnem famem carnalium & secularium desideriorū. Redemptor mi , expelle à me spiritum superbiæ , & concede propitius thesaurū humilitatis tuæ . Saluator mi , da mihi solidam fidem , spem congruam , charitatem continuā. Rector mi , auerte à me vanitatē , mentis inconstantiam , oris obscœnitatem , oculorū elationem , ventris intemperantiam , opprobria proximorum , scelera detractionum ; inanis gloriæ appetitū . Reseca in me , factor mi , temeritatem iniquam , pertinaciam , inquietudinē , somnolentiam , mentis stuporem , linguæ effrenationē. Deus meus , misericordia mea , oro te , da mihi misericordiæ opera , pietatis studia : da mihi bonos imitari , malos cauere , virtutes amplecti , vitia extirpare . Da quod iubes Dñe ; & iube quod vis : Dilata os animæ meæ , vt te panem Angelorū , panem cælestē capere possit : vt possim adolescere in virum perfectū , & occurrere in ætatem plenitudinis tuæ , ac post hanc vitā , pleno & dilatato ore , desiderabilissimæ diuinitatis tuæ suauitate perfrui merear .

10.

In fine Sacri resurgentem à mortuis Christū , & in celos ascendentem , supplex ora , vt à corruptione vitæ

vite resurgere te faciat, & in cælū cor tuum trahat, nec patiatur, illa præcipue die, terrenis te sordibus inquinari, aut implicari nugis: sed præstet, vt in finem tuum, id est, cælestem beatitudinem intentis perpetuò oculis, valcas intueri.

O R A T I O.

Domine Iesu Christe, qui ascendens in cælū, omniū animos aduocasti ad cælestia, & nobis maximā spem illa consequendi dedisti: Ecce & nunc viua hostia missus es, & oblatus pro nobis Patri: Cogita quæso de nobis, & benedic animis nostris, vt non ad captandā vitæ huius vanissimā iucunditatē, sed ad regni perennis beatitudinē consecrandam eamus, & ad cælestia desideranda & quærēda, corpore reuertamur ad nostra, mēte verò tibi vni omniū conditori & moderatori consociari, nunquam à te diuelli ac distrahi, patiamur. Denique præsta, vt cum viuīs & defunctis, extremo iudicij die, in illa bonorū multitudine, læti sub aspectum tuum venire possimus.

A P P R O B A T I O.

Hic tractatus precum & exercitiorum, ex variis approbatis libellis recollectus, nil nisi deuotionem & pietatem spirat; utilis qui omnium cuiuscunque status & conditionis sit manibus teratur. Quare dignum iudico, vt typis mandetur, & in multorum vsum producat, 6. Iulij, Anno 1600.

Egbertus Spitholdius S. T. L. ac Ecclesiæ
Cathed, Antverp. Canonic. & Plebanus.

Sebastianus Gaurici
est per seipsum sumus
liber
Anno 12 17

Petrus Sebastianus
Lentici ardecanus
grammaticus

Sebastianus
Gaurici est
possessor sumus
liber

S. Petrus Seneca
L. de Seneca

